

# मत्ती न माण्डि परभु ईसु मसी की छोखी खबर

1

## परभु ईसु का आगला-बड़ा क नाऊं

1 इब्राहीम की ओलाद दाऊद की ओलाद, ईसु मसीह की पिढ़ीयां ई प्रकर छ। 2 इब्राहीम को बेटो इसहाक छो; इसहाक को बेटो याकूब छो; अर याकूब सुँ यहूदा अर उंक भाई पँदा होयो। 3 यहूदा क बेटा छा फिरिस अर जोरह। (उंकी माँई को नाऊं तामार छो।) फिरिस सुँ हिस्त्रोन पँदा होयो। अर हिस्त्रोन सुँ एराम पँदा होयो। 4 अर एराम सुँ अम्मीनादाब पँदा होयो। ; अर अम्मीनादाब सुँ नहशोन अर नहशोन सुँ सलमोन पँदा होयो। 5 अर सलमोन अर राहब सुँ बोअज पँदा होयो। अर बोअज अर रूत सुँ ओबेद पँदा होयो। ; अर ओबेद सुँ यिशै पँदा होयो। 6 अर यिशै सुँ दाऊद राजा पँदा होयो। अर सुलैमान दाऊद को बेटो छो। ज्ये उ लुगाई सुँ जन्मयो ज्ये फॅली उरिय्याह नाऊं का एक आदमी की लुगाई छी। 7 अर सुलैमान सुँ रहबाम पँदा होयो। अर रहबाम सुँ अबिय्याह पँदा होयो। अर अबिय्याह सुँ आसा पँदा होयो। 8 अर आसा सुँ यहोशफात पँदा होयो।; अर यहोशफात सुँ योराम पँदा होयो।, अर योराम सुँ उज्जियाह पँदा होयो। 9 अर उज्जियाह सुँ योताम पँदा होयो।; अर योताम सुँ आहाज पँदा होयो।; अर आहाज सुँ हिजकिय्याह पँदा होयो। 10 अर हिजकिय्याह सुँ मनश्शह पँदा होयो। अर मनश्शह सुँ आमोन पँदा होयो।; अर आमोन सुँ योशिय्याह पँदा होयो। 11 वां दनां मं बेबिलोन देस का राजा\*न इस्राएल क लोगां न जोरियाँ सुँ पकड़र बेबिलोन ले जाबा क बगत योशिय्याह सुँ यकुन्याह अर उकें भाईयां पँदा होयो। 12 जोरियाँ सुँ पकड़र बेबिलोन मं लेजाया क पाछें यकुन्याह सुँ शालतिएल पँदा होयो। अर शालतिएल सुँ जरूब्बाबिल पँदा होयो। 13 अर जरूब्बाबिल सुँ अबीहूद पँदा होयो, अर अबीहूद सुँ इल्याकीम पँदा होयो; अर इल्याकीम सुँ अजोर पँदा होयो। 14 अर अजोर सुँ सदोक पँदा होयो; अर सदोक सुँ अखीम पँदा होयो ; अर अखीम सुँ इलीहूद पँदा होयो। 15 अर इलीहूद सुँ इलियाजार पँदा होयो ; अर इलियाजर सुँ मत्तान पँदा होयो; अर मत्तान सुँ याकूब पँदा होयो। 16 अर याकूब सुँ यूसुफ पँदा होयो; ज्ये मरियम को आदमी (पति) छो। मरियम सुँ ईसु को जनम होयो ज्ये मसीह कहलाव छ। 17 इ प्रकार इब्राहीम सुँ दाऊद ताई चौदह पीढ़ियां होई। अर दाऊद सुँ ले'र बन्दी बणार बेबीलोन खन्दाबा ताई की चौदह पीढ़ि छी, अर बन्दी बणार बेबीलोन खन्दाबा सुँ मसीह का जन्म ताई चौदह पीढ़ि होई।

## ईसु को जन्म

18 ईसु मसीह को जन्म अस्याँ होयो, क जद उँकी माँई मरियम की सगाई यूसुफ क लारां होई तो दोनी को ब्याव होबा सुँ पहली ही सुँ वह पवित्र आत्मा की शक्ति सुँ पेटसुँ हो गी छी। 19 तो उँको होबाळो घर को धणी यूसुफ एक भलो मनख छो अर ऊ इ प्रकट कर'र लोग-दनीयां मं मरियम न बदनाम करबा न्ह छावें छो, उन्ह छान सेक सगाई तोड़बा काण बच्यार कर्यो छो। 20 जद यूसुफ

इ बातां की सोच में छो, तो सपना में उकें सामें परभु को स्वर्गदूत प्रकट हो'र उसुं खबा लाग्यो, क“हे! यूसुफ, दाऊद की सन्तान, मरियम न थारी लुगाई बणार यहाँ लाबा सुं मत डरप क कस्यां ज्ये बच्चो उँका पेट में छ, वह परमेस्वर का पवित्र आत्मा क काढी सुं कनायो छ। 21 वह एक बेटो न जन्म देगी। तू उँका नाऊँ ईसु रखाणज्ये क कस्यां उँ अपणा लोगां न वहाँका खोटा-गुणा सुं छुटकारा करगो।” 22 ये सारी बातां ई लेखें होई क परभु न घणा साल पहली भविष्यबाणी खबाळा क वाळ खी छी; वह बातां पूरी होई। 23 “सुणो, एक कुँवारी कन्या पेटसुं होर एक बेटो को जन्म देगी। उँको नाऊँ इममानुएल राख्यो जावगो।”<sup>b</sup> (जिका मल्लब छ“परमेश्वर आपण लारां छ।”) 24 जद यूसुफ नन्द्रा सुं उठ'र प्रभु की स्वर्ग दूत की आज्ञा अनुसार वह मरियम क लारां ब्याह कर'र अपणा घरां ल्याया। 25 अर ज्याँ ताँई उँक बेटो पँदा न्ह होयो तब ताँई ऊ मरियम क गोड़यां न्ह सोयो: अर यूसुफ न ऊ बेटो को नाऊँ ईसु राख्यो।

## 2

### ज्योतिष्यां को आबो

1 राजा हेरोदेस जद राज करह छो, उ दनां में यहूदियां का नगर बैतलहम में ईसु को जन्म होयो छो। तो कोई समय बाद में कोई ज्योतिष्यां ज्ये तारा क बारां में जाणकारी रखाणें छा, व उगणी दसा सुं यरूशलेम नगर में आर बूजबा लाग्या। 2 क यहूदियां को राजो जिको जन्म होयो छ, ऊ कठी छ? क कस्यां म्हाँ उगणी दसा में उको तारा न बादळा में देख्यो छ अर म्हाँ ऊ बेटो न ढोकबा आया छां। 3 जद राजा हेरोदेस न या सुणी तो वह घणो घबरा ग्यो अर उँका लारां यरूशलेम नगर का दूसरा सारा लोग-दणी भी चन्ता करबा लाग्या। 4 अर उनें यहूदी समाज क सारा प्रमुख याजकां अर यहूदियां का निम सखाबाळा न भेळा कर'र वा सुं बूज्या क मसीह को जन्म कठी हो सकें छ। 5 वानह हेरोदेस राजा सुं खी यहूदिया जिला का बैतलहम में मसीह को प"दा होउगो। क कस्यां भविष्यबाणी करबाळा क वाळ माण्डियो ग्यो छ क: 6 क 'हे बैतलहम, ज्ये यहूदा क देस में छ, तू कसी भी रीति सुं यहूदा का अधिकारियां में सब सुं छोटो कोई न्ह; क कस्यां था में सुं एक अस्यो राजो प"दा होवगो ज्ये म्हारी प्रजा इस्राएल की रखवाली करगा"। 7 जद हेरोदेस ज्योतिषियां न छान सेक बला'र वा सुं बूजी, क वह तारा कसी बगत में दिखाई दियो छो। 8 हेरोदेस राजा न ज्योतिषियां सुं या ख'र बैतलहम खन्नाया, क जाओ ऊ बाळक क बारां में छोखी तरह सुं मालुम करो अर जद थानें ऊ मल जाव तो म्हाँ काण सम्चार दे दिज्ये ताकी म्हाँ भी आ'र उँको ढोक दे सकुं। 9 फेर व ऊ राजा की बात सुण'र चलग्या, अर झाँको, ज्ये तारो वानह उगणी दसा में देख्यो छो, ऊ तारो वाकें आग्ह आग्ह चाल्यो, अर ज्याँ बाळक छो। उ ठोर क ऊपर पूग'र रुख्यो। 10 जद व ऊ तारा न देख'र घणो राजी होयो। 11 वान्ह ऊ घर में पुग'र ऊ बाळक न उँकी माँई मरियम क गोड़यां देख्यो अर वह ज्योतिष्या न आडा पड़'र उकें ढोक दिया। फेर व अपणा-अपणा थैला खोलर, ऊ में सुं बाळक काण सुनो अर लोबाण अर गन्धरक(कपूर) की भेंट चढ़ाई। 12 पण सपना में ज्योतिष्या काण या चुणोती मल्यो क राजा हेरोदेस क गोड़यां पाछें मत जाज्यो अर व दूस्रा गेला सुं अपणा देस में खढ़ग्या।

## मिस्र देस जाबो

13 जद व चलग्या तो जाँखो, परभु को एक दूत न सपना मं यूसुफ काण दर्साव दे'र खी, उठ; उ बाळक अर उकी माई न ले'र मिस्र देस मं भाग जा; अर जद ताँई म्हूँ थसुँ कोई न्ह खूँ तब ताँई ऊँठी रिज्यो; क कस्याँ हेरोदेस इ बाळक न मारबा काण हेरयो छ। 14 फेर यूसुफ उठ'र उई रात मं ही बाळक अर उकी माई न ले'र मिस्र देस क आड़ी चाल पड़यो। 15 अर ज्याँ ताँई राजा हेरोदेस कोन्ह मर्या वहाँ ताँई व मिस्र देस मं रिया; इ लेखँ उ बचन ज्ये परभु न भविष्यबाणी करबाळा सुँ खी छी वह पूरी होई क म्हनँ म्हारो छोरो मिस्र देस सुँ बलायो छ।

## राजो हेरोदेस को खोटो काम

16 जद हेरोदेस न यह देखी, क ज्योतिष्या न ऊँकें लारां धोको कयों छ, तो ऊ रोस मं होग्यो; अर मनख्यां न खन्नार क ज्योतिष्या सुँ छोखी तनँ बुज्यो होयो बगत क अनुसार बैतलहम उर उकें आस- पास की जगह(ठोर) प सारा छोरा ज्ये दो वर्ष का छ, वा वासुँ छोटा छा, मरवा गाल्या। 17 तब जे बचन भविष्यबाणी खबाळा यिर्मयाह क दुवारा ख ग्यो छो ऊ बचन पूरो होयो: 8 क “रामाह मं बारा बिब्टा की। आवाज सुणाई दी, आवाज रोबा की, घणी बाराबिब्टा की छी। राहेल अपना बाळक काण रो री छी कोन्ह छावँ छी क कोई वानँ छानी करँ, क कस्यां उका तो सारा छोरा-छोरी मर चुक्या छ।”

## मिस्र देस मं पाछँ आबो

19 हेरोदेस राजा क मरबा क बाद मं, जाँखो, परभु को एक सरग दूत न मिस्र मं यूसुफ का सूपणा मं परगट होर खी। 20 क उठ, बाळक अर उकी माई न लेर इस्राएल देस मं चल जा; क कस्यां ज्ये बाळक न मारबो छाव छ, व मर ग्या।

21 तो यूसुफ उठयो, अर बाळक अर उकी माई न लारां लेर इस्राएल देस मं आयो। 22 पण या सुणर क अरखिलाउस अपना पिता हेरोदेस की ठाम प यहूदिया मं राज कयों छो, ऊ ऊँठी जाबा सुँ डरपग्यो फेर सूपणा मं परमेश्वर सुँ चुणोती पार वह गलील परदेस मं खड़ग्यो। 23 अर ऊँठी नासरत नाऊँ का नगर मं रेबा लाग्या; ताकि ज्ये बचन भविष्यबाणी खबाळा क वाळ खयो ग्यो छो, वह पूरा हो, क वह नासरीc(नासरी गाँव का रहबाळा) खलावगो।।

## 3

## बत्तिसमा देबाळो यूहन्ना को प्रचार

1 वा दनां मं यूहन्ना बत्तिसमा देबाळो आर यहूदिया जिला क मरूथळ मं या प्रचार करबा लाग्या। 2 क अपना मन न पाप का गेला सुँ बदल्यो क कस्यां स्वर्ग को राज गोड़ँ आग्या छ 3 यह यूहन्ना ऊई छ जीक बारां मं यसाया नाऊँ का परमेश्वर की भविष्यबाणी खबाळा क वाळँ खी गी छी क मरूथळ मं एक हेलो पाड़बाळा की या बात सुणाई दे री छ। क”परभु काण गडार तयार करो, अर ऊँकें लेखँ गेला न छोखा करो” यशायाह 40:3 4 अर यह यूहन्ना ऊँटडा का बाळां सुँ बणायां लत्ता फर्या छो। अर आपणी डूणडी प चामडा को पट्टो बांध्या रह'व छो। अर ऊ टिड्डीयां अर

जंगली म्हुआळ को रस ऊका भोजन छो 5 ऊ बगत यरोसलेम का अर सारा यहूदीया ईलाका का अर एरदन नंदी का आस पास का सारा देस का लोग-दणी ऊँकें गोड़यां आर भेळा होया। 6 अर व्हानें खुद न अपना अपना पाप मानल्या।जिसुँ ऊ व्हानें काण एरदन नंदी में बत्तीस्मा द्यो। 7 अर जद फरीसी नाऊँ की धार्मीक सभा का मनख अर सदुक्की नाऊँ का यहूदीयां क एक झून्ड का मनख छा । व घणा सारां यूहन्ना क गोड़यां बत्तिस्मा लेबा काण आता देख्या तो यूहन्ना न वासुँ खी,“हे जेरिला सांप का बच्चावो! थांसुं कुणें ख’दी क आबाळा परमेस्वर का दण्ड सुं बचबा क लेख भागां ? 8 ई लेखें खोटा कामां सुं साच्चीयाँई में मन बदलबा क लायक काम करो (फल भी लाओd;) 9 अर थें आपणा आप मन में यहा मत सोचां, ‘क म्हां तो अब्राहाम की ओलाद छां, (अर म्हां परमेश्वर का चुण्याग्या लोग छां)। क कस्यां परमेश्वर इ भाटा सुं अब्राहाम काण ओलाद पैदा कर सकें छ 10 अर अबानु कुराड़यो रूखडो की जड़ प धर्यो छ,ई लेख ज्ये ज्ये रूखडो छोखा फल कोई न्ह लावें तो ऊ रूखडो काटर आग में फाक्यो जावगो। 11 म्हुं तो, मन फिराबा काण थाकें ताई पाणी सुं बत्तीस्मा द्युँ छुँ,पण व्ह म्हारें बाद में एक मनख आबाळा छ ज्ये म्हें सुं बडा महान अर घणो सकतीसाली छ।अर म्हुँ थाँ सुं खर्यो छुँ,क एक हाळी ऊँका धणी का मुडा का फीत्ता खोल सक्क छ पण म्हुँ ऊँका मुडा का फीत्ता बी खोल बा क लायक कोई न्ह,व्ह थांकताई पबीत्र आतमा में सुं अर आग सुं बत्तीस्मा देऊगो” । 12 ऊँका सूपड़ा(छाजळो) ऊँका हाथ में छ अर (वह मनख्यां को न्याय करबा काण आ रियो छ), ठीक उई तरह सुं जि तरह सुं कास्तगार अपना गहूँवां न सूपड़ा सुं फटकबा क द्वारा खाखला न न्हाळो करें छ । फेर उ अपनी पटक बा की ठाम न छोखी तरह सुं साफ करगो अर गेहूँ न कट्टा में (अनाज को संभाल कर इकट्ठा रखने की जगह) भरगो,अर खाखला न कदी भी न्ह बझबाळी आग में बाळ देगो।

## ईसु को बत्तिस्मा

13 उ बगत में ईसु गलील ईलाका सुं एरदन नंदी क कराड़ प यूहन्ना क गोड़यां ऊ सुं बत्तीस्मो लेबा काण आया। 14 पण यूहन्ना या ख’र उनें रोकबा लाग्या, क म्हनें तो थारा हाथ सुं बत्तिस्मा लेबा की जुरत छ, फेर तू म्हारें गोड़यां बत्तिस्मा लेबा आया छ? 15 ईसु न उका काण यो ज्वाब दियो, क अब तो अस्यां ही होबा दे, क कस्यां आपण इ रीति सुं सब धार्मिकता न पूरो करबो उचित छ, फेर यूहन्ना न उस्यां की होबा दीया। 16 अर जद ईसु बत्तिस्मा लेर हाथ्योहात पाणी में सुं बाहरें खड’र उपर आरिया छा।अर जाखो,उकाण एकदम स्वर्ग खुलग्यो अर उनें परमेस्वर का आतमा कबूत्रा क रूप में उतरतो अर अपणें उपर आतो दिख्यो। 17 अर जाँखो,ऊ बगत स्वर्ग में सुं आकासबाणी होई,”यो म्हारो लाड़लो बेटो छ, जीसुँ म्हुँ घणो राजी छुँ”।

## 4

## ईसु की परीक्षा

1 फेर ऊ बगत पवित्र आत्मा की अगुवाई सुं ईसु (भर्यो होया) मरुथळ में ले ग्या ताकी इब्लीस (सेतान) ऊँकें परक्ष्या ले सकें। 2 अर ऊँठी ईसु न चाळीस दनां अर चाळीस रात ताई भूखी बासी रहबा क पाछें जद उनें भूख घणा सताबा लागी। 3 फेर परखबाळा नें पाप करवाबा काण ईसु क गोड़यां आर व्हा सुं खी, अगर तू परमेश्वर का बेटा छ तो, (इ साबित कर!) क यहे भाटो सुं ख,क

रोटीयां बण जावँ।” 4 पण ईसु न ऊ सुँ खी, “कोई न्ह, क कस्यां (मुसा न परमेश्वर क) पवित्र शास्त्र मं अस्यां माण्डयो छ क मनख खाली रोटी सुं ही जीवितो कोई न्ह रह'व छ।” पण हर एक बचन सुँ ज्ये परमेस्वर का मुण्डा सुँ खड़यो छ ऊसुँ जीवतो रहवगो।व्यवस्थाविवरण 8:3

5 फेर इब्लीस (सेतान) व्हानें पवित्र नगर यरूशलेम मं ले ग्यो अर उ व्हानें मंदर की सारा सुं ऊँचि जगह प ले जा'र उबो करयो 6 अर ऊँ सुँ ख'बा लाग्यो, “अगर तू परमेश्वर को बेटो छ तो, यहाँई सुं तणें कूद जा। क कस्यां पवित्र शास्त्र मं मण्डि छ, क वह अपणा सरगदूतां काण हुकम देगो क वह थारि रक्षा करँ। अर व थनँ अपणा हाथां मं उठा लेंगा, ताकि थारा पांवा मं भाटो सुं ठोकर न्ह लागँ,(थारें कोई चोट न्ह लागँ)।” 7 ईसु न उकाण ज्वाब दियो, “पवित्र शास्त्र मं या भी मण्ढरी छ, क तू, प्रभु अपणा परमेश्वर की परीक्षा मत लिज्यो ” (यह देखने के लिये कि यदि मैं कोई मूर्खों जैसी हरकत करता हूँ, तो इसके बावजूद भी क्या सचमूच वह मेरी रक्षा करेगा?) 8 फेर सेतान ईसु न एक घणा ऊँचा डुंगर क उपर ले ग्यो अर जरा सीक देर मं व्हंकाण संसार को सारा राजपाट अर वाको जस (वैभव) दखाया 9 अर व्हासुं खी,, “म्हूँ यह सारो अधिकार अर इका जस (वैभव) थारें काण दियुँ, अगर तू म्हारा आगँ ढोकर म्हारी पुजा अरचना करँ (दण्डवत् कर'र म्हारी उपासना कर'तो)।म्हूँ, ये सारा न थारेंताई दियुँ ” 10 फेर ईसु न ऊ सुँ खी, “हे सेतान दुर भाग जा!क कस्याँ पवित्र शास्त्र मं या मण्ढरी छ, “क तू प्रभु अपणा परमेश्वर क ही उपासना( प्रणाम) कर अर खाली उकी सेवा कर” 11 तब सेतान ईसु क गोड़याँ सुँ खड़ग्यो अर देखो,सरगदूत आ'र ऊँका सेवा करबा लाग्या।

## गलिल मं ईसु की सेवकाई

12 जद ईसु न यहा सुणी क बत्तीसमो देबाळा यूहन्ना न पकड़'र काळ-कोटरी मं बुजया छ,तो ईसु गलील का इलाका मं चलग्या। 13 अर ईसु नासरत न छोड़'र कफरनहूम मं ज्ये झील क कराड़ जबूलून अर नपताली का देस मं छ जा'र रहबा लाग्या। 14 ताकी ज्ये यसाया नाऊँ का परमेस्वर की भवीष्यबाणी खबाळा न घणा साल क पहली खी छी,वह पूरा होवः। 15 “जबूलून अर नपताली क देस सागर का गेला सुँ, यर्दन नन्दी क फहलाड़ी मं, अन्यजातियों का देस गलील मं। 16 ज्ये मनख उन्धेरा मं जीवँ छा वानें एक महान उजाळा देखी अर ज्ये मोत की छाया का देस मं रेवँ छा वा प, उजाळौ दिखाई दियो )।” यशायाह 9:1-2 17 उ बगत सुँ ईसु प्रचार करबा लाग्यो अर यहा ख'बा लाग्यो क थें पाप क गेला सुँ मन बदल्यो।क कस्याँ सरग (परमेस्वर) का राज गोड़याँ आग्या छ ।”

## ईसु को पहलो चेलो

18 एक दन, जद ईसु गलील की झील क कराड़- कराड़ं जार्या छा, व्हानें दो भाईयाँ मल्लब समोन ज्ये पतरस ख'वँ छ अर ऊको भाई अन्द्रियास मछ्छीयां पकड़बा क ताई झील मं ज्याळ पटकतो देख्यो,क कस्यां व बोई(मछवारा) छा। 19 अर ईसु न वा सूँ खी,”म्हारें पाछें

आजाओ अर म्हारा चेला बणजाओ।तो थां जस्यां अबानु मछ्छीयां पकड़बाळा छ,अस्यां म्हुँ थांनँ परमेस्वर क ताई मनख्यां न लाबाळा बणाऊं।” 20 तो हात्युहाथ व अपणी ज्याळ न छोड़’र ईसु क पाछँ चालदर्या। 21 व्हांनँ जातां-जातां थोड़ा सांक आगँ,ईसु न ओर दो भाईयां मल्लब जबदी का बेटा याकूब अर ऊंको भाई यूहन्ना न अपणा भाईजी क लारां नाव प अपणा ज्याळ सुळ जारिया देख्या। ईसु न व दिखताई खी,”चालो,महारा चेला होजाओ” 22 तो व हात्युहाथ नाव अर अपना भाईजी न छोड़’र ईसु क पाछ होग्या।

## घणी सारी भीड़ ईसु क पाछँ होगी

23 अर ईसु न सारा गलील ईलाका मं घुमतो-फेरतो होयो यहूदीयां की भेळी होबाळी सभा क घर मं उपदेस करता अर परमेस्वर का राज्य को परचार करता अर लोग-दणि काण हर तरँ की बिमारयां न छोखी करता अर कमजोरियों को दूर करता रयो। 24 सारा सीरिया देस मं उकी जस फैल गी। इ लेखँ लोग-दणी अस्याँ सभी मनख को ज्ये बीमारायां सुँ पड़या छा , या तरह तरह की बीमारियां अर दुख मं सुँ पड़या छा, जिकँ गन्दी सक्ती लाग री छी, ज्यां क मिर्गी आव छी अर ज्ये लकवा का रोगी हो रयो छा, ईसु क गोड़याँ लाया अर वानँ वह रोगी छोखा कर्या। 25 ई लेखँ गलील जिला अर दस नगर(दिकापुलिस) अर यरूशलेम नगर अर यहूदिया जिला अर यर्दन नन्दी पार का मनख्याँ की बड़ी बड़ी भीड़ उका पाछँ हो ली।

## 5

### ईसु का परबचन

1 ईसु न यह बड़ी भीड़ देख’र, वह एक डूंगर प चड़ग्यो अर जद ईसु बँठग्या तो ऊँका चेला ऊँकँ गोड़यां आया। 2 अर ईसु ऊँठी यहा खर सखाबा लाग्यो :

साँची राजी-खुसी

3 “भला छ व ज्ये मन सुँ दीन छ,

स्वर्ग को राज वाँकँ लेखँ छ ।

4 भला छ व ज्ये शोक करह छ ,

क कस्यां परमेश्वर वाँकँ सान्ती देवँ छ

5 भला छ व ज्ये सीधा मन का (नम्र) छ

क कस्यां यह धरती का हकदार होवगो।

6 भला छ व ज्ये धरम का भुखा- तसाया छ !

क कस्यां परमेश्वर वांके संतोष देगा

7 भला छ व ज्ये द्या करे छ

क कस्यां उ पर भी द्या करी जावगी ।

8 भला छ व ज्यांक मन साफ(काळो कोई न्ह) छ

क कस्यां व परमेश्वर न देखगा ।

9 भला छ व ज्ये मेळजोळ करावे छ ।

क कस्यां व परमेश्वर का बच्चा-बच्ची खुवावगा ।

10 भला छ व ज्ये धर्म क कारण सताया जावे छ

क कस्यां सरग को राज वांको छ ।

11 भला छ थां जद मनख थाने म्हारें कारण थांकी चुगली करे छ अर म्हारें कारण सताया जावे छ अर झूठ बोलर थांका बरोध मं सब तरह की बरी बातां ख छ, बस ई लेखे क थे म्हारा साथिड़ा छ 12 तब तू आनन्दित अर राजी खुसी मं रहज्यो क कस्यां सरग मं थांके काण बड़ा फल(इनाम) मलगो । यह अस्यां ही छ जस्यां थां सुं फेली की भविष्यबाणी खबाळा लोगां न सताया छा ।

## लूण अर उजाळो

13 थां ई धरती मं सारा मनख्याँ क लेखे लूण हो, पण अगर लूण मं सुं लूण को स्वाद बगड़ जावे तो ऊंको कसी चिझ सुं फेर स्वाद करया जावगो?" फेर ऊ लूण कांई भी काम मं न्ह आवे, केवल उने लोग-दणी बहार फकायो जावे ज्ये मनख्याँ क पगां तणे गुन्दयो जावे छ । 14 थे जगत काण उज्याळा हो; एक अस्यां नगर ज्ये डूंगर की चोटी प बसा मल्ये छ, ऊ छिपयो कोई न्ह रह सके छ । 15 अर कोई भी मनख दीपक न जळा'र उने खाट क तणे कोई न्ह धरे पण उने आळया मं धर छ जी सुं ऊ घर का सारा मनख्याँ काण उज्जाळो मल्ले छ । 16 थांका भला कामां दिया का उजाळा क जस्यां दूसरा मनख्याँ क सामे चमकणा छायजे ज्याने देखर व थांका पिता ज्ये सरग मं छ, ऊकी बड़ाई करे ।

## यहुदियां की धर्म-निम

17 थे या मत सोचो क म्हुँ मूसा का धर्म-निमा ज्ये परमेश्वर न घणा साल फेली दियो छो या भविष्यबाणी बोलबाळा न माण्डि पोथ्यां न नास करबाकाण आयो छुँ । म्हुँ वाने नास करबा काण कोई न्ह आया पण वांकी बातां न पुरी करबा काण आयो छुँ । 18 क कस्यां म्हुँ थासुं साँची कर्यो छुँ क जद ताँई आकाश अर धरती टळ न्ह जावे, वहाँ ताँई मूसा का निम का एक एक मात्रा अर एक एक अक्षर बना रहगा, वहा तब ताँई बना रहगा जद ताँई वह पूरा न्ह हो लेता । 19 "ई लेखे ज्ये कोई ई आदेशों मं सुं कोई छोटा सुं छोटा न भी तोड़े छ अर लोगों को भी उस्याँई ही करबा काण सखावे छ, वह स्वर्ग का राज्य मं सब सुं छोटा खुवावगो । पण ज्ये कोई ऊ प चाले छ अर औरां काण भी उ प चालबा काण उपदेश देवे छ, वह स्वर्ग का राज्य

मं महान खुवावगो। 20 क कस्यां म्हूँ थासुँ खर्यो छूँ, क अगर थारा धार्मिकता यहूदियां की निम सखाबाळा अर फरिसी नाऊँ की धर्मी सभा की मनख्यां सुँ बढ़'र न्ह होवें, तो थें स्वर्ग का राज्य ज्यां परमेस्वर राज करें छ, ऊ मं कदी भी कोन्ह उळ सकगा।।

## रोस अर हत्या

21 थाँ सुण चुक्या छ क आपणा आगलें-बड़ा सुँ खी गी छी क 'हत्या मत करो अर यदि कोई हत्या करें छ तो ऊ अदालत मं दण्ड का योग्य होगो। 22 पण म्हूँ थासुँ यहा खर्यो छूँ, क ज्ये कोई आपणा भाई-बहन प रोस करगो, ऊ अदालत मं दण्ड का योग्य होवगो अर ज्ये कोई अपणा भाई-बहन न निकम्यो ख'गो वह महासभा मं दण्ड का योग्य होऊगा अर ज्ये कोई अपणा भाई-बहन सुँ ख "अरे मूर्ख" वह नरक की आग क दण्ड का योग्य होऊगा। 23 ई लेखें अगर तू यज्ञ कुण्ड मं भेट चढ़ा रियो छ, अर ऊँठी थाँनं याद आई, क थारा भाई-बहन क मन मं थारा बारां मं कोई बरोध छ। 24 तो थारी भेट न ऊँठी यज्ञ कुण्ड प छोड़ दें अर फेली अपणा भाई-बहन सुँ मेळ-मिलाप करलें। तब आ'र आपणी भेंट न चढ़ा। 25 जद ताँई तू अपणा बेरी क लारां गेला मं ई छ ऊ सुँ बेगा साक मेल मिलाप करलें क अस्यां न्ह होजावें क वो बेरी थनं न्याय करबाळा का हाथा मं सुप दे अर न्याय करबाळो थनं सपायां का हाथा मं सुप दे अर सपायां थनं काळ-कोठड़ी मं पटक्यो जावें। 26 म्हूँ थासुँ साँची खूँ छूँ क ज्याँ ताँई तू कौड़ी कौड़ी भर न्ह दें तब ताँई ऊँठी सुँ छूट न्ह सकेंगो।

## खराब बच्चार

27 थाँ सुण चुक्या छ क आपणा आगलें-बड़ा सुँ खी गी छो क व्यभिचार मत करज्ये 28 पण ज्ये कोई कसी भी बाईर न बुरी नजर सुँ देखें छ। तो ऊ अपणा मन मं ऊ सुँ व्यभिचार कर चुक्यो। 29 ई लेखें अगर थारी जिवणी आँख थनं खोटा-गुनाह करवाव तो उन खाड़ द। क कस्यां थारें लेखें यहा छोखा छ क थारी डील क अंग मं सुँ एक नष्ट हो जावें अर थारी सारी डील नरक मं न्ह पटक दिया जावें। 30 अगर थारो जिवाँ हाथ थनं खोटा-गुनाह करवाव तो उनें काट'र फट्का द। क कस्यां थारें लेखें यहा छोखा छ क थारी डील मं सुँ एक अंग नष्ट हो जावें अर थारी सारी डील नरक मं न्ह पटक दिया जावें।

## तलाक

31 यहा भी खी गी छी, 'ज्ये कोई अपणी लुगाई न छोड़बा छावें तो ऊँक काण कागद मं माण्डया रूप मं तलाक को कागद देर छोड़ सकें। 32 पण म्हूँ थासुँ या खुऊँ छूँ क ज्ये कोई अपणी लुगाई न छोड़बा छावें छ। अगर व्यभिचार क अलावा दूस्रा कारण सुँ छोड़ दे, तो वो उसु व्यभिचार करवावें छ अर ज्ये उ छोड़ी होयी लुहाई सुँ बियाऊ करें वो भी व्यभिचार करें छ। 33 "फेर थे यां भी सुण मल्या छो क पेल्या का जमाना मं मनख्या सुँ खिया छा क तू सोगन मत तोड़ पण परभु सुँ कर्यो होयो बचन(कोल) न पूरा करज्यो। 34 पण म्हूँ थासुँ कर्यो छूँ क कदी भी सोगन मत खाज्यो। सरग की सोगन मत खाज्यो क कस्यां वह परमेस्वर को सिंगासन छ। 35 धरती की सोगन मत खाज्यो क कस्यां परमेस्वर का पांव धरबा की जगह छ। यरूशलेम सहर की सोगन मत खाज्यो वह महाराजा को नगर छ। 36 अपणा माथा की भी सोगन मत खाज्यो



क कस्यां तू थारां एक बाळ न भी धोळो अर कालो न्ह कर सकें छ। 37 अगर तू थारी बात हाँ छावें छ तो केवल 'हाँ' ख अर 'न्ह छावें छ तो केवल 'न्ह' क कस्यां ई सुँ ज्ये कोई जादा होवें छ वह बुराई सुँ होवें छ।

## बदलो मत लिज्ये

38 थां सुणरिया छ ;ख गी छी 'आँख क साटँ आँख अर दाँत क साटँ दाँत।' 39 पण म्हुँ थाँसुँ यहा खयो छुँ क कस्यो भी बराई मनख को भी विरोध मत कर। अगर कोई मनख थाका जिवाँ गाळ प थप्पड़ मारें तो, थें दुसरा गाल न भी उकाड़ी फेर द्यो। 40 कोई थाकें उपर दोष लगाय थांकी कमीज न लेबो छावें तो तु उनेँ थारो कोट भी लेल्याबा दें। 41 अगर ज्ये कोई सपाही ऊका थैला न एक कोस ताँई ले जाबा काण थसुँ जोरी(जबरजस्त) करें, तो तू ऊकें थैला न दो कोस लेर चल जा। 42 ज्ये कोई थाक गोड़यां छ, अगर उनेँ कोई भी था सुँ मांगें तो उ चिज न उक ताँई दे दें। अर ज्ये थासुँ उधार लेबा छावें, ऊ सुँ मत नटो।

## सन्दाई सुँ प्रेम राखो

43 थां सुण मली छ, क खी गी छी क अपणा पड़ोसी सुँ प्रेम राखो अर थारां बेरी सुँ बैर रखाण। 44 पण म्हुँ थाँ सुँ ख रियो छुँ, क अपणा बेरी सुँ भी प्रेम राखो। अर ज्ये थां काण दुःख देवें छ, उका लेख भी पराथना करो। 45 जिसुँ थां थांका सरग मं रहबाळा पिता की ओलाद बण सकें। क कस्यां ऊ भला मनख्यां अर बरां मनख्यां, सारा प सूरज का उजाळा चमकें छ। धर्मियां अर पापियां, सारा प बरखां बरसावें छ। 46 या म्हुँ ई लेखें खु छुँ क अगर तू वासुँ प्रेम करगा ज्ये थासुँ प्रेम करें छ तो थाकेंताँई काँई फल मलगा। काँई अस्यां तो कर वसूल करबाळा भी कोई न्ह कर छ क? 47 अगर तू अपणा भाई -बहन का ही नौवरा करगा तो तू औरों सुँ कस्यो बड़ो काम कर्या छ ? काँई अस्यां तो परमेश्वर प बसवास न्ह करबाळा मनख भी कोई न्ह कर्यो छ क? 48 ई लेखें थें खरा मनख बणो जस्यां थाकें सरग-पिता खरा छ।

## 6

### दान देबो

1 “समझर रिज्यो! परमेश्वर छावें छ, थें मनख्यां क सामें दिखाबा काण अपणा धर्म को काम मत करो न्ह तो थें अपणा परम-पिता सुँ, ज्ये स्वर्ग मं छ, उका प्रतिफळ कोई न्ह पावगा। 2 “ई लेखें जद थां कोई भी दीन-दुःखी काण दान देव तो उका छिण्डोरो मत पिटो, जस्यां क यहूदीयां क भेळा होबाळी सभा क घर मं अर गलियां मं कपटी लोग औरां सुँ आदर पाबा काण करें छ। म्हुँ थासुँ साची खुँ छुँ क वाकें तो यहाँको पूरो फल फहली ही मल चुक्या छ 3 पण जद थें दीन दुःखी काण दान देवें तो थारा काण्डयो हाथ न तोल न्ह पड़ें क थारा जीवां हाथ काँई कर्या छ। 4 ताकी थारो दान छानें रह अर जद थारो सरग पिता ज्ये थनं छानें सेक देखें छ, वह थारें काण फल देवगो।

## प्रार्थना करबो

5 “जद थें प्रार्थना करो तो कपटियां क नाई मत करो। क कस्यां व यहूदीयां क भेळा होबाळी सभा क घर मं अर गळयाँ का कुण्यां मं उबो होर प्रार्थना करबा व्हानें छोखी लागें छ ताकि लोग-दणी वानें देख सकैं। म्हूँ थासुँ साची खु छूँ क वांकें तो उका फल(इनाम) फहली ही मल चुक्या छ । 6 पण जद तु प्रार्थना कर तो अपणा कोटड़ी मं जा'र कुवाण्ड जुड़'र अपणा सरग्य पिता सुँ छानें सेक प्रार्थना करो,ऊ बगत सरग मं रहबाळा थारा परम-पिता ज्ये थनं छानें सेक देखें छ,व्ह थारें काण प्रतिफळ(इनाम) देवगो। 7 प्रार्थना करबा की बगत ओरां ज्ये परबेस्वर न जाणु कोई न्ह,वांक नाई बसावडा मत कर क कस्यां व समझें छ क जादा बोलबा सुँ वांकी सुणी जावगी। 8 ई सुँ थां वांकी नाई मत बणो क कस्यां थांको परम-पिता तू माँगबा क फहली सुँ जाणें छ क थारें काण काई काई छावें छ। 9 सो तू ई प्रकार प्रार्थना करो:

हे सरग मं रहबाळा म्हांका पिता,

थांक नाऊँ पबित्र मान्य जावें

10 जगत मं थांको राज्य आवें

थांकी अच्या जस्यां सरग मं पूरी होवें छ अस्यां ई धरती प भी होवें।

11 म्हांका दन भर की रोटी नथकई म्हां काण दें

12 अर म्हांका पापां न माफ कर,जि प्रकार सुं म्हां उनें माफ करें छ ज्ये म्हांका बरोध्द मं पाप करें छ।

13 म्हांन पाप करबा का लालच मं मत पढ़बा दें

पण बराई सुँ बचा।

क कस्यां राज्य अर बड़ा महान काम अर महिमा सदा थारी ही होती रह'वें।” आमीन।

14 ई लेखें अगर थें मनख्यां का अपराधां न माफ करें तो थांका अपराधां न थाका सरग मं रहबाळा पिता थानें माफ करगो। 15 अगर थें मनख्यां का अपराधां न माफ कोई न्ह करें तो थांका अपराधां न थाका सरग मं रहबाळा पिता भी थांका पाप न माफ कोई न्ह करगो।

## बरत की बात

16 जद थां बरत करें तो कपटियां(ढोंगियाँ) क नाई थांक मुण्डा लटकार बरत मत करज्ये,क कस्यां व अपणा मुण्डा बणायो रखाण छ ताकि लोग-दणी वानें जाणें क ऊ बरत रह रिया छा।म्हूँ थासुँ साची खुँ छूँ वांक तो फेली ही वांको प्रतिफळ पा गया। 17 पण जद थें बरत करें तो आपणा माथा प तेल लगाए अपणा मुण्डा धो दें 18 ताकि लोग-दणी यहा जाणें कोई न्ह क तू बरत रह रिया छा ।पण सरग मं रहबाळा थांरो परम-पिता ज्ये थनं गुपत मं देख रियो छ ऊ थारा बरत जाणेंगो ई सुं थांरा पिता ज्ये गुपत मं देख रियो छ,व्ह थारें काण फल देवगो।

## सरग मं धन की बात

19 थां आपण काण धरती प धन भेळो मत करो ;ज्यां कीडा अर जंग बगाड़ें छ। चोर ध्यान लगाए चोरी कर लेवें छ। 20 पण अपण लेखें सरग मं धन इकट्ठा करो! ज्यां कीडा अर जंग बगाड़ें कोन्ह छ। चोर भी ऊँठी ध्यान लगाए उनें चोरी को न्ह कर लेवें छ। 21 क कस्यां याद राखो जठी थांको धन छ, ऊँठी थांको मन भी लाग्यो रह'गो। 22 ई डील को दीया आँख्याँ छ। ई लेखें अगर थाकी आँख छोखी छ, तो सारो डील उजियाळा मं रेवगा, 23 पण, अगर थारी आँख्याँ बरी हो जाव तो थारो सारो डिल उन्धेरा मं हो जावेंगो। इ कारण वह उजियाला ज्ये थारी भीतर छ अगर अंधकारमय हो जाव तो ऊ उन्धेरा कतनोक भयंकर होवगो। 24 कोई भी मनख एक बगत मं दो मालिकां की सेवा कोई न्ह कर सकें छ । अगर अस्यां करें, तो उ एक सुं नफरत करगो, अर दूसरा सुं प्रेम करगो, या कोई एक का लारां ईमानदार रहवगो, अर दूसरा का लारां बेईमानी करगो। उस्यां ई थें परमेश्वर अर धन की एक लारां सेवा कोई न्ह कर सकें।”

## चंता मत करो

25 ई लेखें म्हाँ थां सुं खरियो छूँ, नथकई अपणा प्राण क लेख चन्ता मत करो, क म्हां कांई खाऊँ? अर कांई पीऊँ?; अर अपणा शरीर की चन्ता मत करो क म्हां कांई पहरंगां? कांई भोजन सुं प्राण अर लत्ता सुं डील मुल्य कोन्ह छ क?। 26 ये आकाश क पड़ियों को देखो। य्हां न्ह बाभा की जुरत छ, अर न्ह काटबा की, अर व भंडारां मं अर कोठा मं अनाज भरबा की जुरत कोई न्ह छ। फेर भी व्हां नें थाका सरग्य पिता खुवावें छ। पण थां तो परमेश्वर काण यह पक्षि-पखेरयां सुं घणा मुल्य कोई न्ह छ क? 27 थां मं सुं अस्यां कुण छ, ज्ये चन्ता करबा सुं अपणी आयु(जीन्दगी) मं एक घड़ी भी बड़ा सकें छ क?। 28 अर लत्ता काण खामी चन्ता क्यो छ ? थां जंगली सोसना का फुल का पौधा का आड़ी ध्यान दियो, क वह कस्यां बड़ा होवें छ, वह तो कोई म्हनत न्ह करें, अर न्ह अपण काण लत्ता बणवाव छ। 29 तो भी म्हाँ थासुं खुँ छूँ क राजा सुलैमान न अपणा सारा राज मं, उ फुलां क नाई का सुन्दर लत्ता कोन्ह पहरिया होया छो 30 ई लेख परमेश्वर अतनी अद्भुत रीति सुं इ चोगान की घास की, ज्ये आज छ अर काल आग मं बाळ दि जावगी, अस्यां लत्ता पहनावें छ, अरे औ कम बस्वास करबाळा, कांई वह थाकें ताई कस्यां ऊ सुं जादा न्ह पहनावगा? 31 ई लेखें थां ई बातां की चन्ता कर'र या न्ह बोलो क म्हाँ कांई खाऊगा अर कांई पीऊगा अर कांई पहरंगा? 32 क कस्यां संसार का लोग-दणी ज्ये परमेश्वर प बस्वास कोई न्ह करें छ, व ई सारा चीजां का पाछें दौड़ रिया छ पण थांको सरग मं रहबाळा पिता तो जाणें ही छ क थांक काण ये सारा चिजां की जुरत छ । 33 पण थां तो सब सुँ फहली परमेश्वर की राज्य अर ऊँकी धर्म की बातां मं मन राखो, तो परमेश्वर थांकी सारी जुरतां न पुरी करगा। 34 सो काल क लेख चन्ता मत करो, क कस्यां काल को दन अपनी चन्ता अपणा आप कर लेगो; आज काण आज को दुख घणो छ ।

## 7

## दोस मत लगावो

1 ओरां प दोष मत लगावो , तो परमेश्वर थापें भी दोष न्ह लगावगा । 2 क कस्यां जि तरें सुं

थां ओरां प दोस लगाव छ,ऊ तरें सुँ परमेस्वर थां प भी दोस लगावगो। अर जि नाप सुं थां नापें छ, (परमेश्वर) उ नाप सुं थाक ताई नापयो जावगो।” 3 तू अपणा भाई बन्दा की आंख्यां मं पड़या तिनका की चिंता खाइमी कर छ , जद थारी खुद की आंख्यां मं लट्टा (लाख्डी)पड़यो छ थनं न्ह सुजरियो क? 4 जद थां अपणी खुद की आंख्यां मं पड़या लट्टा घुस मल्यो छ,तो थारा भाई सुँ कस्यां ख सकें छ, क ‘हे भाई, डट जा, म्हूं थारी आंख्यां मं सुं तिनका न खाढ़ दुयुं ? 5 हे कपटी, फेली अपणी आंख्यां मं सुं लट्टा न खाढ़ लें, फेर तू छोखी तरें सुं देख पावगो। अर तू अपणा भाई क आंख्यां मं पड़या तिनका खाड़ सकें छ। 6 पबित्र चीजां न गण्डगडो काण मत दियो अर सुडां क आगें अपणा मोती मत बखेरो।अस्यां न्ह होज्या क वह मोती न पगां क तणें गुन्द गालें।अर गण्डगडा पलट’र थानें भी फाड़ गालें।

## परमेस्वर सुँ माँगो

7 परमेस्वर सुं मांगतारयो,तो, थांक ताई दिया जावगा,। हेरतां रह,तो थानें पावगा। खटखटाओ,तो थांक लेखें कुवाण्ड एड़या जावगा। 8 क कस्यां ज्ये कोई परमेस्वर सुं माँगतोई रवें छ ऊँक काण मल जावें छ; अर ज्ये कोई हे’र छ,वह पावें छ;अर ज्ये कोई खटखटावें ही रेवें छ,उक लेख कुवाण्ड हेड़ दिया जावें छ । 9 था मं सुं अस्यां कुण पिता होवगो, अगर थाकें बच्चा-बच्ची थां सुं रोटी मांगें तो रोटी क साटें भाटो देगा 10 या फेर जद वो थासुँ मच्छी मांगें तो मच्छी क साटें ऊँकाण सांप देगा? कतेई अस्यां न्ह देगा। 11 सो जद थां बरा होर भी अपणा बेटा-बेटी काण बडिया चिज देबो जाणें छ, तो ऊ सरग मं रहबाळा थांको परम- पिता अपणा मांगबाळा क ताई बडिया चिज कस्यां न्ह देगो। 12 ई लेखें जस्यां क थां छावें छ,क मनख थाकें लारां करें थां भी वांका काण अस्यां ई करो,क कस्यां सास्त्र का निम अर भविष्यबाणी खबाळा की शिझा यहा ई छ।

## सरग अर नरक का गेला

13 सकड़ो कुवाण्ड( बाण्णा) सुँ उळ जावो, क कस्यां चौंडा छ वह कुवाण्ड अर बड़ा छ वह गेला ज्ये नास होबा क आड़ी लेजावें छ। घणा लोग-दणी ज्ये ऊ मं उळें छ। 14 पण कतनो सकड़ो छ वह कुवाण्ड अर सकड़ो छ वह गेला ज्ये जीवन क आड़ी लेजावें छ। अर थोड़ासाक लोग-दणी ज्ये ऊ मं उळें छ।

## जस्यो रूकडो अस्यो फल

15 झुठा भविष्यबाणी खबाळा सुँ समळर रिज्ये!ज्ये गाड़रा का भेस मं थांक गोड़यां आवें छ पण असलित मं वह फाड़’र खाबाळा लाळीयाँ छ। 16 थें वांका कर्म सुँ वानें पहचाण लेवगा। अर कांटादार झाडियां मं अंगूर उगें छ क? या,गोखरु मं अंजीर तोड़ें छ क? 17 ई लेखें छोखा रूखडो छोखा फळ देवगो अर बरो रूखडो बरा फळ देवगो। 18 छोखो फळ देबाळो रूखडो बरा फळ न्ह दे सकें छ, अस्यां बरो फळ देबाळो रूखडो छोखा फळ न्ह दे सकें छ। 19 ज्ये ज्ये रूकडो छोखो फळ न्ह लाव छ,ऊनं काट’र आग मं पटक्यो जावें छ। 20 अर थां वांका फळां सुँ वानें पहचाण लेवगा। 21 ज्ये म्ह सुँ,हे प्रभु,हे प्रभु ख छ,हर एक मनख स्वर्ग का राज्य मं कोई न्ह जा सकेंगा पण ज्ये स्वर्ग मं रहबाळा म्हारा परम पिता की अच्यां प चालें छ, वह ऊ मं उळ

सकेंगा। 22 ऊ न्याय का दन मं घणा लोग-दणी म्हं सुँ ख'गा, प्रभु! हे प्रभु! कांई म्हानें थांका नाऊँ सुँ भविष्यबाणी न्ह खी क ? कांई म्हानें थांका नाऊँ सुँ भुतां न न्ह खाढ़ दिया क अर कांई म्हानें थांका नाऊँ सुँ घणा अचम्भव काम कोई न्ह कर्या छ क ? 23 तब म्हूँ वासुँ साफ-साफ खदिऊँ, क म्हूँ थनँ कदी कोई न्ह जाणु छूँ, हे बरा काम करबाळाओ, थें सारांई म्हं सुँ दूर हो जा।

## बुद्धिमान अर मूर्ख

24 ज्ये कोई म्हार गोड़यां आव छ अर म्हारी बातां न सुण'र व्हानें मानें छ, तो म्हूँ थाकाण बता रियो छूँ क वह किक्कें नाई छ । वह उ मनख क नाई छ, क जिनेँ अपणो घर चुणबा की बगत मं धरति मं गहरी ऊण्डी खोद'र तणें मजबूत भाटा (बछी चट्टान) प नीम भर'र बणायो छ। 25 जद बरखा आई, अर बाढ़ आई, आंधी चालबा लागी, तो उ घर सुं टकराबा लागी, पण उ घर न हला न्ह सक्या; क कस्यां ऊंकी नीम भटा प बण्यो छो । 26 पण ज्ये कोई म्हारी बातां न सुण'र व्हानें न्ह मानें छ, वह उ मूर्ख मनख क नाई छ जिनेँ अपणो घर चुणबा की बगत मं गार प बना नीम भरयां घर चुण्यो। 27 जद बरखा होई, बाढ़ आई तो आंधी चालबा लागी, तो उ घर सुं टकराबा लागी, तो उ घर हाथ्योहात गर पड़यो (ढस्यो) अर उको सत्यानास होग्यो!” 28 जद ईसु या बातां ख चुक्या, तो अस्यां होया क भीड़ उकेँ उपदेश न सुण'र अचम्भव करबा लागी। 29 क कस्यां वह बातां न यहुदियां की निम सखाबाळा क नाई न्ह सखाया पण एक अधिकारी क नाई जिंक गोड़यां घणा अधिकार छ, ऊँक नाई उपदेश दे रियो छो ।

## 8

### ईसु न एक कोढ़ियां मनख छोखो कबो

1 जद ईसु ऊ डूंगर प सुं तणें उतरयो तो एक घणी बडी भीड़ ऊँकेँ पाछें चालबा लागी 2 अर जाखो, ईसु क गोड़यां एक मनख आयो, जिक्केँ कोढ़ होरी छी जद ऊ ईसु न देख'र आगें हाथ जोड़'र घोड़ा टेकर ढोक देर अरज करबा लाग्यो अर खी, ”हे परभू, अगर थां छावें तो म्हनेँ कोढ़ की बिमारी सुँ छोखा कर सकें छ”। 3 तो ईसु न उ कोढ़ियां मनख क आड़ि हाथ बढ़ा'र ऊँ प अड़सर खी' म्हूँ छावें छूँ, क तू कोढ़ की बेमारी सुं छोखो होजावें। अर हात्योहाथ ऊंकी कोढ़ की बेमारी मटगी, अर ऊँ बढिया छोखो मजाको होग्यो। 4 फेर ईसु न उसुं जता'र खी, ”झांक! तू ई बात क बारें मं कोई सुं कांई मत खीज्ये पण याजक क गोड़यां जा'र खुद न दिखाज्ये, अर जस्यां जी बगत फेली परमेस्वर की भविष्यबाणी खबाळा मूसा सुं काईदा मल्या छा अस्यां तू याजक क वाळ परमेस्वर क ताई बली चढ़ादीज्ये, ई सुं सारा मनख जाणें बा लागें जाव, क तु छोखो होग्यो।

### बस्वास की थाकत

5 जद ईसु कफ़रनहूम गाँव मं आया। तो ऊँठी एक रोमी सरकार को एक सेनानायक छो, ऊ ईसु क गोड़यां आ'र ऊसुं अरज करबा लाग्यो। 6 क हे परभू, म्हारा एक नोकर क लक्को मार ग्यो अर ऊ घरां पड़यो छ। अर घणी पीड़ा मं तडप रियो छ ।” 7 ईसु न ऊ सेनानायक सुं खी, म्हूँ आ'र उनेँ छोखा करूँ। 8 सेनानायक न ऊ काण ज्वाब दियो ‘हे प्रभू, म्हारें घरां ताई आबा का

फोड़ा मत पावें, क कस्यां म्हुं ई कै (सम्मान) लायक कोई न्हें, पण खाली एक शब्द ई ख'द , तो म्हारो नोकर(हाळी) छोखो हो जावगो 9 क कस्यां म्हुं भी खुद कोई अधिकारी क नीचें काम करबाळा मनख छुँ अर म्हारें नीचें भी कोई सपाहियां छ (अर महारा सपाहियां प म्हारो भी अधिकार छ।) अगर म्हुँ खाली उनें जाबा काण खुँ, तो व जाव छ;अर आबा काण खुँ, तो व आ'वें छ। अगर म्हुँ अपना नोखरा(हाळी) सुं खु छुँ , 'यहो कर', तो'वह उई करें छ ।” 10 जद ईसु न ये बातां सुणी तो वह घणो अचमभव होया। ज्ये लोग-दणी उकें पाछें आरिया छा, वहांक आड़ी मुड़'र ईसु न खी , “म्हुँ थां सुं साँची खु छुँ क सारा इस्राएल मं भी अस्यां को बस्वास कोई मं भी न्ह देख्या!” 11 म्हुँ थां सुं खरियो छुँ क उगणी दसा अर आथणी दसा सुं घणा लोग-दणी आ'र व भोज मं इब्राहीम, इसाक अर याकूब क लारां स्वर्ग क राज्य मं जिम्बा बठगा (आपण-अपण स्थान ग्रहण करगा)। 12 पण ज्ये परमेस्वर प बस्वास न्ह करगा वह अन्धेरा मं फका दिया जावगा ,ऊँठी रोबो अर दांत चाबो होवगी क कस्यां ऊ पीड़ा क स्थान छ (नरक)। 13 अर ईसु न ऊ सेननायक सुं खी,जस्यां थारो बस्वास छ अस्यां थारें लेखें होवें,अर ऊ सेनानायक को नोकर ऊ घड़ी छोखो होग्यो।

## ईसु न घणा बिमारी मनख छोखो करबो

14 अर जद ईसु पतरस क घराँ आग्या। अर वहाँई पतरस की सासु तेज बुखार सुं बीमार होर खाट प पडि देखी। 15 तो ईसु न ऊ प अपना हाथ सुं अडस्त्यो अर हाथ्योहात उकी बुखार उतर गी। वह उठ'र उबी होगी, अर ईसु अर उका साथिड़ा काण रोटियां तयार करबा लागी । 16 तो उ दन बुड़यां क पाछें ,ऊ जगह का लोग, ज्याकें भूत लागरिया छा, व वानें ऊकें गोड़यां ल्याया। अर खाली आपणा बचन सुं ईसु उ भूतां न खाढ़ेदया।अर ज्ये भी बेमारीयां सुं दुख मं छा , वहां ईसु न छोखा कर दिया। 17 यह इ लेखें होया ताकि परमेश्वर न भविष्यबाणी खबाळा यसाया क वाळ माण्डी होई बातां पूरी होवें: क “उन्ह खुद म्हांकी कमजोरयां न ले ल्या अर म्हांकी बेमारीयां न अपण ऊपर उठा ल्या ” यशायाह 53:4

## चेला बणाबा की मनसा

18 जद ईसु न अपना च्यारूमेर घणी सारी भीड़ देखी तो उनें अपना साथिड़ा काण आज्ञा दी क व झील क फहलाड़ी चल जाज्ये। 19 उ बगत यहुदियां क निम सखाबाळा एक मनख ऊकें गोड़यां आ'र खी,हे गरुजी ज्यांह-ज्यांह तू जावगो म्हुँ थाकें पाछें-पाछें आऊं।” 20 ईसु न वहा सुं खी,सुवाळयां क रह'बा काण पोलां छ अर बादळा मं उढबाळापक्षियां -पखेरु क भी घुसाळां छ पण म्हुँ,मनख को बेटा काण सिर धर'र सोबा काण जगह कोई न्ह छ। 21 अर ऊकें एक चेला न खी,हे परभु,म्हनें जाबा दें क अपना पिताजी न गाड़ दियुं। 22 पण ईसु न उ सुं खी,“तू म्हारो चेलो होजावो” अर आतमा मं पाप क कारण मरया होया मनख्याँ वाकें बिचा मं मरया होया ओरा न गाड़बा द (पण तू जा'र परमेस्वर का राज्य की बात बतावो)

## ईसु न आँधी थाँम दी

23 उ दन मं एक दन जद ईसु एक नाव प जार बठयो, ऊकें साथिड़ा भी ऊकें लारां छां। 24 अर देखो,व झील मं चाल दर्या छा उ बगत मं एक भारी आँधी आई जोर सूं रूछाड़बा

लागी।अर झील मं पाणी हलोळा लेबा लाग्यो अर नाव क पछाड़ा मारबा लाग्यो अर नाव मं पाणी भरबा लाग्यो पण ईसु सुतया छा । 25 तो ऊंका चेला न ऊकें गोड़याँ आर उनेँ जगाया अर जोर सुं हेलोपाड'र खी," हे परभु,म्हांनेँ बचावो, म्हां तो नास होबाळा छां 26 तो ईसु न ऊँ सुँ खी,हे बस्वास मं कमजोर लोग,क थां काँई काण अतना डरप गया? क हाल ताँई थांक बस्वास कोई न्ह क म्हूँ थांनेँ सम्भाळें छूँ? फेर ईसु न उठ'र आंधी अर पाणी न दकाल दी अर च्यारु मेर सान्ति छागी । 27 अर व सारां अचमचबो कर'र एक दूसरा सुं ख'बा लाग्या, अरे, “यो कुण छ? जींकी बात न आंधी अर पाणी बी मान लेवें छ।”

## ईसु न भूतां सुँ छुटकारा करबो

28 फेर ईसु अर ऊंका चेला झील क पार गिरासेनियों का देस मं पुग्या। ईसु जद नाव मं सुँ उतरया तो हाथ्युहात ऊंठी दो मनख मसाणा मं सुँ खड़'र, ईसु क गोड़यां आया जींका भूत लागरीया छा। व अतना भयंकर छा क कोई मनख ऊ गेला सुँ न्ह खड़ सकें छो । 29 अर झाको, उ भूतां न बाहीं पाड़'र खी,"हे परम पिता परमेस्वर को बेटो, थांको म्हां सुं काँई काम छ? काँई तू यहाँई निश्चित समय सुँ फली ही म्हांका दंड देबा काण आया छ क?" 30 अर उ बगत मं ऊंठी थोड़ा सोक दूर मं घणा सारा सूड़ा का झुण्ड चर रहया छो। 31 तो उ भूतां न ईसु सुँ घणी अरज करबा लाग्या," म्हांनेँ ई देस सुँ बाहर मत खाढ़।", “म्हांनेँ थां उ सूड़ा क झुण्ड मं जाबा द्यो क म्हां व्हांक भीतर उळज्यावां।” 32 तो ईसु न खी,जाओ,अर भूतां उ मनख मं सुँ खड़'र ऊ सूड़ा का झुण्ड मं जा'र भीतर उळग्या।व्ह सूड़ा कराड़ क उपर सुँ तणें गुळ-गण्डी खा'र झील मं जा पड़या अर सारा सुड़ा पाणी मं डुब'र मरग्या। 33 वह झुण्ड का गुवाळयां ज्ये सूड़ा न चरारीया छा वानें भाग'र नगर मं जा'र य सारी बातां अर जिका भूत लागरिया छा,ऊका ज्ये काँई होया छा, हाल सुणाया। 34 अर देखो, सारा नगर क लोग-दणी ईसु सुं मलबा काण खड़र आया अर जद वान्ह देख्यो तो साराँई ऊ सुँ अरज करबा लाग्या क “तू य्हां सुँ कठी ओर चल जा।

## 9

## ईसु न एक लकवो रोगी को छोखो करबो

1 फेर ईसु एक नाव प चढ़र झील क पार अपणा नगर मं आ गया। 2 अर ‘झांको’, तो उ बगत मं कोई मनख एक लकको मारीयो बेमार मनख न खाट प उठार ईसु क गोड़यां लाया।ईसु न वांका बस्वास को काम देख'र ईसु न लकवो मारीयो बेमार मनख सुं खी,"हे बेटा,हिम्मत राख,ज्ये पाप थनं कर्या छा । वह पाप माफ होग्या!" 3 तो ई बातां न सुण'र यहूदियां का निम सखाबाळा कोई मनख अपणा -आप मन मं बच्यार करबा लाग्या,"यो मनख अस्यांकी बात खामी ख छ,?यो तो परमेस्वर को सम्मान समझ'र ऊंका अपमान कर्यो छ।खाली परमेस्वर क अलावा मनख्यां का पाप न कुण माफ कर सकें छ?" 4 ईसु न हाथ्योहात अपणा मन मं जाण'र क वांक-वांक मन मं अस्यां काई बच्यार कर रिया छ।अर ईसु न वां सुं खी,थें,थांका मन मं खामी अस्यां का बरा बच्यार कर रिया छ। 5 कोनसी बात ख बो आसान छ?"ई लकवो मारयो बेमार मनख सुँ या खबो क थारा पाप माफ होग्या" यह खणी ,न्हातो “बेटा,उठ,थारी खाट ले'र घरां चाल पड"? 6 पण जि सुँ थें जाणें जावें ,क मनख को बेटो ई धरती प सारा मनख्यां का पाप



न माफ करबा को अधिकार छ। फेर ईसु न उ लकवो मारया बेमार मनख सुं खी। “तु उठ! अर थारी खाट न उठार थारें घरां चल जा”। 7 अर ऊ झट सुं उठार, अपणी खाट लेर घरां चलग्यो 8। यह देखर सारा लोग-दणी डरप गया। व साराई परमेस्वर की महमा करर खबा लाग्या, “ज्यां न मनख्यां काण अस्यो आधिकार दियो छ॥

## ईसु न लेवी चेलो बणाबा काण बलायो

9 फेर इके बाद, जद ईसु नगर सुं बहार जा रिया छ, तो वहांन मत्ती नाऊं का एक मनख न चुंगी लेबाळो चुंगी की चौकी प बठयो देखर ईसु न उ सुं खी, म्हारो पाछें (चेलो) होजावो, ।” तो वह उठर ईसु क पाछें होग्यो। 10 अर मत्ती न अपणा घरां वहांक लेख एक बड़ा भोज दिया, उ भोज मं ऊंठी चुंगी लेबाळा अर ज्यान सारा मनख पापी समझें छ, वहां बी ईसु अर चेला क लारां जिम्बा लाग्या छ। 11 पण फरीसी नाऊं की धार्मीक सभा का मनख न या देखर ईसु का चेला सुं बुझबा लाग्या, क थारा गरूजी चुंगी लेबाळा अर पापी मनख्यां क भेळें खाइमी खावें पीवें छ?। 12 ईसु वहांकी बातां सुणर वहां सुं एक खावत सुं ज्वाब दीयो, क छोखा-भला मनख्यां काण बैध न्ह छाव पण बेमार मनख्यां क ताई छाव छ। 13 ई लेख थें लोग जाओ अर समझ लें क सास्तर मं इ बचन को अर्थ काई छ, ‘महूँ बलिदान कोई न्ह छावें पण दया छाव छूँ।’ क कस्यां, महूँ, ज्ये लोग धर्मी मनख क नाई मन मं सोच (घमण्ड) रखबाळा न बलाबा कोई न्ह आया पण ज्ये लोग मन मं पाप समझ छ वहांको मन बदलबा काण बलाबा आया छूँ।

## ब्रत(उवास) रह'बा को सवाल

14 फेर बत्तीसमा देबाळा यूहन्ना का चेला न ईसु क गोड़यां आर बुझ्या, क म्हाँ अर परीसीयां बार बार बरत रह'रीया छां पण थारा चेला कस्यां बरत न्ह रह'रिया?”। 15 तो ईसु न वा काण ढास्टान सुं ज्वाब द्यो, काई बराती, ज्याताई लाडो वहांका लारां छ व शोक कर सकें छ क?। पण वह दन आवगा, जद लाडो वा सुं न्हाळो हो जावगो ऊ बगत मं व बरत रह'र सोक करगा अर दिखगा क व दुःख मं छ। 16 महूँ थां सुं ओर एक ढास्टान खुँ, कोई बी कस्यां नया लत्ता सुं पराणा लत्ता प बारो बन्द करबा क ताई न्ह सीऊंगा। अगर व अस्यां करें तो ये नया लत्ता थोबा क बाद मं समट जावगा अर पूरो लत्तो फाटजाऊगो अर पहलीयां का बारो सुं ज्यादा बारो पड़जाऊगो। 17 अस्यां कोई बी नया अंगूर का रस न पराणा चामडा का बणियां दीऊडो मं कोई न्ह भर्यो जावें। अगर व अस्यां करें तो अंगूर को रस जद पराणा चामडा को बणियां दीऊडो फूलजाऊगो तब उ अंगूर को रस दीऊडा क पोल पाड़'र तणें ढुळ जावेंगो, अर दीऊडो अर अंगूर को रस दोनी नष्ट हो जाऊगा। ई सुं नया अंगूर को रस नया चामडा का दीऊडा मं भर्यो जाणी छावें छ।

## ईसु न मरी छोरी जिन्दा करबो

18 ईसु न ऊ लोग दणीयां काण जद ये बातां बता रियो छो, तब यहुदियां की भेळी होबाळी सभा क घर को एक मुख्यो(खास) मनख ऊँकें गोड़यां आयो, अर ऊ ईसु का पगा मं पड़'र अरज कर'र बोल्यो, “क म्हारी छोरी अबार मरी छी! पण अगर थां आर थांको हाथ म्हारी छोरी प धर द तो व्हा पाछें जीवती होजावगी। 19 तो ईसु उठर अपणा चेला क लारां ऊँक पाछें



हो लिया। 20 अर झांको,ऊँठी एक लुगाई छी जिक बाराह साल सून खुन बहबा की बीमारी छी।व्हा ईसु क पाछें सून आई अर ऊँका लत्ता क आंचल न अड़सगी 21 क कस्यां वह मन मं खी छी,अगर म्हुँ खाली ऊँका लत्ता क अड़स जाऊँ तो म्हुँ छोखी हो जाऊँ। 2 अर ईसु न पाछ मुड़'र व्हा देख्ती होर खी,हे बेटी” हिम्मत राख;क थारा बस्वास न तु छोखी करी छ,अर वह लुगाई हाथ्योहात ऊ घड़ी मं छोखी होगी। 23 जद ईसु ऊ यहुदियां की भेळी होबाळी सभा क घर को मुख्यो(खास) मनख याईर क घरां पुगगया तो उनें बांसुरी बजाबाळा अर लोग-दणीयां बसावड़ा करतो देखी। 24 तो ईसु न ऊँठी का मनख्यां सून खी,अठी सुँ बाहर खढ़ जा। छोरी तो मरी कोई न्ह पण सूती छ। पण जद व या बातां न सुण'र लोग ऊँकी मजाक उडार हाँसबा लाग्या। 25 पण जद भीड़ न घर क बारह खाड दिया गया तो ईसु न मँलाड़ी जि मं छोरी की लास पडी छी,ऊँठी जा'र छोरी को हाँथ पकडयो ,तो व्हा जी ऊठी ।” 26 अर ई बात ऊँठी सारा इलाका मं फैलगयो।

## ईसु न दो आंधा को छोखा करबो

27 जद ईसु ऊँठी सुँ जाबा लाग्या तो दो आंधा मनख ऊँकें पाछें य्हा पुकारते होयो आ रिया छा,क हे राजा दाऊद की सन्तान म्हां प दया कर 28 जद ईसु घर क मँलाड़ी पुगगया तो वह दो आंधा ईसु क गोड़यां आया अर ईसु न वांसुँ खी”काँई थांक बस्वास छ क,थांक ताँई फेर म्हुँ आंख्याँ दे सकुँ छूँ?वानें ज्वाब दिया;हां परभु!”

29 तब ईसु न व्हांकी आंख्यां प हाथ अड़सार खी,थांका बस्वास क अनुसार थांकताँई होव। 30 अर व्हांकी आंख्यां खुल गी अर ईसु न वांसुँ जतार खी;समळर रह' काँई ई बात क बारां मं कोई न्ह जाणें। 31 पण वानें ऊँठी सुँ जा'र ई समसार को ऊ इलाका मं च्यारां और फैलादि।

## ईसु न काल्ला मनख को छोखो करबो

32 जद ईसु अर ऊँका साथीड़ा ऊँठी सुँ जा रिया छा, तो झांको,लोग दणी एक काल्ला(गुंगा) मनख न जिकें गन्दीसक्ती लागरी छी,उनें ईसु क गोड़यां लाया। 33 जद ईसु न गन्दीसक्ती खाड़ दीयो गयो तो वह काल्ला मनख,ज्ये फेली काँई भी न्ह बोल सकू छो,अबाणु बोलबा लाग्यो।ई सुँ सारी भीड़ क लोग-दणी न अचम्बो होर खी, “इस्राएल मं अस्यो काम फेली कदी भी न्ह देख्यो ।” 34 पण फरीसी न खी,”यो तो गन्दीसक्ती का सरदार की सहायता सुँ गन्दीसक्ती न खाड़ें छ।

## महन्तीयां की जुरत

35 अर ईसु सारा नगरां अर गांवडा मं फरतो रियो अर यहुदियां की भेळी होबाळी सभा क घर मं परमेस्वर को राज्य की छोखी खबर बताव छो अर हर तरें की बेमारीयां अर कमजोरीयां न मनख्यां मं सुँ दूर कर छो। 36 जद ईसु न भीड़ देखी तो वानें लोग-दणीयां प दया आई,क कस्यां व ऊ गाडरा क नाई छा ज्यांको कोई चराबाळा गुवाळयां कोई न्ह छो,व्याकुल अर भटका हुया छा। 37 तब ईसु न अपणा चेला सुँ खी,” फसल तो घणी पाक्की छ पण काट बाळा कम छ। 38 इ सुं खेत का धणी परभु सुं अरज करो क वह अपणी फसल काटबा काण महनथीयां खन्ना दें।

## 10

### ईसु को बाराह चेला चुण्बो

1 फेर ईसु न अपणा बारह चेला अपणा गोड़यां बलाया,अर वांकाण गन्दीसक्ती न मनख्यां मं सुं बाहर खाढ़बा काण अर हर तरह की बिमारी सुं मनख्यां न छोखा करबा काण अर कमजोरियां न दूर करबा काण अधिकार दिया। 2 वह बारह चेला का नाऊं अस्यां छां, पहलो समोन जिको नाऊं पतरस कहलाव छ, अर उको भाई अन्दर्यास अर जबदि का बेटा याकूब अर ऊका भाई यूहन्ना 3 अर फिलीप्पुस अर बरतूलमै, अर थोमा अर महसुल लेबाळा मत्ती अर हलफई को बेटा याकूब अर तधे 4 अर समोन (जेलोतेस ख'व छ) अर यहूदा इसकरियोती, जीन ईसु पकड़वावाया छ। 5 ईसु न ये बारह चेला काण या आज्ञा देर खन्नाया," "गैर यहूदियों का इलाका मं मत जाओ अर कोई भी सामरी नगर मं मत जाज्ये । 6 पण इस्राएल का घराना की गमी होई गाड़रा क गोड़यां जा ज्ये। 7 अर चालता-चालता यो प्रचार करो,"सरग को राज गोड़याँ आग्या छ"। 8 बेमारां न चंगा करो,मर्या होया न जीवता करो,कोढ़ियां न छोखो करो,गन्दीसक्ती न खाड़ो थांन परमेस्वर सुं ये अधिकार सीतमात मल्यो छ तो सीतमात दियो। 9 अपणा बटवा मं सोना,चाँदी अर ताँबा मत रखाणो। 10 थां गेला क काण न्ह झोळी, न्ह दुस्त्रा लत्ता,न्ह मुडा अर लाठी मत राखो क कस्यां महन्थियां क ताँई ऊकी रोटी मलणी छावें छ" 11 ज्ये कोई नगर अर गाँव मं थां जावें, तो तोल पाडो क वहांई परमेसवर की छोखी खबर न सुणबा क लायक कुण छ।तब ताँई ऊंठी ठहरें तो ज्यां ताँई थां वहाँ सुं बदा न्ह होज्यो । 12 जद थें कोई क घर-बार मं उळें तो परिवार का लोगां क ताँई पहली शान्ती का आसीस दें। 13 अगर ऊ घर का मनख लायक होवतो थाका आसिस वांका लारां लाराँ रहवगा अर अगर ऊ घर का मनख लायक कोई न्ह होवतो थाका आसिस थांक गोड़यां पाछें आजावगो। 14 अगर कोई मनख थांका न्होरा न्ह करें छ अर थांकी बातां न न्ह सुणें छ तो जद थां ऊ घर अर ऊ सहर न छोड़र जावें तो थांक पांव की धूळ बी ऊंठी सुं झाड़ लीज्यो। 15 म्हूं थां सुं साची खुं छूं क परमेस्वर का न्याय क दन मं सदोम जो दुष्ट नगर छो ,ऊ सदोम का खराब मनख्या सुं ई नगर का मनख ज्यादा दण्ड पावगा।

### आबाळो संकट

16 समळर रीज्ये,म्हूं थानें अस्यां ही बाहरें खन्नारीया छूं,जस्यां गाड़रा न लाळीयां का बीचा मं म्हूं थानें खन्नाऊं,ई सुं साँपां क नाई चतुर अर कबुतरां क नाई भोळा बणो। 17 पण लोगां सुं समळर रीज्ये,क कस्यां थानें बंदी बणा'र यहूदीयां की धर्म सभा मं सुपेंगा अर व थानें अपणा भेळी होबाळी सभा क घर की कोठडी मं कोड़ा सुं कुठेंगा। 18 व थानें म्हारा चेला होबा क कारण राजा अर हाकीम क आग्ह खड़ा कर दिया जावगा जिसूं थां म्हारा बारा मं वहाँक आग्ह अर अबस्वासीयां क लेखें ग्वाई बता सकें । 19 अर जद व थानें पकड़वाएगा तो थां ईक लेख अपणा मन मं चिन्ता मत करज्यो क महान कसी रीती सुं:या म्हां काँई बोलां? पण उ बगत मं बोलबा काण परमेस्वर थाक ताँई सही बात बता दियो जावगो। 20 क कस्यां बताबाळा थां कोई न्ह पण थांका परम पीता की आतमा थां सुं बोलगी। 21 अर ज्ये बडो भाई बना बस्वासी छ व्हो अपणा बस्वासी भाई न मारगालबा काण पकड़वादेगा,अस्यां ही बाप अपणा छोरा-

छोरीयां न मारगालबा काण पकड़वादेगा अर छोरा-छोरीयां अपणा माई-बाप क खिलाफ हो'र वानें मरवागालेंगा। 22 अर सारा मनख थां सँ बैर राखगा क कस्यां थां म्हारा नाऊं प बस्वास करबा क कारण पण ज्ये मनख अपणा जीवन होबा ताँई धीरप धरे रहगा,व्हानें परमेश्वर बचाऊगा। 23 जद थानें एक नगर मं सताव तो दूस्रा मं भाग जावें।म्हूँ थासुँ साची खुँ छूँ,क थें इस्राएल देस का सारा नगरां मं चक्कर पूरा कोई न्ह करगा,ऊ सुँ फेली मनख को बेटो दुबारा आ जावगो। 24 चेला अपणा गरू सुँ बड़ा कोई न्ह; अर हाळी अपणा धणी सुँ बड़ा कोई न्ह होव। 25 चेला न अपणा गरू क बराबर अर हाळी अपणा धणी क बराबर होबा मं ही सबर रखाणी चायजे। जद वानें घर का धणी न बालजबुल ख तो ऊँका घर का मनख्यां सुँ और भी बरा व्यवहार खामी न्ह करगा?!

## कु सुँ डरपां

26 ई लेखें वासुँ मत डरपो क कस्यां व्हा बगत आरी छ जद सारी छपी होई बातां न खोल'र बताई जावगी; अर ज्ये कोई गुप्त मं छ उन लोगां का सामें बताई जावगी। 27 अर ज्ये कोई बातां थांनं उन्धेरा मं खी छ , वह उजाळा मं सुणाई जावगी, अर ज्ये कोई बातां थांनं कमरा मं जुडया कुवाण्ड क पाछें छानमुन कोई का कान मं खी छ, वह बातां न छत प उबो हो'र ऊँची आवाज सुँ सुणाई जावगी , ताकि सारा लोग-दणी उनें सुण सकां! 28 व्हा सुँ मत डरपो ज्ये थांका डील न मार सकें छ । व खाली थांका डील न मार सकें छ;पण थाकी आतमा न नास न्ह कर सकें। ज्ये थारा डील अर थारा आतमा न नरक मं पटकर नास कर सकें छ ,सिरफ ऊ सुँ (परमेश्वर सुँ) डरो। 29 “काई एक पीसा मं दो चड़ियां न्ह बकें छ क? फेर भी थांका पीता की अच्छया क बना वामं सुँ एक भी जमीन पें न्ह गर सकें छ। 30 अर थांका माथा का एक एक बाळ भी गण्या होया छ । 31 ई लेखें डरप मत; क कस्यां थां परमेश्वर की नजर मं चड़ियां का पूरा झुण्ड सुँ ज्यादा मुल्यवान छ।

## ईसु प बस्वास

32 ज्ये कोई मनख म्हनें लोग-दणीयां क सामें मान लेगो तो म्हूँ,मनख को बेटा भी म्हारो सरग्य पीता का सामें मान लेऊँ। 33 पण ज्ये कोई मनख म्हनें लोग-दणीयां क सामें नटगां ,तो म्हूँ,मनख को बेटा भी म्हारो सरग्य पीता का सामें नटुँ।

## ईसु क लारां असहमति

34 काई थें या मत सोचें क म्हूँ ई दुनिया प मल-जुलर शान्ती देबा काण आया छूँ। म्हूँ,मल-जुलर शान्ती देबा काण न्ह आया पण तलवार चलवाबा (न्हाळा-न्हाळा करबा) काण आया छूँ। 35 म्हूँ या करबा काण आया छूँ: बेटा ,पिता का बरोध मं, अर बेटी, माँ का बरोध मं, अर बहू, सास का बरोध मं हो जावगी 36 मनख्यां का बेरी ,ऊँका अपणा घर का लोग ही रह छ । 37 अगर ज्ये कोई म्ह सुँ साऊटो अपणा माँई- बाप सुँ प्रेम करें छ,वह म्हारा चेला बणाबा का लायक कोई न्ह ।अर ज्ये कोई अपणा छोरा-छोरीया क म्ह सुँ ज्यादा प्रेम करें छ,वह म्हारा चेला बणाबा का लायक कोई न्ह । 38 अगर ज्ये कोई अपणो क्रूस उठा'र म्हारें पाछें कोई न्ह चालें,वह भी म्हारो चेलो कोई न्ह हो सकें छ। 39 अर ज्ये कोई मनख अपणी जान(ज्यान) न बचाबो छावगो, ऊ

कदी भी खतम न्ह होबाळा जिवन (अमर जीवन) न गमा देगा अर ज्ये कोई म्हार काण अपणा जिवन देबा काण तयार होवगा,उन्न कदी भी खतम न्ह होबाळा जिवन(अमर जीवन) मलंगा।

## इनाम

40 “ज्ये कोई थाने अपणाव छ ,तो ऊ म्हने बी अपणाव छ अर ज्ये कोई म्हने अपणाव छ ,वह म्हने यहां (दुनिया) खन्नाबाळा न अपणाव छ।” 41 ज्ये कोई भविष्यबाणी खबाळा न ई लेखे अपनाव छ क वह भविष्यबाणी खाबाळा छ,ऊका वह प्रतिफळ मलगा ज्ये भविष्यबाणी खबाळा काण मल्ल छ।अगर थे ज्ये कोई भला मनख न ई लेखे नोवरा करे छ,क वह भला मनख छ,ऊक ताई सचमुच ऊई प्रतीफळ मलगा,ज्ये कोई भला मनख्यां काण मल्बा छावे छ । 42 अगर ज्ये कोई ई छोटा मं सुँ एक न म्हारा चेला जाणेर खाली एक लोटयो ठंडा पाणी पुवाव तो म्हूँ थां सुँ साँची साँची खुँ क व्हांको फळ कस्सी बी रीत सुँ न्ह खोवगा,परमेस्वर व्हांक काण फळ जरूर देवगा।

## 11

### ईसु अर बत्तिसमा देबाळो यूहन्ना

1 जद ईसु अपणा बारह चेला काण या आज्ञा दियां पाछे ईसु ऊठी सुँ चाल पड़या अर गलील प्रदेश का नगरां मं उपदेश अर परमेस्वर की छोखी खबर को प्रचार करबा लागया। 2 बत्तिसमा देबाळा यूहन्ना न कोठडी मं मसीह का ये कामां का बारां मं सुण्या तो अपण चेला ऊ सुँ या बुड़बा खन्नाया। 3 ,क”काई थां मसीह छ जिंकी म्हां बाट-नाळरिया छां या फेर ओर कोई दूसरां की बाट-नाळां? 4 फेर ईसु न जुवाब दिया,क यूहन्ना क गोड़यां पाछा जावो अर ज्ये काई थांने देख्यो अर सुण्यो छ, वो सारा ऊंकाण बतावो 5 क आन्धा देखबा लाग्या,लंगडा चालबा फरबा लाग्या,अर कोढ़ियां छोखा कर्या जावे छ,अर बहरे सुणबा लाग्या छ,मरया जिनदा हो जावे छ,अर कंगालां काण परमेस्वर की छोखी खबर सुणाई जावे छ।” 6 अर व्हा सुं य्हा भी खी,भलो छ उ मनख ज्ये म्हप बस्वास रखाणबा काण ठोकर न्ह खावे”। 7 जद बत्तिसमा देबाळो यूहन्ना का चेला ईसु क गोड़यां सुं चलग्या,तो ईसु बत्तिसमा देबाळो यूहन्ना क बारां मं लोग-दणीयां सुं खबा लाग्यो,थां सुणसान जगह मं काँई देखबा ग्या छा? काँई थांने ऊठी एक पट्टेरिया क नाँई को कमजोर मनख देख्यो छ क?, ज्ये बाळ क हर झोका मं हालतो रह छ 8 फेर थे काँई देखबा ग्या छा?काँई घणा छोखा लत्ता फहरयां कोई मनख न देखबा ग्या छा क? न्ह,क कस्यां ज्ये घणा छोखा लत्ता फहरें छ अर सुख भोग सुं रह’व छ ,वह राज महलां मं रह’वें छ। 9 तो फेर काँई देखबा ग्या छा?काँई थां कोई भविष्यबाणी खबाळा न देखबा ग्या छा क?हां,म्हूँ थां सुं खरियो छूँ, वह(यूहन्ना) भविष्यबाणी खबाळा सुं भी बड़ो छ। 10 बत्तिसमा देबाळो यूहन्ना व्ही छ जिंका बारां मं पबित्र सास्त्र मं मण्डि छ: “झांक,म्हूँ ,म्हारा खबरी न थारें फेली खन्नारियो छूँ , क कस्यां ऊ थारें आगे जा’र ,थां आबा काण मनख्यां क मन न तयार करंगे” 11 म्हूँ थां सुं साँची खरियो छूँ क हाल ताँई कसी भी बाईर सुं जन्मया होया मं सुं यूहन्ना सुं महान् कोई भी कोई न्ह छ। पण फेर भी सरग का राज्य मं छोटा सुं छोटा मनख भी उ सुं बड़ो छ ।” 12 यूहन्ना

बत्तिस्मा देबाळा क दन सुँ लेर अबार ताँई सरग का राज्य प जोर होता रिया छ,अर बलवान मनख वाने छीन लेवें छ। 13 युहन्ना क आबा क पहली सारा भविष्यबष्वाणी खबाळा अर मुसा की निम सखाबाळा भविष्यबाणी करता रिया। 14 अगर थां ई बात न मानबो छाव तो मानल्यो क एलिय्याह ज्ये आबाळा छ,वह युहन्ना छ। 15 जीक सुणबा का कान छ,वह सुण ले।

16 ईसु न फेर बुझी,महूँ ई जुग का मनखयां की तुलना किसुँ करूं? क कस्यां व उ बाळका क नाई छ ज्ये बजारां मं बठया होया एक दूसरा सुँ ख छ, 17 क म्हांन थांकाण बांसुरी बजाई पण थां नाच्या कोई न्ह अर म्हांन थांकाण शोक-गीत गाया पण थां रोया कोई न्ह। 18 क कस्यां बत्तिसमा देबाळा यूहन्ना न औरा क नाई न्ह खाया अर औरा क नाई अंगुर को रस न्ह पीया, पण थां खरिया छ,क उ मं गन्दीसक्ति छ। 19 फेर महूँ,मनख को बेटा ज्ये सरग सुँ आया, ओरां क नाई खावें-पीवें छूँ,तो थां खरिया छ,क ई मनख न देखो ,यो पेटू छ अर पियक्कुड छ,अर यो चुंगी लेबाळा अर पापीयां को भाइलो छ पण ज्ये परमेस्वर का ज्ञान क पाछे चाले छ व्हांका जीवना क दुवारा ज्ञान साझो ठहरायो जावें छ।

## बस्वास न्ह करबाळा काण ईसु की चेतावनी

20 फेर ईसु न ऊ नगरां काण दुतकारयो देबा लाग्यो, ज्यामं वाने घणा सारां अचमभव काम कर्या छ क कस्यां वाने पाप सुँ मन न्ह बदल्या। 21 हाय !खुराजीन का लोगांओ! हाय बैतसैदा का लोगांओ! कस्यो संकट थार काण बाट-नाळरियो छ क कस्यां ज्ये चमतकार का काम म्हनें था मं कर्या छ,अगर म्हूँ उई चमतकारां न सूर अर सैदा जस्यां खराब नगर मं करतो , तो उ नगरां का लोग-दणी बोरियां सुं बण्या लत्ता फहर'र अपणा डील प बानी लपेटर कदेक को ई पाप सुं परमेस्वर क आड़ी मन बदल्यो होतो। 22 हां, परमेस्वर का न्याय क दन मं सुर अर सैदा नगरां की दण्ड सुँ थारा दण्ड ज्यादा पावगा। 23 अर थां कफरनहूम क लोग-दणीयांओ,काई थाने सरग ताँई ऊंचा उठाया जावगा? न्ह,थां तो नीचे नरक मं उतारया जावगा।क कस्यां ज्ये अचम्बा काम थ सुँ कर्या गया छ, अगर वह सदोम नगर ज्ये परमेस्वर न पाप क कारण नास करदिया,ऊ नगर मं करतो तो,ऊ आज ताँई बण्या रहता। 24 म्हूँ थां सुं खरियो छूँ क परमेस्वर का न्याय क दन मं सदोम ज्ये दुष्ट नगर छो ,ऊ सदोम का खराब मनख्या सुँ ई नगर का मनख ज्यादा दण्ड पावगा।

## ईसु की परम पिता सुं पराथना

25 उ घड़ी ईसु न ख'बा लाग्या," हे पिता,सरग अर धरती का परभु,महूँ थांक ताँई धन्यबाद कर्यो छूँ,क थाने वह लोग-दणीयां सुं यहा साचीयाई को छपा राख्या ज्ये अपणा-आप न ज्ञानि अर बुद्धिमान समझें छ,अर ज्ये बाळकां क नाई छ व्हांका ये बातां बताई: 26 हां, हे सरग्य पिता,थाने अस्यां ही करबो छोको लाग्यो। 27 फेर ईसु न अपणा चेला सुं खी,म्हारा पिता न म्हारें काण सारा सुपा दिया छ अर वास्तव मं (परमेस्वर के) पुत्र न (म्हनें) कोई न्ह जाणें पुत्र कुण छ,खाली पिता ही जाणें छ अर पिता न (परमेस्वर) कोई न्ह जाणें,खाली पुत्र ही जाणें छ अर वह लोग भी ज्यां प पिता परमेस्वर न प्रगट करबा काण पुत्र छाव छ।" 28 "हे थाकयो होया अर बोझ सुँ दब्या होया लोगां,म्हारें गोड़यां आजावो,महूँ थांक ताँई सुख चैन दियुं। 29 म्हार जुआ न अपणा ऊपर उठाल्यो अर म्ह सुँ सीखो क कस्यां म्हूँ नम्र छूँ अर म्हारा मन कोमल(भोळा-भळा)

छ।अर थानें भी अपणा लेख सुख -सान्ती मलगा। 30 क कस्या वह जुआ ज्ये म्हूँ थाकाण दे रिये छूँ ऊ सिधो छ। अर वह बोझ ज्ये म्हूँ था प पटक रियो छूँ,ऊ फोरो छ ।

## 12

### ईसु न आराम हाळो दन को भी परभु छ

1 फेर उ बगत यहुदियां का आराम हाळो दन मं ईसु अर ऊंका चेला अनाज का खेत मं होर जारीया छ।ऊंका चेला क भुख लागी तो व धंगीयां तोड़'र खाबा लाग्या। 2 पण कोई परीसि मनखयां न देख्या क ईसु का चेला काँई करया छ।तो परीसि मनखयां न खी,,देख,थां य्हो काम काँई काण आज करया छ?, आराम हाळो दन का निम क अनुसार य्हो काम (फसल काटबो) करबा उचित कोई न्ह।” 3 फेर ईसु न वां काण ज्वाब दियो ,क काँई थां न कदी बी पबित्र सास्त्र मं यहा न्ह पढ़ी छी क राजा दाऊद न घणा साल फेली काँई करी छी? जद राजा दाऊद अर ऊंका साथीडा भुखा छ। 4 दाऊद न परमेस्वर का मन्दर मं जा'र ज्ये परमेस्वर का नाऊं सुँ दान की रोटीयां चढ़ा मल्ली छी।व्ह रोटीयां खाई,व्ह दान की रोटीयां याजकां न छोड़'र कोई काण बी खाबा को निम कोई न्ह छो।पण राजा दाऊद न वह रोटीयां खाई अर ऊंक साथीडा काण बी दी,तो परमेस्वर न उ काम काण वां नें अपराधी न्ह समझीया” 5 या पबित्र सास्त्र मं यहा न्ह पढ़ी छी क याजक आराम हाळो दन मन्दर मं आराम हाळो दन का निम न तोड़बा प भी निर्दोष ठहरें छ। 6 पण म्हूँ थासुँ खरियो छूँ,अठी ऊ छ ज्ये मन्दर सुँ भी बड़ा छ। 7 अगर थें समझ लें क पबित्र सास्त्र मं इ बचन को अर्थ काँई छ , ‘म्हूँ बलिदान कोई न्ह छावें पण दया छाव छूँ।’ तो थें निर्दोस क दोषी कोई न्ह ठहराता। । 8 फेर ईसु न वां सुं खी,म्हूँ, मनख को बेटा आराम हाळो दन को भी परभु छूँ

### आराम हाळो दन मं ईसु का चमतकार

9 फेर ऊंठी सुँ खड़र ईसु यहूदीयां की भेळी होबाळी सभा क घर मं गया। 10 तो ऊंठी एक मनख छो जींको एक हाथ सुखर्यो छो अर ऊंठी कोई परीसि मनख ईसु प दोस लगाबा काण ऊ सुँ बुझी,क आराम हाळो दन मं कोई क चंगा करबा यहुदियां क आराम हाळो दन का निम क अनुसार उचित छ क? 11 ईसु न वाकाण ज्वाब दिया, “मानो,थां मं सुँ कोई क गोड़यां एक ही गाड़ो छ,अर वह गाड़ो आराम हाळो दन मं कोई खाड़ा मं गर पड़ें तो, काँई थें उनें पकड़'र बाहर कोई न्ह खाड़गा क? 12 फेर मनख तो एक गाड़ो सुँ घणो अन-मोल छ।ई लेखें,आराम हाळो दन मं भलाई करबा काण “परमेस्वर का दास मुसा का निम मं अनुमति दिया छ।” तो ईसु न ऊ सुखा हाथाळा मनख सुं खी, “थारो हाथ न आगें कर”। 13 अर ऊ हाथ न आगें कर्यो अर ऊंको हाथ दूस्रा हाथ क नाई एक दम छोखो होग्यो। 14 ई काम न देख'र फरीसी मनख यहूदीयां की भेळा होबाळी सभा क घर न छोड़'र बाहर जा'र ईसु क बरोध मं सल्लहा कर'र जुगाड़ बणाबा लाग्या,क कसी तरें सुँ ईसु न मार गालां।

### परमेस्वर का चुण्या होया सेवक

15 या जाण'र ईसु ऊंठी सुँ खड़ग्या।अर घणा लोग-दणी ईसु क पाछें होग्या अर वानें सारा बेमार

मनख छोखा कर्या। 16 अर वानें जताया, क ऊका बारां में लोगां सुँ काँई भी मत खीज्ये। 17 क ज्ये बात परमेस्वर न घणा साल फहली अपणा भवीष्यबाणी खबाळा यसाया क वाळ खी ग्यो छो, वह पूरी होवें: 18 “देखो, या म्हारा सेवक छ। ज्ये म्हनेँ थरप्यो छ। या म्हारा लाडलो छ, जी सुँ म्हारो मन राजी खुशी छ। म्हुँ ऊपेँ अपणी आतमा राखुँ अर सारा देस का सारा लोगां को न्याय की घोषणा करगा। 19 यह कदी भी न्ह चीखेगा अर न्ह झगड़ेगा अर बाजारां में कोई ऊका बाहीं पाड़या कोई न्ह सुणगा। 20 या झुका होया पटोरिया न्ह तोड़गो या दमदमाती चमनी न कोई न्ह बझावगा जद ताँई न्याय क बिजय न्ह होवें। 21 धरती का सारी ज्याती का लोग-दणी ऊका नाम प आशा राखगा

## ईसु में परमेश्वर की शक्ति

22 फेर एक दन कोई लोग एक आंधा-काल्ला न जिंकें भूत लागरियो छो वानें ईसु क गोड़यां लाया अर ऊ मनख में सुँ भूत खाड़'र उ छोखो कर्यो, ई लेखें उ बोलबा अर देखबा लाग्यो। 23 यहा देख'र सारा लोग-दणी सोच में पड़र खबा लाग्या, “काँई यो मनख दाऊद की सन्तान का हो सकें छ क?” 24 पण फरीसियां न यह सुण'र खी, यह तो बैल्ज़ाबुल नाऊँ की गंदी सक्ती का सरदार की मदद सुँ गन्दी सक्ती न खाड़ छ। 25 पण ईसु न व्हांका मन की बात जाण ली अर वां सुँ खी, अगर कोई राज पाट में फूट पड़ज्या तो ऊ राज पाट उजड़ जाव छ। अगर कोई नगर अर घर का मनख्यां में फुट पड़ जावें तो ऊ नगर अर कुठम भी बण्यो न्ह रहवगो। 26 अगर सेतान, सेतान न खाढ़ह तो ऊ अपणा ही बरोधी होग्यो छ। फेर ऊका राज्य कस्यां बण्यो रहगो। 27 भला, अगर म्हुँ बैल्ज़ाबुल की मदद (सक्ति) सुँ गन्दि सक्ति न खाड़ें छूँ, तो थारें खुद की सनतान कुकी मदद सुँ गन्दीसक्ती न खाड़ें छ? व भी तो गन्दीसक्ती न खाड़ें छ, तो थां ज्ये खी छ, उ कारण व थाकें न्याय करगा 28 पण अगर म्हुँ परमेस्वर की सक्ती सुँ गन्दी सक्ति न खाड़ें छूँ, तो परमेस्वर को राज्य थांक गोड़यां आ पुग्यो छ। 29 फेर ज्ये कोई मनख कोई तगड़ो मनख का घर - बारा न लूटबो छावें तो सब सुँ पहली उ तगड़ो मनख बाँधणो पड़ेंगो। जिंकें बाद में ही ऊका घर- बार लूठया जा सकें छ। 30 ज्ये कोई म्हारें लारां कोई न्ह छ, वह म्हारा बरोध में छ, अर ज्ये कोई म्हारें लारां काम न्ह कर छ, वह वास्तव में म्हारें बरोध में काम करें छ। 31 ई लेख म्हुँ थां सुँ खुँ छूँ, क मनख्यां का सारा पाप अर अगर ज्ये कोई अपमानी बातां परमेस्वर क बारां में ख'व तो, व्हांन बी परमेस्वर माफ कर सकें छ। पण जद कोई मनख पबित्र आतमा क बरोध में बदनामी करें तो वह पाप ऊका कदी बी माफ न्ह हो सकें छ। 32 ज्ये कोई मनख का बेटा का बरोध में कोई बात ख'गो, ऊको यो अपराध माफ कर्यो जावगो पण जद कोई मनख पबित्र आतमा क बरोध में बदनामी करें तो वह पाप ऊका कदी बी माफ न्ह हो सकें छ। अस्यां को पाप करें तो ऊका पाप न ई जुग में अर अबाळा जुग(परलोक) में माफ कोई न्ह हो जावगा।

## रुखड़ो अर उको फळ

33। अगर रुखड़ो न छोखो खो, तो ऊका फळ न भी छोखो खो; या रुखड़ो न बरो खो; तो ऊका फळ न भी बरो खो। क कस्यां रुखड़ो अपणा फळ सुँ ई पचाण्यो जावें छ। 34 “हे जेरिला सांप का बच्चावो! थें बरा होर कस्यां छोखी ख सकें छो? क कस्यां ज्ये काँई थारा मन में भरयो होयो छ उई थारा मुण्डा प आव छ। 35 भला मनख का भला मन सुँ भली बातां ही खढ़ें छ, अर बरा



मनख क बरा मन सुं बरा बातां ई खढ़' छ। 36 अर म्हूँ थां सुँ खरियो छूँ क ज्ये-ज्ये बरी बातां मनख ख'गा, परमेस्वर का न्याय क दन मं हर एक ऊ बात को हिसाब देणी पड़गो। 37 क कस्यां थारी बातां क आधार प ही तु निर्दोष अर थारी बातां क आधार प ही तु दोषी ठहराया जावगा।”

## सरग की निसाणी मांगी

38 फेर एक दन कोई यहुदियां की निम सखाबाळा मनख अर कोई फरीसी मनख ईसु क गोड़यां आ'र व ईसु सुँ खी, हे गरूजी, म्हानें था सुँ सरग की एक निसाणी देखबो छावें छां। 39 ईसु वांकी ई बात न सुण'र वासूँ बोल्यो, ”ई जुग का बरा अर व्यभिचारी लोग निसाणी देखबा छावें छ? पण पराणा जमाना मं परमेस्वर की भविष्यबाणी खबाळा योना का चिन्ह क अलावा ओर कोई नसाणी न्ह दिया जावगा। 40 क कस्यां जस्यां योना तीन दन अर तीन रात ताँई उस समुद्री जीव मछ्छी क पेट मं रियो छो, अस्यां ही मनख को बेटा भी तीन दन अर तीन रात ताँई धरती क महलाड़ी रहगो। 41 जद परमेस्वर का न्याय क दन, नीनवे महा नगर का लोग-दणी भी इ पीढ़ी का बरोध मं उठगा अर वानें दोषी ठहरावगा, क कस्यां योना का प्रचार न सुण'र वानें पच्ताव करया। पण अबार अठी वह छ ज्ये योना सुं भी बड़ा छ। 42 न्याय क दन, शेबा की (दक्षिण की) रानी इ पीढ़ी क लोगां क बरोध मं उठ'र वानें दोषी ठहरावगी, क कस्यां व्हा सुलैमान का ज्ञान न सुणबा काण घणी दूर सुं आई छी। अर अबानु देखो, तो अठी वह छ ज्ये सुलैमान सुं भी बड़ा छ;

## खाली व्यक्ति

43 जद कोई मनख मं सुं गन्दि सक्ति खड़ें जावें छ, तो सुखी जगह मं आराम हेरती फरें छ; अर पावें कोई न्ह। 44 तो वह ख छ, क म्हूँ अपणा उई घर मं ज्यां सुं खड़ छी व्हांई मं पाछें जावगी अर पाछें जा'र वह पराणा घरां न छोखी तरें सुं झाड़यो-बुहारयो अर सज्यो सजायो पाव छ। 45 फेर वह जा'र अपणा सुं भी ज्यादा बरी सात गन्दी सक्तियां न व्हांई ओर लावें छ। फेर व उमं जा'र रह'बा लागें जावें छ। अर ई प्रकार उ मनख की दसा पहली सुं ज्यादा बरी हो जावें छ। आज की ई बरी पीढ़ी का लोगां की दसा भी अस्यां ही होवगी।

## ईसु की साँची माँई अर भाई

46 जद ईसु भीड़ सुँ बातां कर रियो छो, तो झांको, ऊँका माँई अर भाई ऊंठी आया, अर व घर क बाहर ऊबा छा। अर व ईसु सुँ बातां करबा छावें छा। 47 तो कोई मनख न ईसु सुं खी, झांको, थारी माँई अर थारा भाई ब्हारें उबा छ, अर व थां सुँ बातां करबा छावें छ। 48 या सुणर ईसु ऊँकाण ज्वाब दिया, कुण छ म्हारी माँई ? 49 अर कुण छ म्हारा भाई ?। अर ईसू अपणा चेला क आड़ी अपणा हाथ बढ़ा'र खी,, ”झांको, म्हारी माँई अर म्हारा भाई ये छ। 50 क कस्यां ज्ये कोई म्हारा सरग्य पीता की अच्छया पर चालें छ, वह तो म्हारा भाई, बहण अर माँई छ”।



## 13

### बीज बाभाळा का बारा मं ढास्टान

1 ईक बाद ऊ दन मं ईसु घरां सुँ खढर गलील की झील क कराड़ा प मनख्यां क ताई उपदेस देबा काण जार बठयो। 2 तो ऊँकें च्यारूमेर अतनी घणी सारी भीड़ भेळी होगी। ई लेखें वह झील मं खड़ी एक नाव प चढर ऊमं बठग्या अर सारी भीड़ झील क कराड़ा प उबी रियो। 3 अर ईसु न व्हांकताई ढास्टान सुँ घणी सारी बातां सखाबा लाग्या। अर ईसु न अपना उपदेस मं व्हां सुं अस्यां स्त्री, सुणो, एक बगत एक खास्तगार बीज बाभा काण ऊँका खेत मं ग्यो 4 तो अस्यां होई, क जद ऊं बीज बाभा लाग्यो, तब कोई बीज गेला क सायरें पड़या अर चड़ीचुडंगला न आर वह चुगलिया 5 अर दूस्रो कोई बीज कांकरेली जमीन प गरपड़या, ज्यां व्हांन जादा गार न्ह मली, तो जादा गार न्ह होबा क कारण उ बीज बेग साक उग्या आया अर बढ़बा लाग्या। 6 पण जद सूरज उग्यो तो तावडा मं बीज बळग्या क कस्यां ऊंकी जड़ धस न्ह पाई। 7 अर कोई बीज झाड़यां मं जा पड़या, अर वह झाड़ीयां न बड़ी होर वह बीज दाबगाल्या। 8 अर कोई बीज छोखी जमीन प गरपड़या, ज्यां छोखा सुं उग्या अर बढ़ताग्या जि सुँ खूब पनप्या, अर उमई सुं कोई सौ गुणा, कोई स्याठ गुणा, कोई तीस गुणा फसल प'दा होई। 9 फेर ईसु न स्त्री, क ज्ये कोई समझबो छावें तो ज्ये बातां म्हूँ थां सुं खर्यो छूँ वह बातां न छोखा ध्यान सुं सुणलीज्यो।

### ढास्टान खबा को कारण

10 फेर चेला न ईसु क गोड़यां आर ऊ सुं बुझी, "तू वा सुँ ढास्टान मं खाईमी बातां करें छ?" 11 ईसु न ज्वाब दियो, थांक ताई तो सरग का राज्य क भेदां की समझ दी गी छ, पण वांक ताई न्ह दी। (ज्ये कोई म्ह प बस्वास न्ह करें, वह मनख्यां क ताई तो सारी बातां न ढास्टान क दुवारा बतावें छूँ) 12 ज्ये कोई म्हारा बचन न सुणर जीवन मं मानबो छावें छ ऊंक काण परमेस्वर ओर जादा देवंगा; अर ऊंक गोड़यां घणो होजावगो पण जिक गोड़यां काई भी कोई न्ह तो परमेस्वर ऊंक गोड़यां पहली सुं ज्ये काई छ, ऊ बी लेल्यो जाऊगो, ज्ये कोई म्हारा बचन न सुणर जीवन मं मानबो न्ह छावें। 13 म्हूँ वा सुँ ढास्टान मं ई लेख बातां करू छूँ, क, "जद व म्हारा कामां न देखता होयो छ तोभी व्हांन वास्तव मं सुझं कोई न्ह छ, अर व म्हारी बात न सुणता होयो छ तोभी न्ह सुणें अर व्हांकें समझ मं न्ह आवें छ, "। 14 अर वांका बारां मं परमेस्वर की भविष्यबाणी खबाळा यसाया का या भविष्यबाणी पूरी होवें छ, क, थां काना सुं तो सुणगा पण समझगा कोई न्ह, अर आंख्यां सुं तो देखगा पण थांन सुझं कोई न्ह (यशायाह 6:9)। 15 क कस्यां ये लोग-दणीयां को मन खंडो हो गया छ। अर व अपना कान बन्द कर राख्या छ अर अपनी आख्यां मीच राख मली छ ताकि व अपनी आख्यां सुं काई भी न्ह देखें अर व कान सुं काई न्ह सुण पाया छ। क अपना मन सुं कदी भी न्ह समझया अर कदी भी म्हार आड़ी मुड़र न्ह आया अर जिसुं म्हूँ वाको छुटकारा करूं।' 16 पण थांकी आख्यां अर थांका कान भला छ क कस्यां वह देख अर सुण सकू छ। 17 म्हूँ थासुं साँची खरियो छूँ, घणा भविष्यबाणी खबाळा अर धर्मियां ज्ये बातां न देखबा छाव छ, ज्ये थें देखरिया छो, व वानें कोई न्ह देख सक्या। अर ज्ये बातां न व सुणबा छाव छ, ज्ये थें सुणरिया छो। व वानें कोई न्ह सुण सक्या।

## बीज बाभाळा की ढास्टान को अर्थ

18 अबानु थें बीज बाभाळा की ढास्टान को अर्थ सुणो। 19 अर कोई मनख ज्ये परमेस्वर को राज्य क बचन सुणें छ पण वह समझ्या तो सेतान आ'र ऊ बचन न बिसरा देवें छ। जीनं ऊका मन मं पहली बायो ग्यो छो सुणल्या छा;यो ऊई बीज क नाई छ ज्ये गेला क सायरें मं पड़यो छो। 20 अर कांकरेली जमीन प पड़्या बीज ऊई छ,ज्ये परमेस्वर का बचन सुणें छ,तो वह हाथ्युहात आनंद क लारां अपणा लेवें छ। 21 पण वहांको बस्वास अतनो मजबूत न्ह होवें छ क वह अस्या पौधा क नाई छ जीकी जड़ जमीन प छोखी न्ह धस्सी,ई सुं वह घणा दना ताई न्ह रह'व छ,अर जद बचन क कारण वहां प दुख अर परेसान्यां आवें छ तो वह अपणा बस्वास न छोड़देवें छ। 22 अर कोई मनख छ ज्ये कोई बीज झाड़यां मं जा'र पड़्या बीज क नाई छ, व तो परमेस्वर का बचन सुणें छ। पण वह नथकई जीबा क बारा मं चन्ता करें छ,धन-समपत्ती अर मो-माया को लालच ये परमेस्वर का बचन न दाब देवें छ,जस्यां झांडीयां बीज न दाब देवें छ, ई कारण परमेस्वर को बचन उ मं सूं खराब हो जावें छ,ई सुं ऊ बीज बी फळ कोई न्ह लावें। 23 पण कोई मनख तो अस्यांका बीज क नाई छ ज्ये कोई बीज छोखी जमीन प पड़्या छा,व परमेस्वर का बचन सुण'र समझें छ,अर फळ लावें छ कोई सौ गुणा , कोई स्याठ गुणा, कोई तीस गुणा।

## जंगळी बीज का बारां मं ढास्टान

24 ईसु न वासुं एक ओर ढास्टान खी:सरग को राज्य ऊ मनख क नाई छ जीनं अपणा खेत मं छोखो बीज बोयो छो। 25 पण जद लोग-दणी सुता छा तो ऊका बेरी आर गेवां का बीजा मं जंगळी बीज बोर चलग्या। 26 जद कुपळ खड़ी अर दंग्या आई तो जंगळी दाणा का पोधा भी दिखाई दिया। 27 तब खेत का दणी क गोड़यां आर ऊका नोकरा न खी,"हे मालिक,थानें तो खेत मं छोखा बीज बोया छा? फेर जंगळी दाण का पोधा ऊ मं कठी सुं आया? 28 दणी न ऊका नोकरा सुं खी" 'यो कोई बेंरी का काम छ।' नोकरा न ऊसुं खी" काई थाकी अच्छया छ क म्हां जार वानें उपाड़ गालां? 29 दणी न वासुं खी,अस्यां कोई न्ह,क कस्यां जद थें जंगळी दाणा का पोधा न उपाड़गा तो वांक लारां गेहुंवां न भी उपाड़ें लेगा। 30 काटबा क ताई दोन्यां न लारां बढबा दियो अर काटबा की बगत मं म्हुं काटबाळा सुं खुं,क फहली जंगळी दाणा का पोधा न उपाड़ बाळबा काण गट्टे बांध लें अर गेहुं न म्हारा खलाण मं एकट्टा करो।

## राई का दान क बारा मं एक ढास्टान

31 ईसु न वांक काण एक ओर ढास्टान दियो; क सरग का राज्य ऊ एक राई का दान क नाई होवें छ।ज्यान कोई मनख लेर अपणा खेत मं बादियो। 32 ऊ सारा बीज्जा मं सुं सारा सुं छोटो छ पण जद बढ़ जावें छ तब सब साग पात सुं बड़ा होवें छ, अर अस्यां पेड़ हो जावें छ,क आकास क चडी चुड़ंग्ला ऊंकी डाळयां मं घुसाळा बणावें छ।

## खमीर को ढास्टान

33 ईसु न वांक काण एक ओर ढास्टान सुणाई 'सरग को राज्य खमीर क नाई छ,ज्ये कोई लुगाई न रोटी बणाबा क ताई तीन पचेरी चून मं उनें मलायो फेर होता-होता सारो चुन खमीर हो ग्यो।

## ढास्टान को उपयोग

34 ये सारी बातां ईसु न ढास्टान मं लोग-दणीयां सुँ खी,वास्तव मं वह बना ढास्टान क दुवारा वांसुँ काँई भी न्ह ख छो। 35 क ज्ये बचन परमेस्वर की भविष्यबाणी खबाळा क दुवारा खयो ग्यो छ ऊ पुरी होवें “ म्हुँ ढास्टान खबा काण अपणो मुंडो खोलूँ म्हुँ वह बातां न खुँ ज्ये जगत की उत्पत्ति सुँ गुप्त छ,वानें उजाकर करूँ।”

## जंगळी(काकड़) बीज का ढास्टान को अरथ

36 फेर ईसु उ भीड़ न वदा कर'र घरन आयो। तब ऊँका चेला न ऊक गोड़यां आर ऊसुं खी, “खेत का जंगळी दाणा की दास्टान म्हां काण समझा दें।” 37 ईसु न वांक काण ज्वाबदिया,ज्यांनं छोखा बीज न बाया छो,वह मनख को बेटो छ। 38 अर खेत यह संसार छ। छोखो बीज को मल्लब छ, सरग को राज्य क लोग। जंगळी बीज का मल्लब छ, वह मनख ज्ये सेतान की सन्तान छ। 39 वह बॅरी जिनें ऊ जंगळी बीज बोया छो, ऊ सेतान छ अर काटबा क समय छ, इ जगत क अंत छ अर काटबाळा सरगदूत छ। 40 “ जस्यां जंगळी दाणा न बीण्या जावें छ अर बाळयो जावें छ , अस्यां ई जगत का अन्त मं होवगो। 41 मनख को बेटा अपणा दूतां न खन्नावगो अर व ऊका राज्य मं सुँ सब ज्ये पाप करबा काण उकसावें छ अर ज्ये परमेस्वर की बातां न कोन्ह मानें छ,वानें एकट्ठा करगा 42 अर वानें एकट्ठा कर'र आग का कुण्ड मं पटकगा,ऊँठी रोबो अर दाँत चाबबो होवगो क कस्यां ऊँठी घणा दुख होवगो। 43 ऊ बगत धर्मी अपणा परम पिता का राज्य मं सूरज क नाई चमकगा। जीकें सुणबा क कान होवें व ध्यान सुँ सुण लें!

## छप्पा होया खजाना को ढास्टान

44 सरग को राज खेत मं छप्पा होया धन क नाई छ ज्ये कोई मनख न पायो अर उनें व्हां घुसाड़ दियो।वह अत्ना राजी खुशी होर क वानें ज्ये कोई ऊको गोड़यां छो,जा'र बेच दियो अर वह खेत मोल ले ल्यो। 45 फेर सरग को राज्य एक बोफारी(व्यापारी) क नाई छ ज्ये छोखा मोत्या की हेर मं छो। 46 जद उनें एक अनमोल मोती मल्यो तो जा'र ज्ये कोई ऊको गोड़यां छो,ऊ बेच दियो अर वह मोती मोल ले ल्यो।

## ज्याळ को ढास्टान

47 फेर सरग को राज मछ्छीयां पकड़बा काण समुंद्र मं पटकयो ग्यो एक बड़ा ज्याळ क नाई छ।जीमं हर प्रकार क मछ्छीयां समेट लायो। 48 अर जद वह ज्याळ पूरा भर ग्यो तो बोई उनें कराड़ मं खींच लाया।अर ऊँठी बठ'र छोखी-छोखी मछ्छीयां छाँट'र टांगळीयां मं भर ली गी पण खराब-खराब मछ्छीयां फका दी गी। 49 अस्यां संसार का अन्त मं होवगी।सरगदुत न आर धर्मीयां न पापीयां सुँ न्हाळा करगा। 50 अर वानें आग का कुण्ड मं पटकगा,ऊँठी रोबो अर दाँत चाबबो होवगो क कस्यां ऊँठी घणा दुख होवगो।” 51 काँई थानें ये सारी बातां समझी?”वानें ईसु सुँ खी,“हाँ!” 52 ईसु न अपणा चेला सुँ खी,“झांको,ई लेखें हर एक निम सखाबाळा मनख ज्ये सरग क राज्य को जानु छ,व एक अस्यां भण्डारी क नाई छ ज्ये अपणा भण्डार मं सुँ नई अर पराणी चीजां खाड़ें छ।

## नासरत गाँव मं ईसु को निरादर

53 जद ईसु न ये सारा ढास्टान ख' चुक्या छा तो ऊँठी सुँ खड़ ग्या। 54 अर अपणा गाँव नासरेत मं आया अर जद यहूदीयां का आराम हाळो दन ईसु यहूदीयां की भेळा होबाळी सभा मं ग्या अर ऊँठी मनख्यां क ताँई उपदेस सुणबा लाग्या। तो ईसु की उपदेस न सुण'र लोग-दणी सोच मं पडग्या अर व एक दूसरा सूँ बुझबा लाग्या, "ईनें या ज्ञान अर बड़ा-बड़ा चमतकार करबा की शक्ती कठी सुँ मली छ? 55 काँई यो ऊ खाती को बेटो कोई न्ह क? काँई ईकी माँई को नाऊँ मरियम कोई न्ह क? अर ईको भाईयां क नाऊँ याकूब, योसेस, यहूदा, अर समौन कोई न्ह क? 56 काँई ईकी सारी बहणयां आपणा बीच मं न्ह रह छी क?" फेर ई काण यो सारा कठी सुँ मल्या? 57 ई सुँ वाने ईसु को निरादर कर्यो। तो ईसु न वां सुँ खी, क"परमेस्वर की भविष्यवाणी खबाळा न सारा मनख्यां सुँ आदर पावें छ पण खाली अपणा खुद की नगरी अर कुटुम्ब सुँ आदर न्ह पावें।" 58 अर ईसु ऊँठी कोई चमतकार का काम कोई न्ह कर सक्यो। क कस्यां व्हानें व्हान्की बातां प बस्वास न्ह कर्यो।

## 14

### बतिस्मा देबाळो यूहन्ना की हत्या

1 ऊ बगत गलील प्रदेस(जिल्ला) मं राज करबाळा राजा हेरोदेस न ईसु ज्ये कोई चमतकार कर्या उंका बारें मं सुण्या। 2 अर उनें अपणा सेवकां सुँ खी' यो बत्तीस्मा देबाळो यूहन्ना छ, ज्ये मरया होया मं सुं पाछा जीवता होग्या छ। अर ई लेखें ऊ सुँ चमतकार करबा काण शक्ती प्रगट होवें छ। 3-4 या ऊ हेरोदेस छो, ज्यांन यूहन्ना को बंदी बनार, स्याकळ्यां मं सुँ बाँधर कोठडी मं पटक दियो, क कस्यां कोई समय पहली हेरोदेस न अस्यां करद्या, क ऊ खुद का भाई फिलीप्पुस की घरहाळी जीक नाऊँ हिरोदियास छो ऊ सुँ ब्याव कर ल्यो। ऊनें ऊंको ब्याव करदीयो जद फिलिप्पुस ऊंको लोग रह छो। ई सुँ यूहन्ना न हेरोदेस सुं खी छी, "थनें ज्ये अस्यां को काम कर्यो छ ओ यहूदियां का निम क अनुसार उचित कोई न्ह छ। क थनें थारा भाई की लुगाई अपणी घरहाळी बणाली छ। यहो तो पाप छ"। 5 ई लेखें राजा हेरोदेस उनें मारगाळबो छावें छो पण लोग-दणीयां सुँ डरपें छो क कस्यां व उनें परमेस्वर की भविष्यवाणी खबाळो मानें छो। 6 पण जद हेरोदेस को जनम दन आयो तो उ बगत मं हेरोदियास की छोरी ऊँठी आई अर ऊंका फावणा क सामें नाच'र राजा हेरोदेस न घणी राजी कर दिया। 7 ई लेख राजा न ऊ छोरी सुँ सोगन्द खार बचन दिया, "क तू ज्ये छावें छ म्ह सुं माँग, म्हूँ थारें काण दिऊँ"। 8 अर वह छोरी अपणी माँई क गोड़यां जा'र बुझबा लागी, म्हूँ काँई माँगुं ज्ये तू छावें छ? तो ऊंकी माँई ऊ सूँ बोली, यूहन्ना बतिस्मा देबाळो को माथो" माँग। अर वहा उतावळी सीक भाग'र राजा क गोड़यां आ'र वहा राजा सुँ बोली, म्हनें यूहन्ना बतिस्मा देबाळो को माथो कटवा'र थाळी मं धर'र अबाणु म्हार काण दे दिज्ये। 9 ई बात न सुण'र राजो घणो दुखी होयो। पण अपणा बचन क कारण अर लारां बठबाळां क कारण ऊ छोरी सुं मना न्ह कर सक्यो। 10 अर राजा न एक सिपाही काण हुकम दे'र खन्नाद्यो क यूहन्ना को माथो काट'र ल्यावो। 11 अर उ सपाही एक तलवार सुँ यूहन्ना को माथो काट'र उनें एक थाळी मं धर'र उ छोरी क ताँई द्यो। अर ऊ छोरी न यूहन्ना को माथो ऊंकी माँई क गोड़याँ लेगी। 12 अर यूहन्ना का चेला न जद ई बात क बारा मं सुणी तो व ऊँठी सुँ उ

लास न ले'र आया अर व्हानें एक कबर मं गाढ़ दी अर जार ईसु काण समचार दिया।

## ईसु को पाँच हजार लोगों काण रोटी खुवाबो

13 जद ईसु न या सुणी तो ऊ नाव मं चढ़र ऊठी सुँ सुनसान जगह मं एकान्त मं खड़ग्यो। पण जद भीड़ न या सुणर लोग-दणी गाँवाँ-गाँवाँ मं सुँ खड़र पगा-पगा ऊकें पाछें होग्या। 14 जद ईसु नाव मं सुँ तणें उतर्या तो व्हानें एक घणी बड़ी भीड़ देखी अर वा प तरस खायो। अर उनें वाकां बेमार मनख छोखा कर्या 15 अर जद दन बुड़बा लाग्यो, तो ईसु का चेला व्हानकें गोड़यां आ'र ख'बा लाग्या; यहा तो सुनी जगह छ अर मोड़ा बी घणा होग्या, ई लेखें थां ये मनख्यां न बदा कर द्यो जीसुँ व च्यारू और गाँव बस्तियां मं जा'र खुद क ताँई रोटीयां मोल ले सकें। 16 पण ईसु न चेला सुँ खी, वाकें जाबा की जुरत कोई न्ह! क थाँ ही यहांक ताँई खाबा काण द्यो। 17 चेला न ईसु सुँ खी; म्हाकें गोड़यां पाँच रोटीयां अर दो मछीयां न छोड़'र काँई भी कोई न्ह। 18 ईसु न खी, वानें म्हारें गोड़यां ल्यावो। 19 तो ईसु न सारा मनख न घास प पंगत मं बठाबा की खी, अर ईसु पाँच रोटीयां अर दो मछीयां न हाथ मं ले'र स्वर्ग क आड़ी झाँक'र पराथना कर'र परमेस्वर काण धन्यवाद द्यो, अर ईक बाद मं वह रोटीयां ले'र ऊ रोटीयां का टुकड़ा-टुकड़ा कर'र चेला काण दिया, चेला न सारा क ताँई बाट दी। 20 अर सारा मनख खा'र धापग्या। ईक बाद मं वह रोटीयां अर मछीयां बचगी। फेर चेला न बची रोटीयां अर मछीयां सुँ भरी बाराह ठांगलीयां उठाई। 21 अर रोटीयां अर मछीयां खाबाळा मं छोरा-छोरी अर लुगाई न छोड़र खाली लोग पाँच हजार छा।

## ईसु पाणी प पगां चाल्या

22 तो हाथ्युहात ये चमतकार क बाद मं ईसु न अपना चेला नाव मं चढाया अर ज्या ताँई भीड़ न बदा करे, वा सुँ गलील की झील क दूसरी आड़ी म्हा सुँ आगे चल जाबा काण खी। 23 वह भीड़ न बदा करे, पराथना करबा काण एकलो एक डूंगर प चढ़'ग्यो, अर दन बुड़यां की बगत मं ऊँठी एकलो छो। 24 अर ऊ बगत मं नाव झील क बीच-बीच मं हलोला सुँ डगमगा री छी, क कस्यां सामें की एक बड़ी भारी आँधी चालरी छी। 25 अर दन उग्बा क पहली तीन बज्यां सीक ईसु झील मं पाणी क ऊपर पगां-पगां चालता होया चेला क गोड़यां आया। 26 पण व उनें झील का पाणी प चालतो देख'र घबराग्या, अर खबा लाग्या "औ तो भूत छ" अर व बाहीं पाड़बा लाग्या। क कस्यां व सारा उन्ह देख'र डरपग्या। 27 पण ईसु हाथ्युहात वासूँ बाताँ कर्यो अर बोल्यो, हिम्मत राखो, म्हाँ छूँ, डरपो मत"। 28 पतरस न ऊकाण ज्वाबदियो, है परभु, अगर तू छ, तो म्हनें पाणी प पगा चालर थाकें गोड़याँ आबा की आज्ञा दें। 29 ईसु न खी, "आजावो", तब पतरस नाव मं सुँ उतर ईसु क गोड़यां जाबा काण पाणी प चालबा लाग्यो। 30 पण बाळ न देखर डरपग्यो अर वह डूबबा लाग्यो तो बाहीं पाड़र खी, "है परभु म्हनें बचावो!" 31 अर ईसु न हाथ्योहात उको हाथ पकड़र ऊ थाम लियो अर ऊ सुँ खी, "हे अल्प-विश्वासी, थनें काँई काण सक करदिया छ?" 32 फेर ईसु अर पतरस नाव प चढ़ग्या अर आँधी थमगी। 33 ई प वानें ज्ये नाव मं छा वानें डोक देर खी; "चचमुच तू परमेस्वर को बेटो छ।"

## गन्नेसरेत मं बेमारां न छोखो करबो

34 तो ईसु अर ऊंका चेला गलील की झील पार कर'र गन्नेसरेत का ईलाका मं पुग्या। 35 अर नाव सँ उतर ताई ऊंठी रहबाळा लोग-दणीयां न ईसु पचाणल्या। तो वाने ईसु क आबा क बारां मं सारा आस-पास ईलाका की सारी बस्तियाँ मं बताबा काण खन्नाया, जी सँ लोग ज्ये बेमार छा, व सारा न ईसु क गोड़यां लाया। क कस्यां वह वाने छोखा कर देवें छ। 36 अर व ईसु सँ अरज करेबा लाग्या, क अगर बेमार मनख न अपणा लत्ता की खाली कोर क अड़सलिया बा दे तो छोखा होजावगा। अर ज्ये कोई न वहांका लत्ता अड़सलिया, व सारा अपणी बेमारी सँ छोखा होग्या।

## 15

### रिती-रीवाज

1 फेर एक दन कोई फरीसीयां अर यहुदियां का निम सखाबाळा ज्ये यरुशलेम सहर सँ आया छा अर व सन्दाई मल'र ईसु क गोड़यां आग्या 2 वह फरीसीयां अर यहुदियां का निम सखाबाळा न ईसु सँ बुझी क, "थारा चेला काई काण आगला-बडा की रिती-रीवाज न कोन्ह मानरिया छ, अर बना हाथ धोयां रोटी खाव छ?" 3 फेर ईसु न वहांक ताई ज्वाब द्या, क थैं भी अपणा आगला-बडा का रिती-रीवाज क कारण परमेस्वर का निम न टाळ छो? 4 क कस्यां परमेस्वर न अपणा दास मूसा क द्वारा हुकम दिया छा। क थां अपणी माँई अर बाप की आदर करो, अर ज्ये कोई अपणा माँई अर बाप को बरो करें, उने जरूर मार देणो छावें छ। 5 पण थां अस्यां सखार्या छ, क जद थारा माँई-बाप थां सुं कोई चिज माँग तो थैं वासूँ ख छ, क वा तो परमेस्वर काण भेंट चढ़ादी छ। ई लेख थां क काण मदद न्ह कर सक्क। (अस्यां बोल'र थां थारा माँई-बापा की सेवा करबा सँ बरा छ)। 6 तो उने अपणा माँई-बाप की सेवा अर आदर करबा की जुरत कोई न्ह, ई तरें सुं थैं अपणा अगला-बडा का रिती-रीवाज क कारण परमेस्वर का निम न टाळ छो। 7 हे कपटी मनखयांओ, यसाया नाऊँ का परमेस्वर की भविष्यवाणी खबाळा न घणा साल क पहली परमेस्वर का बचन मं थांके नाई कपटी मनखयां क लेख छोखा सुं माण्डया छा। अस्यां माण्डया छ। 8 क "औ लोग खाली अपणा मुण्डा सँ आदर करें छ पण वहांको मन तो म्ह सँ घणा दूर छ"। 9 वह बनाफाल्तु म्हारी उपासना करें छ, क कस्यां मनख का निम न परमेस्वर को निम बणा'र सखाव छ। यशायाह 29:13, 10 फेर ईसु भीड़ न ऊंक गोड़यां बला'र वा सँ बोल्यो, "थां सन्दाई म्हारी बात सुणलियो अर समझालियो। 11 ज्ये कोई मुण्डा सँ जावें छ (भोजन न मनख खाव छ), ऊ उने सुगलो न्ह करें छ, पण ज्ये कोई मनख क मुण्डा मं सँ खड़ छ वह ही उन्ह सुगलो करें छ। 12 तब चेला न आर ईसु सँ खी, काई थैं जाणें छ क फरीसीयां न ये बचन सुणर ठोकर खाई?" 13 ईसु न ज्वाब दियो, हर एक पोथो ज्ये म्हारा सरग मं रहबाळा पिता न कोन्ह लगायो, ऊ ऊखाड़ दियो जावगो 14 वाने छोड़ दें, "व तो आन्धा क आन्धा नेता छ, अर अगर एक आन्धा मनख दूसरा आन्धा क ताई गेलो बतावगो, तो दोनी आन्धा गड़्हा मं गर पड़गा। 15 या सुणर पतरस न ईसु सँ खी, या ढास्टान को मल्लब म्हांक ताई समझा दें। 16 तो ईसु न वा सँ खी, "काई थां क हालताई काई बी समझ मं न्ह आई क? 17 क थां न्ह जाणें क ज्ये कोई चीज मुण्डा सँ मनख क भीतर जाव छ वह ऊंका पेट मं जावगी अर हाथ-मुण्डा धोबा मं खड़

जाव छ?। 18 पण ज्ये कोई मनख क मुण्डा सँ खड़ह छ, क कस्यां वह चिज मनख का मन मं सँ खड़ह छ, वा ही मनख न परमेस्वर की नजर मं सुगलो कर छ। 19 क कस्यां ज्ये चिज मनख का मन मं सँ खड़ह छ, क खराब बच्चार, मनख न मारबो, दूसरा की लुगाई न देखबो, व्यबीचार, चोरी, झुठी गवाई अर कोई की चुगली करबो, ये सारी खराब बातां मनख का मन मं सँ खड़ह छ 20 अर वही उनें सुगलो बणादेवें छ।” पण बणा हाथ धोया रोटी खाबो मनख न सुगलो कोई न्ह करैं।

## एक बायर को बस्वास

21 तो ईसु अर ऊँक चेला उ जगह न छोड़ैर तीरु अर सीदोन नाऊँ का ईलाका मं चल गया। 22 अर झांको, ऊ ईलाका सँ एक कनानी लुगाई आई, अर बाहारा पाडर खबा लागी, हे परभू, राजा दाऊद की सन्तान, म्ह पें दया कर, म्हारी छोरी न गन्दी सक्ती घणा सता रियो छ। 23 ईसु न ऊ लुगाई काण काँई ज्वाब कोन्ह दिया, अर ऊँका चेला न ऊँकें गोडयां आर अरज करबा लागया, ईनें बदा कर क कस्यां वां आपणें पाछें बहारा पाडती होई आरी छ। 24 ईसु न ऊ काण ज्वाब दियो, म्हूँ खाली इस्राएल क लोगां ज्ये गमी होई गाड़रा क नाई छ, व्हाकी मदद करबा काण खन्नायो ग्यो छूँ। 25 पण वह लुगाई ईसु क सामें ढोक देर ख'बा लागी,, ”है परभू, म्हारी मदद कर।” 26 ईसु न ऊ लुगाई सँ खी, बच्चा की रोटीयां न कुसकॉर गण्डकड़ा क बच्चा(भुन्नया) क आगें फक्का देबो छोखो कोई न्ह। 27 तो ऊ लुगाई न ईसु काण ज्वाब द्यो, ”है परभू थां साँची ख छ; तोबी बच्चा की रोटी मेज क तणें गर्या टूकड़ा न गण्डकड़ा क बच्चा(भुन्नया) ही तो खाव छ।” 28 ईसु न ऊँकी बात सुणैर ऊसँ खी, हे नारी, थारी बस्वास बड़ा छ, जस्यां तु छाव छ, अस्यां थारें काण होवें। अर ऊ घडी सँ भूत खढ़ग्यो अर व्हा छोरी छोखी होगी।

## ईसु न घणा बेमार मनख छोखो करबो

29 फेर ईसु अपणा चेला क लारां तीरु अर सीदोन ईलाका न छोड़ैर गलील की झील क गोड़यां आग्या। अर ऊठी एक डूंगर प चढ़र बठग्यो। 30 तब भीड़ की भीड़ ऊँक गोड़यां आई अर व आपणा लारां लँगड़ा-लूलां, अंधां, अपाहिजों, बहरां-काल्लां अर अस्यां ही घणा सारा रोगियां न लेर ऊक गोड़यां आबा लागी। अर व ईसु को पगा मं पटक दिया अर ईसु न वह चंगा कर दियो। 31 जद लोग-दणीयां न देख्यो क काल्ला बोलें छ अर लूला छोखा होवें छ अर लंगड़ा चालें छ अर आन्धा देखें छ तो लोग-दणीयां अचम्भबो करर इस्राएल का परमेश्वर की बडाई करबा लाग्या।

## च्यार हजार मनख्यां क ताँई खुवाबो

32 ईसु न अपणा चेला बलार वा सुं खी, म्हनें ई भीड़ प दया आरी छ क कस्यां य मनख तीन दन सुं म्हारें लारां छ अर व्हांक गोड़यां खाबा काण काँई बी कोई न्ह। अगर अबानु म्हूँ वानें भुखा पेट सुं घरां खन्नाऊँ तो व गेला मं ही थाकर ऊँठी ही गोडा टेक देगा। (क कस्यां यां मं सुं कोई कोई घणा दूर सुं आया छ।) 33 तो ऊँका चेला न ईसु सुं खी, ई सुनी जगह मं अतना मनख न धापर खुवाबा काण म्हां कठी सुं रोटीयां लावां? 34 ईसु न चेला सँ बुझी ”थांक गोड़यां कत्री रोटीयां छ?” व बोल्या, म्हांक गोड़यां सात रोटीयां अर थोडी सी मछ्छीयां छ।” 35 फेर ईसु न



भीड़ें सूँ खी, थ पंगत बणर धरती मं बठ जाबा काण आज्ञा दी। । 36 अर ईक बाद ईसु व सात रोट्यां न हाथ मं ले'र परमेस्वर काण धन्यवाद देर व रोट्यां का टुकड़ा-टुकड़ा कर'र अपणा चेला काण देतो ग्यो अर चेला भीड़ काण परोसता गया। 37 व सारां खा'र धापग्या अर चेला न बच्यी रोट्यां सुँ सात ठांगल्यां भर'र उठाई । 38 ऊंठी खाबाळा मं लुगायां अर बाळकां न छोड़र करीब च्यार हजार लोग छा। 39 जिक बाद मं ईसु न वह लोग-दणी ऊंठी सूँ बदा कर्या। अर वह अपणा चेला क लारां नाव प चढ़र मगदन नाऊँ का ईलाका क आड़ी चलग्या।

## 16

### फरीसीयां न ईसु सूँ सरग की निसाणी माँगी

1 फेर फरीसीयां अर सदुकियां न ईसु क गोड़यां आ'र व ईसु न परखबा काण ऊ सुँ खी, म्हां काण सरग की कोई निसाणी दिखा। ( क कस्यां व ईसु न फसाबो छाव छा) । 2 ईसु न वांका काण ज्वाब दियो, दन बुडियां प थें ख'व छो, क आज मोसम बडिया रहगो क कस्यां बादळो रातो छ। 3 अर दन ऊग्या ख' छो, क आज आंधी आवगी क कस्यां बादळो रातो अर धुंधळा छ; थां आकास क लखणा (लक्षणां) न पहचाणबो तो जाणें छो पण अपणा समय की लखणा न न्ह पहचाण सक्या? 4 ईसु न खी, ई जुग का बरा अर व्यभिचारी लोग नसाणी हेरें छ पण पराणा जमाना मं परमेस्वर की भविष्यवाणी खबाळा योना का नसाणी क अलावा ओर कोई नसाणी न्ह दिया जावगा, अर ईसु वानें छोड़र खड़ग्यो।

### फरीसीयां अर सदुकियां का खमीर

5 ईसु का चेला नाव मं चढ़र झील क फेलाडी पुग्या पण व वांकें लारां रोटी लाबो बिसर गया छा। 6 अर ईसु वासुं जतार बोल्यो, क देखो, फरीसीयां अर सदुकियां का खमीर सूँ समळर रहो” 7 ईसु का चेला अपणा-आप बच्यार करबा लाग्या, क ईसु या बात ई लेख बोल्यो छ, क कस्यां आपण गोड़यां रोटीयां कोई न्ह ल्याया? 8 या जाण'र ईसु न वांसूँ खी, हे अल्पविश्वासियां थां काई काण अपणा-आप बच्यार कर्या छ, क आपण गोड़यां रोटीयां कोई न्ह? 9 कांई थां हालताई कस्यां न्ह समझया? अर पाँच हजार मनख्याँ काण पाँच रोठयां थानें याद कोन्ह काई? अर ऊ बगत थानें रोट्यां का टुकड़ा सूँ भर'र कत्नी ठांगलियां उठाई छी? 10 “अर जद च्यार हजार मनख्यां क ताँई सात रोठयां सूँ धपाया छा ऊ बगत मं थानें रोट्यां का टुकड़ा सूँ भर'र कत्नी ठांगलियां उठाई छी?” 11 कांई थां कस्यां न्ह समझया क म्हनें थासुँ रोटीयां क बारां मं न्ह खि? पण फरीसीयां अर सदुकियां का खमीर सूँ समळर रहो” 12 तब वांक समझ मं आया, क ऊ रोटीयां क खमीर सुँ कोई न्ह, पण फरीसीयां अर सदुकियां का शिक्षाओं सुँ समळर रहोबा काण खी छी।” पतरस बोल्यो ईसु ही मसीह छ (मरकुस 8:27-30; लूका 9:18-21) 13 फेर ईसु अर ऊंका चेला कैसरिया फिलीप्पी का ईलाका मं आया, तो ईसु न ऊंका चेला सुँ बुझी, म्हारा बारा मं लोग-दणी कांई ख'रिया छ,” क म्हुँ कुण छूँ?।” 14 चेला न ऊंकताई ज्वाब द्या, कोई लोग खवें छ, क थां बत्तीस्मा देबाळो यूहन्ना छ; कोई खवें छ, क थां परमेस्वर की भविष्यवाणी खबाळा एलिया छ। अर कोई मनख खव छ, थें यिर्मयाह छ अर कोई मनख खव छ, क थें, घणा साल क पहली परमेस्वर की भविष्यवाणी खबाळा मं सुं एक छ “ 15 फेर ईसु



न वां सूँ बुझी, क थां म्हनें काई खवें छ, म्हूँ कुण छूँ?” 16 तो शमोन पतरस न ज्वाब द्यो, ‘क तु जीवता परमेश्वर को बेटो मसीह छ ‘ 17 ईसु न वहां सुँ खी, ” हे शमोन!, योना को बेटो, तू भलो छ क कस्यांक थांक ई बात कोई मनख सुँ न्ह, पण म्हारा पीता ज्ये सोरग मं छ, या बात थाप प्रगट करी छ। 18 अर म्हूँ थाँसुँ खरियो छूँ, क तु पतरस छ (जिंका मल्लब छ भाटो)। अर ई भाटा प अपणी कलीसिया (बस्वास्यां की टोळी) बणाऊँ। कोई भी बेरी अर मरण भी उ प हावी (प्रबल) न्ह होवगी। 19 म्हूँ थारें काण सरग क राज की कुंजियां दे रियो छूँ। ताकी ज्ये काँई तु धरती प बांधंगो ऊ सरग मं परमेस्वर क वाळ बांधयो जावगो अर ज्ये कोई तु धरती प खोलगो ऊ सरग मं परमेस्वर क वाळ खोलयो दियो जावगो। 20 ईसु न चेला सुँ जतार खी, ” क थां ई बात क बारा मं कोई सूँ मत खीज्यो ज्ये थानें बताया छ, क म्हूँ मसीह छूँ।”

## (ईसु अपणा) मरबा क बारें मं भवीस्यबाणी

21 फेर ईसु अपणा चेला काण बताबा लाग्या, या तो जरूर छ, क म्हूँ यरूशलेम मं जाऊँ, छ, क म्हूँ मनख को बेटो छूँ ज्ये घणा दुःख उठावगो अर यहुदीयां का मुख्य मनख, प्रधान याजकां अर यहुदियां क निम खबाळा वांको न्याय कर’र दोसी बताऊंगा अर उनें मार गालगा पण मनख को बेटो तीन दन मं मरया होया मं सूँ पाछो जिन्दो हो जावगो। 22 पण पतरस या बातां न सुणर ईसु न न्हाळो ले जा’र व्हानें पटकारबा लाग्यो, हे परभु, परमेस्वर न्ह करें, थांक लारां अस्यं कदी भी न्ह होवगी। 23 पण ईसु पाछें मुड़र पतरस न दकाल’र बोल्यो, ”हे, सेतान, म्हारें सामें सूँ खड़ जा। क कस्यां परमेस्वर की बात मं थारो मन कोई न्ह, पण मनख्यां की बात मं मन लगाव छ।” 24 फेर ईसु न अपणा चेला सुँ खी, अगर ज्ये कोई मनख म्हारो चेलो बणबो छावें छ उ ऊंका सारा मन की बात न म्हारी ईच्छा क ऊपर छोड़णो पड़गो अर ”उनें अपणा कुरुस उठा’र म्हारें लारां हो जाव “। 25 क कस्यां ज्ये कोई अपणो जीवन बचाबो छाव छ ऊ उनें गमाऊगो, पण ज्ये कोई म्हारें काण अपणा जीवन देवें तो उ उनें बचाउगो। 26 अगर ज्ये कोई मनख सारा जगत की समपतियां प्राप्त करें लेव पण परमेस्वर क लारां रह’बा काण अमर जीवन प्राप्त न्ह करें तो, ऊं क काँई फायदो छ क? काँई ज्ये कोई अमर जीवन पाबा काण परमेस्वर क ताँई कोई चिज दे सकें छ क? 27 मनख को बेटो अपणा सरग का दूतां क लारां, अपणा पीता की महमा मं आऊगो, ऊ बगत मं हर एक मनख क वांका कामां क अनुसार प्रतिफळ देवगो। 28 फेर ईसु न वासूँ खी, म्हूँ थां सुँ साँची खर्यो छूँ, सुण! क ज्ये यहां ऊबा मनख्यां मं सूँ कोई-कोई तो अस्यां का छ, क व ज्यांताई मनख को बेटो न ऊकें राज्य मं आतो होयो कोन्ह देखंगा तबताँई मोत कोन्ह होवगी।

## 17

### ईसु को रूप बदलबो

1 छःदन क बाद ईसु अपणा तीन चेला पतरस, याकूब अर ऊका भाई यूहन्ना न लारां ले’र एक ऊँचा डूंगर प गया ज्यां व एकला रिया। 2 ऊंठी वहाँक सामें ईसु को रूप बदल ग्यो, अर ऊको मुण्डो सुरज क नाई चमक्यो अर ऊका लत्ता उजाळा क नाई धोळो होग्या। 3 फेर अचानक मूसा अर एलिया ईसु क आगह प्रगट हो’र व ईसु सूँ बातां करबा लाग्या। 4 या देखर पतरस न ईसु सूँ खी क, ”हे परभु, ओ कत्नो छोखो छ, क आपण यहां छां। अगर थें छावें तो म्हानें यहां तीन तम्बु

बणाबा द एक थारें काण, एक मुसा काण अर एक एलिया काण।” 5 पतरस अबानु बातां कर ही रिया छो क एक चमकतो होयो बादळो आयो अर व ऊ बादळा न ढांकलिया अर बादळा मं सुँ या आकासबाणी होई क “यो म्हारो लाड़लो बेटो छ”। जीसुँ म्हुँ घणो राजी छूँ। थां ईकी बात न सुणो।” 6 चेला या सुणर (मुण्डा) आडा गर पड़या अर घणा डरप गया। 7 ईसु न वांक गोड़यां आर अड़सया, अर खी, उठो; डरपें मत। 8 जद वॉनँ अपणी आख्यां उठाई अर ईसु क अलावा तो ओर कोई बी न्ह दिख्या। 9 जद व डूंगर सू तणँ आर्या छा ईसु न वह तीन चेला काण हुकम द्यो क ज्यांताई म्हुँ, मनख को बेटो मरया होया मं सुं फेर जिन्दा न्ह होजाऊँ। तबताई थानँ ज्ये ऊंठी देख्यो छ ऊंका बारा मं कोई सूँ बी मत खिज्यो। 10 तो चेला न ईसु सूँ बुझी, यहुदियां का निम सखाबाळा मनख खामी ख छ, क मसीह क पहली एलेया को आबो जरूरी छ?” 11 ईसु न वांक काण ज्वाब दियो, सझाई, एलेया, मसीह क पहली आर सारी बातां न छोखा करगो। 12 पण म्हुँ थां सूँ खर्यो छूँ, क एलिया आ चुक्यो छ पण लोग-दणीयां न ऊ न्ह पहचाण्यो पण जस्यां छाव छ अस्यां मनख्यां न ज्ये छायो ऊंके साथ कर-करालियो।” , ई रीति सुँ मनख को बेटो भी वांक हाथ सुँ दुःख उठावगो। 13 तब चेला न समझी क उनेँ आपण सुँ बत्तिस्मा देबाळा युहन्ना क बारां मं खी छ। ईसु न एक छोरो को छोखो करबो (मरकुस 9:14-29; लूका 9:37-43) 14 जद ईसु अपणा तीनु चेला क लारां डूंगर सूँ उतरया ज्यां दूस्रा चेला ठहरियां छां व्हांई आया। तो एक मनख ऊँक गोड़यां आयो अर गोडा टेककर ख’बा लाग्यो। 15 है परभु, म्हारो छोरो प दया कर; क कस्यां उनेँ मिर्गी आवें छ? अर ऊ घणो दुःख उठाव छ; अर बार बार आग मं अर बार बार पाणी मं गर पड़ छ। 16 अर म्हुँ उनेँ थांक चेला क गोड़यां लायो छो पण व उनेँ छोखा कोन्ह कर सक्या। 17 ईसु ऊंकी बातां सुणर चेला सूँ खी, “है भटका होयो अबस्वासी पीढ़ी क मनख्यां ओ, म्हुँ खां ताई थांक लारां रहऊँ अर खा ताई थांकी सहुँ? ऊ छोरो न म्हारें गोड़यां ल्यावो” 18 फेर ईसु न वह भूत दकाल्यो अर वह ऊ मं सुँ खड़ गी। अर वह छोरा ऊ घड़ी मं छोखा होग्यो। 19 तब चेला न एकला मं ईसु क गोड़यां आर बुझी, म्हां ऊ छोरो मं सूँ ऊ भूत न कस्यां कोन्ह खाड़ सक्या?” 20 फेर ईसु न व्हांक ताई ज्वाब द्या, क कस्यां था मं बस्वास की कमीम छ। म्हुँ था सुँ साँची खरियो छूँ, अगर थाका बस्वास राई का दाणा क बराबर भी हो, तो ई डूंगर सुँ ख’गा, क अठी सुँ सरकर ऊंठी चल जा, तो वह चल जावगो अर थांक लेखें असम्भव काँई भी कोन्ह होवगी। 21 (पण अस्यांण को भूत पराथना क बना कोई तरीका सूँ मनख्यां मं सुँ न्ह खड़ सक छ।)

## ईसु न अपणा मरबा क बारा मं फेर बी भबीष्यबाणी खबो

(मरकुस 9:30-32; लूका 9:43-45) 22 जद व गलील मं छा, तो ईसु न वासुँ खी, “मनख को बेटो मनख्यां क हाथ मं धोखा सुँ पकड़वायो जावगो। 23 अर व उनेँ मारगालगा पण वह तीन दनां मं मर्या होया मं सुँ फेर जिनदो होजावगो। ये सुण ताई चेला घणा कळेस करबा लाग्या।

## कर का भुगतान

24 जद ईसु अर ऊंका चेला कफ़रनहूम सहर मं पुग्या तो मन्दर क लेखें कर लेबाळा न पतरस क गोड़यां आर बुझी, काँई थाकां गरूजी मन्दर को कर न्ह देवें?, पतरस न ज्वाब दियो, हाँ, वह देव छ। 25 जद व घरां आग्या, तो ईसु न वा खबा की फेली वासुँ बुझी, हे शमोन, थारो काँई

बच्चार छ? धरती क राजा कुसुं चुंगी अर कर लेव छ? स्वयं अपना बेटा सुं या पराया सुं ?”पतरस न ऊ सुं खी,पराया सुं। 26 ईसु न ऊसुं खी,मल्लब ऊका खुद का बाळक न छूट रह’व छ। 27 पण म्हां ऊ मनख्यां न रोस कोई न्ह करां,ई लेख झील प जार अपना बाळ्या-ढोर फँका दें अर ज्ये मछुछी फेली पकड़बा मं आवें उका मुण्डा खोलज्ये थानें एक सिक्का मलगो। उनें लेर म्हारा अर थारें काण वानें दे द।

## 18

### सारा सुं बड़ो कुण छ

1 उई घडी चेला ईसु क गोड़यां आर बुझबा लाग्या,क सरग का राज मं बड़ो कुण छ? 2 फेर ईसु एक छोटा बाळक न अपना गोड़यां बलार व्हांकें बीचा मं खड़ो कर्यो। 3 अर खी,म्हूँ थासुं साँची खरियो छूँ,अगर थें मन कोन्ह बदळर छोटा छोरा-छोरीयां क नाई कोई न्ह होव तो, सरग का राज्य मं न्ह जा सक्क छ।” 4 ई लेखें ज्ये कोई अपना-आप न ई बाळक क नाई नरम बणावें छ,ऊ सरग को राज मं सब सुं बड़ो छ। 5 “ज्ये कोई म्हारा नाऊं सुं अस्यां बाळकां मं सुं कोई एक न बी अपनाव छ ,तो ऊ म्हेन बी अपनाव छ ।

### खोटा काम काण सजा

6 अर ईसु न खी,अगर ज्ये कोई ,यह छोटा मं सुं ज्ये म्ह प बस्वास करें छ, वा मं सुं एक न बी पाप क गेला मं ले जावें तो,परमेस्वर व्हांका काण घणो दंड देवगा पण अगर उ मनख क गळा मं घट्टी को पाट बांध’र समंदर क ऊण्डा मं पटकबा सुं भी व्हांक ताई परमेस्वर जादा दण्ड देगा। 7 “लोगां (मनख्यां) न इ संसार मं परमेश्वर न छोड’र पाप मं गराबा की परीक्षाये होती ई रहवगी। पण, हाय! व्हांन ज्ये मनख्यां न इ तरें परीक्षा मं गराव छ। (उकी कतनी भयंकर दशा होवगी!) 8 अगर थारो हाथ अर थारा पग थनं खोटा-गुनाह करवाव तो उनें काट’र फक्का द।क कस्यां तु एक हाथ को बण’र एक हाथबाळा या खोड़यो बण’र एक पगहाळा होर परमेस्वर क गोड़यां अमर जीवन मं चलजाबो थां क लेख ई सुं छोखा छ,क दो हाथ या दो पगां होर जे आग कदी बी कोई न्ह बझें,वह आग(नरक) मं पटक दिया जावें। 9 अगर थारी आँख थनं खोटा-गुनाह करवाव तो उन खाड़र फँका दें। 10 क कस्यां ,काणो बण’र एक आँख्यांहाळो होर परमेस्वर क राज्य मं चलजाबो थांकें लेखें ई सुं छोखा छ,क दो आँख हाळो होर नरक क आग मं पटक दिया जावें।

### गमी होई गाड़रो की बात

11 झांको,थें ये छोटा मं सुं कोई न भी नीच न्ह समझयो,क कस्यां म्हूँ थासुं खरियो छूँ,क सरग मं वांक दूत म्हारा सरग्य पिता क गोड़यां लगातार रह’व छ।(क कस्यां,म्हूँ,मनख को बेटा गम्यो होया न हेरबा काण आयो छूँ) 12 थें काँई सोचें छो?अगर था मं सुं ज्ये कोई क गोड़यां सौ गाडरा छ,अर वा मं सुं एक गाडर गम जाव,तो नन्नानवे न जंगळ मं छोड़’र।ऊ गमी होई गाडर न कोई न्ह हेरगो क? 13 अर अगर अस्यां होवें क वा उनें पावें तो म्हूँ थासुं साँची खरीयो छूँ,क वह ऊ निन्नानवे गाडरा क लेखें ज्ये गमी कोई न्ह छो अतनी खुशी न्ह आवगी जतनी ऊ गमी

होई गाडर पाबा क बाद मं खुशी आवगी। 14 अस्याँ ई थाका पिता ज्ये सरग मं छ,वांकी या अच्छया कोन्ह, क ये छोटा मं सुँ एक भी कोई न्ह गमँ।

## बरो करवाळा न समझायो

15 अगर थारो भाई थारा बरोध मं अपराध करँ ,तो जार अर एकला मं बातचीत कर'र ऊ सुँ समझा;अगर वह थारी सुण लेवँ तो थनँ अपणो भाई पा ल्यो। 16 अगर ऊ न्ह सुणँ तो एक या दो जणा न अपणा लारां ले जा,क हर एक बात दो या तीन गवाई का मुंडा सुँ ठीक हो जावँ । 17 अगर ऊ वांकी भी न्ह मानँ तो कलीसीया सुँ ख'दँ पण अगर ऊ कलीसीया की भी न्ह मानँ तो तू उन्ह अन्य जाति ज्ये परमेस्वर प बस्वास कोई न्ह करँ अर कर लेबाळा का जस्यां मान लँ। 18 म्हूँ था सुँ साँची खरियो छूँ,ज्ये कोई तु धरती प बांधगो ऊ सरग मं बांधगो अर ज्ये कोई तु धरती प खोलगो ऊ सरग मं खुलगो। 19 म्हूँ थासुँ फेर खरियो छूँ, अगर थां मं सुं दो जणा धरति प कोई बात क लेख ज्ये व माँग,एक मन हौर म्हारा स्वर्ग पिता सुँ अरज करँ तो वह वांक लेखँ पुरी हो जावगी। 20 क कस्यां जठी दो या तीन मनख म्हारा नाऊँ सुँ एकट्ठा होव छ,ऊँठी म्हूँ वांका बीचा मं होव छूँ।

## नर्दया दास की ढास्टान

21 फेर पतरस न ईसु क गोड़यां आर खी,हे परभु,अगर म्हारा भाई म्हारा बरोध मं अपराध करतो रह,तो म्हूँ कतनी बार उनँ माफ करूँ,काँई सात बार ताँई? 22 ईसु न उसुँ खी,म्हूँ था सुँ या कोई न्ह खरियो क सात बार ताँई माफ करँ पण सात बार का सत्तर गुणा ताँई माफ कर। 23 ई लेखँ सरग का राज्य अस्यां राजा क नाई छ, जिनेँ अपणा दासा सुँ लेखो(इसाब) लेबो छाये। 24 जद ऊ लेखो लेबा लाग्यो तो राजा क गोड़यां एक मनख लायो ग्यो,जिकँ दस हजार तोड़ा मातँ छा। 25 पण जद ऊकँ गोड़यां चुकाबा काण काँई भी कोई न्ह छो,तो वांका मालिक न हुकम दियो क उनँ अर ऊँकी लुगाई अर ऊँका छोरा-छोरि न अर ज्ये कोई ऊका गोड़यां छ,सारां न बेचर करज चुका दिया जावँ। 26 ई पँ ऊ दास न आड़ो पड़र ढोक देर ऊसुँ खी,हे मालिक,धीरज रखाण दिज्ये,म्हूँ थाका सारा पिसा चुका दियुँ। 27 फेर ऊ मालिक न ऊ दास प दया आई अर ऊनँ ऊको कर्ज माफ कर'र उनँ छोड़ दिया। 28 फेर जद ऊ दास ऊँठी सुँ जा रियो छो,तो ऊँक लारां को एक दास मल्यो,ज्ये ऊ सुँ सौ दिनार ले मल्यो छो;वह उनँ पकड़र ऊको गळो दबाबा लाग्यो अर खी,ज्ये थामँ म्हारा पीसा छ,उनँ लौटा द। 29 ई पँ उँको लारां को दास न आड़ो पड़र ढोक देर ऊसुँ खबा लाग्या,हे मालिक,धीरज रखाण दिज्ये,म्हूँ थाका सारा पिसा चुका दियुँ। 30 फेर भी ऊ कोई न्ह मान्यो,पण जार उनँ कोटडी मं भुजादियो;क ज्यांताई कर्ज न न्ह चुका देवँ,व्हांताई ऊठी(कोटडी) रह। 31 पण दूस्रा दास या सारी घटना न देखर घणा दुखी होया।अर वांनँ जा'र मालिक काण सारी घटना सुणाई। 32 जद ऊका मालिक न उनँ बलार ऊ सुँ खी,अरे निच,म्हूँ थारा वह सारा कर्ज माफ कर दिया क कस्यां थनँ म्ह सुँ दया की भीख माँगी छी। 33 काँई थनँ भी लारां का दास प दया कोई न्ह दिखाणी छायजे छी जस्यां म्हनँ था प दया करी छी? 34 जिसुँ ऊ मालिक घणा रोष मं होयो उनँ सताबाळा क हाथ मं सुपादियो, क ज्या ताई सारा कर्ज चुका न्ह देवँ,वां ताई ऊका हाथ मं रह। 35 ई तरँ सुँ अगर थें मं सुँ हर एक अपणा भाई न मन सुँ माफ न्ह करँ,तो म्हारँ पिता ज्ये सरग मं छ,था सुँ भी अस्यांई करगो।

## तलाक क बारा मं बात

1 जद ईसु ये बातां ख चुक्या छ,तो गलिल सुँ चलग्यो,अर यहूदियां क क्षेत्र मं यरदन नदी क पार आया। 2 अर एक बड़ी भीड़ ऊँठी ऊँकें पाछें हो ली अर ईसु न वह ऊँठी छोखा कर्या। 3 जद फरीसी मनख ऊँक गोड़यां आ'र ऊँकी बातां मं गलती पकड़बा काण ऊसूँ बुझबा लाग्या, काँई आपणा निम मं या उचित छ क,कोई मनख अपणी लुगाई न कस्या भी कारण सुं छोड़ सकेंक छ क? 4 ईसु न जवाबदियो,काँई थानें धर्म-ग्रन्ध मं कोन्ह बाच्या क जगत को रचबाळा न सरु मं ही सुँ वानें एक लुगाई अर एक आदमी क रूप मं बणाया छ। 5 ई लेख, मनख अपणा माँई-बाप सुं न्हाळा हो'र व्हांकी लुगाईयां क लारां रहगा अर वह दोनी एक तन होजाऊगा 6 ई कारण वह दोनी अबानु न्हाळा न्हाळा मनख कोई न्ह पण एक ही मनख छ। “ ई लेख,परमेस्वर ज्यानं जोड़या छ वहान न्हाळा मत करो।” 7 व्हांन ईसु सुं बोल्या, फेर मुसा न काँई काण या रखाण्या,क तलाक को कागज देर छोड़ देवें। 8 पण ईसु न व्हा सुँ खी, मुसा न या बात थारा आगला-बड़ा मनख्यां का मन की खरडाई देख'र उ कारण सुँ अपणी लुगाई न छोड़ देबा काण अनुमति दी पण सरु सुँ अस्यां रीती कोई न्ह छी। 9 पण म्हुँ थासुँ या खर्या छुँ क ज्ये कोई अपणी लुगाई काण व्यभिचार क अलावा कोई कारण सुँ तलाक देर दूसरी लुगाई सुँ ब्याव कर ले तो ऊ व्यभिचार कररियो छ। 10 चेला न ईसु सुँ खी,अगर लोग को अपणी लुगाई क लारां अस्यां सम्बन्ध छ, तो ब्याव करबा छोखा कोन्ह। 11 फेर ईसु न वासुँ खी,साराई ई बात न कोई न्ह मान सकें छ,खाली ज्यां काण या दान दियो ग्यो छ। 12 कोई अस्यां छ ज्ये अपणी माँई क पेट सुँ नपुंसक पैदा होया छ।अर कोई अस्यां छ ज्ये लोगां क द्वारा नपुंसक बणा दियो ग्यो छ। अर अंत मं कोई अस्यां छ ज्यानं सरग को राज्य क कारण ब्याव कोई न्ह करबा काण निश्चय किया छ। ज्ये इ उपदेश न मान सकें छ मान ले।”

## ईसु मसीह अर छोटा छोरा-छोरी

13 फेर कोई मनख छोटा छोरा-छोरीयां न ईसु क गोड़यां ले'र आया व छाव छां क ईसू व्हा छोरा-छोरीयां क माथा प हाथ धर'र पराथना करें पण ईसु क चेला वानें दकाल्या। 14 जद ईसु न या देख'र अपणा चेला सुँ बोल्या,”छोटा छोरा-छोरीयां न म्हारा गोड़यां आबा द्यो अर व्हांन मत रोखो,क कस्यां सरग को राज्य अस्यां मनख्यां काण बणायो छ।(ज्ये कोई मनख ऊ छोटा छोरा-छोरीयां क नाई होव छ।) 15 तो ईसु वह छोटा छोरा-छोरीयां क माथा प हाथ धर'र आशीरवाद द्यो अर ऊँठी सुँ चलग्यो।

## पीसाहाळो मनख की बात

16 अर झाँको,ऊँठी एक मनख ईसु क गोड़यां आर बुझबा लाग्यो,”औ! गरुजी,म्हुँ परमेस्वर क लारां अमर जीवन पाबा क ताँई कस्यो भला काम करूँ?” 17 ईसु ऊ सुँ बोल्ह्यो,” तू म्ह सुँ भला क बारां मं काँई काण बुझें छ? खाली एक ही भलो छ अगर तु अमर जिवन मं जाबो छावें छ तो निम न मान ले ज्ये निम न परमेस्वर ऊका दास मुसा सुँ दे दियो। 18 ऊ मनख न बुझी कस्या निम? तब ईसु न खी,हत्या मत करज्ये,व्यभिचार मत करज्ये,चोरी मत करज्ये,दूसरा का

बरोध मं झूठी गुवाई मत दिज्ये, 19 अपणा माँई-बाप को आदर करज्ये।” अर अपणा पड़ोसी सुँ अपणा समान प्रेम करज्ये। 20 उ मोटयार मनख न ईसु सुँ बोल्यो, ”ये सारा निम न तो म्हुँ मानतो आयो छुँ।” फेर म्ह मं काँई बात की कमी छ? 21 तो ईसु न व्हा सुँ खी, अगर तू संपूर्ण बणाबा छावै छ, तो तू जा’र थार गोड़या ज्ये काँई चीझ छ व्हा सारी न बेच’र गरीब लोगां काण बाँट द, अर थार ताँई सरग मं धन मल्हगो। फेर तू म्हारो चेलो होजाव।” 22 पण ई बात न सुण’र ऊँको मुंडो लटकग्यो अर ऊ घणो दुखी होर ऊँठी सुँ चलग्यो, क कस्यां ऊ घणो पीसाहाळो मनख छो। 23 तब ईसु न अपणा चेला सुँ खी, पीसाहाळा मनख्यां को सरग का राज्य मं जाबो कत्नो खडौं छ “ 24 फेर म्हुँ थाँसुँ खरियो छुँ, क ऊँठड़ा को सूई का नाका मं उळबो घणो खडौं छ पण ऊ सुं बी घणो खडौं छ पीसाहाळा मनख को परमेस्वर का राज्य(सरग) मं जाबो। 25 या सुणर व खूब सोच मं होर बुझबा लाग्या, फेर कुकै काण छुटकारा हो सकै छ?” 26 तो ईसु न चेला क आड़ी देख’र खी, मनख क ताँई या बात असम्भव छ पण परमेस्वर क ताँई कोई न्ह, क कस्यां परमेस्वर क लेख सारा काम सम्भव छ”। 27 पतरस ईसु सुँ ख’बा लाग्यो, क देख, म्हां तो सारी चीझां न छोड़’र थाँकै पाछै आया छां, तो म्हांनै काँई मलगो”। 28 फेर ईसु न ऊँ सुँ खी, ”म्हुँ थाँसुँ साँची खरियो छुँ, क नया जुग मं जद मनख को बेटो अपणा म्हमा का सहासन प बठगो तो थें भी ज्ये म्हारै पाछै हो लिया छो, बारह सहासनों प बठ’र इस्राएल की बारहां जनजातियों को न्याय करै। 29 ज्ये कोई म्हार काण अपणा घरबार, भाई-बहणयां, माँई-बाप, छोरा-छोरी अर खेती-बाड़ी न छोड़ द्या छो, वाँक ताँई अबानु ई धरथी प सौ गुणा भाग मल्लगो, अर अमर जीवन क हकदार होवगा। 30 इ संसार का लोग-दणीयां क वाळ ज्याँनै अबार खास मनख करया जावै छ, उ बगत व्हांनै खास मनख कोई न्ह करया जावगा; अर लोग-दणी क वाळ अबानु ज्ये खास मनख कोई न्ह करया जावै छ, उ बगत व्हांनै खास मनख करया जावगा।”

## 20

### बाडी का महन्तियां क ढास्टान

1 सरग को राज ऊ धणी(जमीनदार) क नाई छ ज्ये तड़काव मं अपणी अंगूर की बाड़ी मं काम करबा क लेखै महन्तियां लाबा काण खढ़ग्या। 2 ऊ धणी न हर एक महन्तिया काण चाँदी का एक रुपया रोज देबा काण ख’र महन्तियां न अपणी अंगूर की बाड़ी मं काम करबा काण खन्नाया। 3 “नौ बजे क लगभग ऊ धणी न फेर घरां सुँ खढ़यो अर उनेँ देखा क कोई लोग बजार मं अठी-ऊँठी बना फालतु ऊबा देख्या। 4 अर वासुँ खी थें भी अंगूर की बाड़ी मं जाओ, म्हुँ थाँकाण ज्ये कोई उचित होवगा, दियुँ। 5 तो व बाड़ी मं काम करबा काण चलग्या। फेर बारह बज्यां अर तीन बज्यां की लगभग उनेँ बाहर खड़र ऊस्याँई करी। 6 कोई पाँच बज्या व्हा फेर अपणा घरां सुँ बाहर खड़ियो अर कोई लोगां क बाज़ार मं अठी-ऊँठी ऊबा देख्या। उनेँ वासुँ खी, थाँ अठी दन भर बनाफालतु मं काँई काण ऊबा रह’व छो?” 7 वानै खी, क कस्यां कोई भी म्हांनै म्हन्त प न्ह लगाया। फेर धणी(जमिन्दार) न खी, थें भी म्हारा अंगूर की बाड़ी मं चल जावो। 8 जद स्याम होई तो अंगूर की बाड़ी का धणी न अपणा मन्सी(मुनिम) बलार खी, महन्तियां न बलार आखरी सुँ लेर फहली लगाया ग्या महन्तियां ताँई सारां क ताँई म्हन्त(मजदूरी) दे दें। 9 तो व महन्तियां

ज्ये पाँच बजे लगाया गया छा, जद व आया अर वा सारा क ताँई चाँदी का एक रुप्यो मल्यो। 10 फेर ज्ये फहली लगाया गया महन्तियां न सोची क म्हाँन कोई जादा मलगो पण वांकाण भी हर एक क एक ही चाँदी क रुप्या मल्यो। 11 रुप्या तो वानें ले ल्या पण धणी सुँ शिकायत करता होयो 12 वानें स्त्री, ज्ये बाद मं लगाया छा, वानें बस एक घंटो काम कर्या छ, अर थनं म्हाँक भी उतना ही दिया जतना वांक ताँई दिया छ, अर म्हाँ सारा दन भर बळबळती तावड़ा मं काम कर्या छा। 13 फेर उनें वा मं सुँ एक काण ज्वाब दिया, है भाईलाओ, म्हाँ थांक लारां कोई अन्याय न्ह करदियो छूँ; काँई थनं म्ह सुँ चाँदी क एक रुपया की न्ह ठहरिया क? 14 ज्ये थारो छ, उनें लेर चल जा, म्हारी मर्जी या छ क जतना थांक ताँई दिया उतना वांक ताँई भी दिऊँ ज्ये सब सुँ पाछें लगाया गया छ। 15 काँई म्हार लेख या उचित कोई न्ह क अपणा धन का ज्ये म्हाँ छाऊँ वह करुँ? काँई तू म्हारा भला होबा क कारण बरी नजर सुँ देखें छ क ? 16 ई तरें सुँ जतना मनख अबानु पाछें छ अतना मनख पहली हो जावगा। जतना मनख अबानु पहली छ वह पाछें हो जावगा। ईसु को अपणें मरबा क बारा मं तीस्री दफें बताबो (मरकुस 10:32-34; लूका 18:31-34) 17 जद ईसु अपणा बारह चेला क लारां यरुसलेम जाया छा तो उ बगत मं ऊ बारह चेला न न्हाळा ले जार वा सुँ गेला मं खबा लाग्यो, ज्ये उ प आबाळी छ। 18 “क सुणो, आपण यरुसलेम जाया छा, ऊंठी अस्यां करेगा, मनख का बेटो न पकड़र प्रधान याजकां अर यहुदियां का निम सखाबाळा मनख्यां क हाथ मं सुंप देगा। अर व वानें ज्यान सुँ मारबा की सजा देगा। 19 फेर व ऊनं ज्ये यहूदी कोई न्ह व्हाँक हाथ मं सुंपेगा। अर व ऊंकी हाँसी-मजाक उड़ाऊगा, अर कोड़ा मारगा, अर उनें कुरुँस प चढ़ावगा पण वह तीन दन मं मुरदा मं सुँ फेर जीन्दा हो जाऊगा।

## एक माँ की अरज

20 फेर जब्दी क बेटा याकूब अर यूहन्ना की माँई अपणा बेटा क लारां ईसु क गोड़यां आर ढोक देर ऊ सुँ कोई काँई मांगबा लागी।” 21 ईसु न ऊ सुँ स्त्री, “म्ह सुँ थांकताँई काँई छाव छ?” वह ज्वाब दिया, “थाका महमाभर्या राज मं थां म्हारी दोनी बेटा न एक थांकें जीवा हाथ क आड़ी अर दूसरा न कण्डया हाथ क आड़ी बठबा को कोल कर दिज्ये। 22 ईसु न उ सुँ स्त्री, थां जाणें कोई न्ह ! क थां काँई मांगर्या छ? काँई थां, म्हार नाँई घणा दुख उठा’र मर सकें छ क?” व्हाँनं उत्तर दिया, हाँ, म्हाँ बी अस्यां कर सकां छां!” 23 फेर ईसु न वासुं स्त्री, हाँ, म्हाँ जाणु छूँ, क थें भी म्हार नाँई जरूर घणा दुख उठा’वगा पण ज्यां म्हारा जीवा अर कण्डया हाथ क आड़ी बठ’र म्हारा राज्य मं म्हारा लारां राज करबाळा कुण होऊगो, म्हाँ बता न्ह सकें छूँ। पण म्हारें पिता परमेस्वर बता सकें छ क कुण म्हारा लारां बठ’र राज करेगो, क कस्यां वह पहली सुँ तयार कर मल्यो छ उ कुण हो सकें छ”। 24 जद दूसरा दस चेलां या सुण’र याकूब अर यूहन्ना सुँ रोस मं होग्या। 25 तो ईसु वानें आपण गोड़ें बला’र व्हा सुँ स्त्री, थां जाणें छ, क परदेसी प राज करबाळा मनख, व्हा प हुकम चलावें छ अर उ मं सुँ ज्ये बड़ा छ, व्हा प अधिकार जताव छ। 26 पण थां मं अस्यां कोई न्ह, पण ज्ये कोई थां मं सुँ बड़ो होबो छाव छ ऊ सन्दा क ताँई सेवक बणजावो। 27 अर थां मं सुँ ज्ये कोई प्रधान होबो छाव छ ऊ सारा को हाळी बणजावो। 28 क कस्यां म्हाँ, मनख को बेटो ई लेख ई दुनीया मं न्ह आया क दूसरा मनख्यां क वाळ म्हारी सेवा करबा काण, पण ई लेख आयो छूँ क वह दूसरा मनख्यां की सेवा करबा अर घणा न पाप सुँ छुड़ाबा काण अपणी ज्यान देबा काण आया छूँ।



## परभु ईसु न अंधां काण आँख्यां देबो

(मरकुस 10:46-52; लूका 18:35-43) 29 अर जद ईसु अर ऊँक चेला यरीहो नाऊँ का एक सहर मं सुँ खढ़र जा रिया छा तो एक घणी भीड़ वांक पाछे चाल पड़ी। 30 ऊँठी दो आंधां गडार क साइराह बठया छा। अर जद वाने सुणी, क ईसु अठी सुँ जायों छ, ऊ ऐला पाड-पाडर ख'बा लाग्यो, "है परभु, दाऊद की सन्तान, म्ह प दया कर। 31 तो घणा मनख उने दकाल'र बोल्यो, "तू छानो रह पण ऊ ओर बी जोर जोर सुँ ऐलो पाडबा लाग्यो "है परभु, दाऊद की सन्तान म्ह प दया कर "। 32 तो ईसु ऊँकी सुण'र डटग्या अर वाने बलाया अर खी, म्ह सुँ थाके ताँई काँई छाव छ, म्हूँ थाके काण करूँ?" 33 वह आंधां न बोल्यो, ओ परभु, म्हां देखबा छाव छां।" 34 ईसु न वां प तरस खार वांकी आँख्यां प हाथ अडस्या, अर हाथ्युहात व देखबा लाग्या अर व ईसु क पाछे चाल दर्या।

## 21

### यरूसलेम मं ईसु की जै-जै कार

1 फेर जद ईसु अर ऊँका चेला यरूसलेम क गोडे जैतुन डूंगर प बैतफगे क गोड़यां पूग्या तो ईसु अपणा चेला मं सुँ दो न बलार या ख'र खन्नाया 2 क अपणा सामह का गाँव मं जाओ। अर व्हां पूगताँई थाने एक गधी क लारां बच्चेरो भी बन्धयो होयो मलगो। अर उ न ऐड'र म्हारें गोड़यां ल्यावो। 3 अगर थां सुँ कोई बुझें तो, क 'थां काँई कर्या छ'? थां वा सुँ खीज्यो, क परभू काण ईकी जरूरत छ अर व थांकलारां उ न बेगो सोक खन्नादेगा। 4 यो ई लेखें होयो क ज्ये बचन परमेस्वर की भविष्यबाणी खबाळा न खी छी वा पूरी होवें: 5 "सिओन नाऊँ का नगर मं रहबाळा सुँ ख, झाँको, थारा राजा थारें गोड़यां आरियो छ। ऊ नम्र छ, वह गधी प बठयो छ, हाँ, गधी का बछेरा प बठयो छ।" 6 क व दो चेला न जा'र जस्यां ईसु न वांसुं खी छी वस्यां(उस्यां) ही करया। 7 अर व गधी अर बच्चेरा न ईसु क गोड़यां ल्याया उ न ऊँका लत्ता ऊ पे पटकद्या अर ईसु ऊ प बठग्यो। 8 अर जद ईसु ऊ पे बठ'र जाया छा तो लोग-दणीयां न गेला मं अपणा लत्ता ऐड'र बछाबा लाग्या अर कोई कोई लोगा न माळ मं सुँ हरी-भरी डाळयां काट'र आवभगत करबा काण बछादी। 9 अर ईसु क आगह-पाछह चालबाळा मनख, हेला पाड़- पाड़र ख छा ,

राजा दाऊद की सन्तान की होसन्ना !

भला छ, ज्ये परभु क नाऊँ सुँ आर्या छ ,

परभु ज्ये स्वर्ग मं बिराज्यो छ! होसन्नाe"

10 जद वाने यरूसलेम मं उळ्यो तो सारा नगर मं भगदड माच गी अर सारा बुजबा लाग्या, "यो कुण छ?" 11 अर भीड़ का लोग-दणी खर्या छा, यो गलील इलाका का नासरत गाँव को रहबाळा परमेस्वर क आड़ी सुँ भविष्यबाणी खबाळा ईसु छ।

### मन्दर मं ईसु

12 ईसु न परमेस्वर का मन्दर मं जार , व साराई न ज्ये लेण-देण कर्या छा, व सनदाँई बाहर



खाड़दिया।अर रपया लेण-देण करबाळा की पेटियां अर कबूतर बेचबाळा की पेटियां उन्दि कर दी। 13 अर ईसु वाँ सुँ ख'बा लाग्या, पबित्र सास्त्र मं या मण्डी छ, क “म्हारो घर पराथना करबा को घर खुवावगो,पण थानें यो घर डाकूवा की खोळ बणा दि' छ।” 14 मन्दर मं कोई आंधा अर लंगडा ऊँकें गोड़यां आया,अर ईसु न व सारां ई छोखा कर दिया। 15 अर जद प्रधान याजकां अर यहूदियां का निम सखाबाळा मनख न ईसु क वाळ कर्या अचम्बा कामां को देख्या अर मन्दर मं बच्चा हेलो पाड़र या ख'ता सुणा, “दाऊद की सन्तान की होशना(जै हो)!” 16 तो व घणा रोस मं होर ऊ सुँ खबा लाग्या, कोई तु सुणरियो छ क,क या कोई खरियो छ? ईसु न वासुँ खी, “हाँ,सुणें छूँ।काई परमेस्वर की पवित्र पोथी मं थानें या कदी भी न्ह पढ़यो, क छोटा बच्चा अर दुध पीते बच्चा क मुण्डा सुँ थनं स्तुती करवाई छ।” 17 फेर ईसु वानें छोड़र यरूशलेम नगर सुँ बाहर बैतनिय्याह नाऊँ का सहर को चल गया। ऊँठी व रात ठहरया।

## अंजीर को रूखड़ो

18 आगला दन जद व नगर मं पाछो आरिया छा,तो ईसु न भूख लागी। 19 अर ईसु न अंजीर नाऊँ को एक रूखड़ो गेला क सायरा देख'र, वह ऊँकें गोड़यां ग्या, जि सूँ ऊँका फळ खाबा काण।पण ऊ रूखड़ो मं पत्ता न छोड़'र काई बी न्ह मल्यो छो, ईसु ऊ अंजीर का रूखड़ो सूँ बोल्यो,“अबार सूं थार कदी बी फळ न्ह आवगा” अर अंजीर क रूखड़ो होथ्योहात सुख्या।” 20 ये देखर चेला न अचमभाव कर'र खबा लाग्या,अंजीर क रूखड़ो हाथ्योहात कस्यां सुख्या?।” 21 ईसु न वा सुँ खी,महूँ थां सुँ साँची-साँची खुँ छूँ,अगर थें परमेस्वर प बस्वास राखो अर सक कोन्ह करें,तो थां खाली या कोई न्ह करगो,ज्ये या अंजीर क रूखड़ो क लारां कर्यो ग्यो छ;पण अगर थें ई डुंगर सूं ख क,तू अठी सूं हट'र समन्दर मं डूब जा, तो अस्यां ही हो जाएगा। 22 अर ज्ये कोई थां परमेस्वर सूं पराथना मं बस्वास कर'र मांग तो ,ऊ सब थांकताई मल जाऊगो।

## ईसु का हक क बारा मं सवाल

23 एक दन अस्यां होई क जद ईसु मन्दर मं लोग-दणीयां काण उपदेस देरियो छो तो प्रधान याजकां अर यहूदी पराणा मनख वहाँकें गोड़यां आ'र बुड़बा लाग्या,तू य काम कूँका हक सूं करें छ अर यो हक थारताई कुनँ द्यो छ?” 24 ईसु न वाँकें ताई जुवाब दियो, क महूँ बी थां सुँ एक बात बूझुं,थां म्हारताई बताओ।तो महूँ भी थांक ताई बताऊँ, क या काम कूँका हक सुँ करियो छूँ। 25 बतावो,यूहन्ना को बत्तिसमा देबा को अधिकार कठी सुँ मल्या? परमेसवर सूं मल्यो या केवल मनखयां सुँ मल्या? व ईसु की ई बात न सुण'र अपणा- आप मं बतळाबा लाग्या,अगर म्हां खवां,वहाँकें बत्तिसमा देबाकाण परमेसवर सूं अधिकार मल्यो छ,तो यह म्हां सुँ खवगो,तो थानें खामी वहाँकी खबर प बसवास कोन्ह कर्यो।” 26 पण अगर म्हां या खवां,क वहाँकें बत्तिसमा देबाकाण मनखयां सूं अधिकार मल्यो” तो आपण न भीड़ का लोग-दणीयां को डरें छ क कस्यां सारा लोग-दणी यूहन्ना न परमेसवर की भविष्यबाणी खबाळो मानें छा।” 27 तो व्हांन ईसु काण उत्तर द्या,म्हां काई बी न्ह जाणां,क वहाँको बत्तिसमा देबाकाण अधिकार कठी सुँ मल्यो छो”

ईसु न व्हांकी ई बात न सुण'र वांसूं बोल्यो,महूँ बी थांकताई न्ह बताऊँ क महूँ किंका अधिकार सूं ये काम करूँ छूँ।

## दो बेटा की ढास्टान

28 अबानु थें ईकें बारां मं काँई सोचरिया छो? एक मनख क दो बेटा छा अर ऊ मनख बड़ा छोरा क गोड़यां गया अर खी, बेटा आज म्हारें अंगुर की बाड़ी मं जार काम कर लें। 29 बेटा न ज्वाब दियो, म्हारी मर्जी कोई न्ह छ अंगुर की बाड़ी मं जाबा काण, पण बाद मं ऊका मन बदलग्यो अर वह अंगुर की बाड़ी मं काम करबा काण चल ग्यो। 30 फेर भाईजी न दुस्रो बेटो क गोड़यां जार ऊ सुँ भी ऊस्याँई ही खी। उनेँ ज्वाबदियो, 'जी हाँ, 'म्हूँ जावँ छूँ, पण ऊ न्ह ग्यो। 31 बताओ, ये दोनी मं सुँ भाईजी की अच्या पुरी कुन्ह करी? वानें खी, बड़ो बेटो न।" ईसु न वासुँ खी, म्हूँ थासुँ साँची खरियो छूँ चुँगी लेबाळा अर वेश्या था सुँ फहली परमेस्वर का राज्य मं जावगी। 32 या म्हूँ इ लेख खरियो छूँ क कस्यां बत्तिस्मा देबाळा यूहन्ना थाँक ताई जीवन को सही गेलो दिखाबा आयो अर थानें ऊकी खबर प बसवास कोई न्ह कर्या। पण चुँगी लेबाळा अर वेश्याओं न ऊकी खबर प बसवास कर्या अर पाप क गेला सुँ मन बदल्या। पण थानें जद या देखर भी पाप क गेला सुँ मन कोन्ह बदल्या अर ऊकी खबर प बसवास कोई न्ह कर्या।

## खराब खास्तगार की ढास्टान

33 फेर ईसु एक ओर ढास्टान व्हां काण बताबा लाग्यो अर खी; एक दफ एक मनख न अंगूर को बाग लगायो, अर उकें च्यारोंमेर बाड़ कर दी, अर अंगूरां को रस खाड़ बाकाण एक कुण्ड खोद्यो, उनेँ रूखाळी करबाकाण एक ढामडो बणायो। फेर वह ऊ अंगूर का बाग न दूसरा खास्तगारां काण ठेको दे'र घुम्बा काण दूर देस मं चलग्यो। 34 जद अंगूर का फळ पाकबा की ठँम आई तो उनेँ अपना नोखरा मं सुँ कोई न उ खास्तगारां सुँ अंगूर का बाग मं ऊको इस्सो ले'र आबा काण खन्नाया। 35 पण खास्तगारां ऊका नोकरा न पकडर कोई को दि, अर कोई प भाटा फकया अर कोई तो मारगाल्यो। 36 फेर मालिक न एक बार फेर फहली सुँ घणा नोकरा न व्हांकें गोड़यां खन्नाद्या; व्हांनेँ वह नोकरा क लारां भी अस्याँई करी जस्याँई फहलीयां क नोकरा सुँ कर दिया। 37 आखरी मं उ मालिक न अपना बेटो न व्हांक गोड़यां यह खर खन्नाद्या क व म्हारा बेटा को आदर करगा अर ज्ये म्हारो इस्सो छ उनेँ बी उ काण देवगा। 38 पण जद उ खास्तगारां न वह आतो देख्यो, व अपना- आप सुँ खबा लाग्या क, देखो", ऊ आर्यो छ ज्ये य अंगूर क बाग को वारिस छ। आओ, आपण उनेँ मारगालां, तो ऊकी सारी सम्पती आपण ले लां"। 39 अर जद ऊ आयो, तो ऊ व्हांनेँ पकड़'र अर अंगूर की बाड़ी क बाहर खाडर मारगाल्यो। 40 उ बगत मं ईसु न वा सुँ बूझी, थें काँई बच्चियार कर रियो छो, जद उ अंगूर की बाड़ी को मालिक आयगा तो वह उ खास्तगारां को काँई करगा? 41 वानें ऊ सुँ खी, वह आ'र उ बुरा खास्तगारां को बुराई रीति सुँ नास करगो अर उ अंगूर की बाड़ी न दूसरा खास्तगार क ताँई ठेका मं दे देगो, ज्ये समय प ऊका हिस्सा देगो। 42 काँई थानें पबित्र सास्त्र मं यो बचन न्ह बाची क, " कारीगरां न ज्ये भाटो बेकार समझर फंकाद्यो छो वह कूण्यां को खास भाटो होग्यो"। 43 यो परभु सुँ होयो छ उ आपणी नजर मं खूब अच्छमबो दिखह छ।" ई लेखेँ म्हूँ थासुँ खरियो छूँ क परमेस्वर को राज्य थासुँ कुसकाल्या जावगो अर वह ऊ लोगां काण दे दिया जावगा ज्ये ऊका राज्य क अनुसार बर्ताव(बुवार) करेगा। 44 "अर ज्ये कोई उ भाटा प गरगो टुकड़ा-टुकड़ा हो जावगो, अर ज्यां प उ गरगो, तो व्हांनेँ गूंद गालगो। 45 अर जद प्रधान याजकां अर फरीसियां न

यो दास्तान सुणयो, व समझग्या क वह खराब कास्तगारां अर कारीगरां ज्ये भाटो बेकार समझर फंकाद्या, ये सारी बातां ईसु न आपणा बरोध मं खी छ। 46 ई लेख व ईसु न पकड़बो छाव छा पण व भीड़ सुँ डरपग्या क कस्यां लोग-दणी ईसु न परमेस्वर की भविष्यबाणी खबाळा मानें छा।

## 22

### बड़ा भोज को दास्तान

1 एक बार फेर ईसु वासुँ दास्ताना मं खबा लाग्यो। उनें खी, 2 सरग का राज ऊ राजा क नाई छ ज्याँन अपणा छोरा का ब्याव मं बड़ा भोज की तयारी कर रियो छो। 3 राजा न अपणा दासां को खन्नायो क वह मनख न बुला ल्यावो जिक ताँई ब्याव की बड़ा भोज मं जिम्बा काण नुता दियो छ। पण वह मनख कोई न्ह आया। 4 फेर वह आपणा नोकरा सुँ खर खन्नाया क अपणा फावणा सुँ यह खो, देखो, म्हनें भोजन तयार कर मल्यो छ। म्हारा छोखा अर मोटा ताजा जानवरां न काटिया जा चुक्या छ। सबी तयार छ; अबार ब्याव को भोज मं बेगो आजावो। 5 पण वह मनख न ऊ प काँई भी ध्यान न्ह दियो। अर व अपणा गेला मं चाल दर्या। कोई अपणा खेत मं काम करबा लाग्या तो कोई अपणा काम धन्धा प छ। 6 अर कोई मनख न राजा क नोकरा न पकड़र वाँकें लारां गलत बुवार कर्यो अर मार गाल्यो। 7 जिसुँ राजा न रोस मं होर अपणी सेना खन्नार व ऊ हत्यारा न मारर वाँका नगर मं आग लगा दी। 8 ऊ राजा न अपणा दास सुँ खी, ब्याव को भोज तयार छ पण व ज्ये बलाया गया छ व जिम्बा क लायक न्ह खडिया। 9 ई लेख गळि क चोराया मं जावो अर जतना भी थानें मलें, व सारा नें ब्याव क भोज मं बला ल्यावो। 10 फेर नोकरा गळीयां मं गया अर वान्ह बरा, भला मनख कस्या भी मल्या साराई एकट्ठा कर्या अर ब्याव को घर फावणा सुँ भरग्यो। 11 पण जद फावणा न देखबा काण राजो आयो तो ऊँठी उन्ह एक अस्या मनख देख्यो, ज्ये ब्याव का लत्ता न्ह पहरियो छो। 12 राजा न उ सुँ खी, ‘हे भाईला, ब्याव का लत्ता पहरिया बना कस्यां यहाँ भीतर आग्यो ? पण ऊ मनख काँई भी न्ह बोल्यो। 13 तब राजा न अपणा नोकरा सुँ खी, ‘यहाँक हाथ-पाँव बाँधर बाहर उन्धेरा मं फेंक द। ज्याँ मनख रोबो अर दाँत चाबबो होवगो। 14 “क कस्यां बलाया होया तो घणा छ पण थरप्या होया थोड़ा छ।”

### कैसर राजा क ताँई चुंगी(कर) देबा की बात

15 फेर फरीसियां न जाँर एक सभा बलाया, जिसुँ व ई बात क आमँ-सामँ बच्यार करयो क ईसु न ऊँकी आपणी ही खी होई बातां मं कस्यां फँसावा जा सकू छ। 16 अर वानें अपणा चेला हेरोदियां क लारां ऊक गोड़यां खन्नाया। ऊ मनख न ईसु सुँ खी, “हे गरूजी”, म्हां जाणें छां क थां सीधा मनख छ। थां परमेस्वर का गेला न सच्याँई सुँ सखावें छ। अर थां कोई का मन का बचियार क ऊपर परवा न्ह करह छ, क कस्यां थां मनख्यां का मुण्डा देखर बातां कोन्ह करह, पण ज्ये ज्ये बात परमेस्वर आपण सुँ छाव छ वह बातां न मनख क ताँई सखाव छ। 17 ई लेख म्हांनें बताओ, क कैसर (ज्ये रोम देस को म्हाराजो छ) काण चुंगी देबो उचित छ या कोई न्ह? 18 ईसु वांकी चुगली जाणर वासुँ खी, “हे कपटियां! थां खामी म्हनें परखें छ? 19 “म्हार ताँई रोम देस की दमडी दिखावो जिसुँ कर चुकायो जावें छ अर व ऊँक गोड़यां एक दमडी ल्याया। 20 “अर

ईसु न वा सँ बुझी, क ई दमडी मं कुंको फोटु अर नाऊँ छ?" 21 तो वानें उत्तर दिया, कैसर ज्ये रोम देस को महाराजो छ" तब ईसु न वां सँ खी, छोखा छ, तो ज्ये कैसर(महाराज) को छ वह कैसर(महाराजा) क ताँई दे दीज्ये , ज्ये परमेस्वर को छ वह परमेस्वर क ताँई दे दीजिये। 22 व ईसु का उत्तर सुणर खूब ताजुब(चकित) होग्या अर उनें छोड़'र खड़ग्या।

## ब्याव अर फेर जिन्दा होबा क बारां मं बात

23 ऊ दनां मं सदुक्की नाऊँका यहूदीयां क एक झुन्ड का मनख छ ज्ये या बस्वास करह छा क मनख मरबा क बाद मं पाछें जीन्दो न्ह हो सकैक छ। व ईसु क गोड़यां आया अर ऊँ सुँ बूज्बा लाग्या। 24 गरूजी, नरां दन पहली परमेस्वर क दास मुसा न पवित्र सास्त्र मं आपण ताँई या माण्डी छ, "क अगर कोई कोई मनख बना सन्तान प'दा कर्या मर जावें अर उंकी लुगाई रह जावें, तो ऊंको भाई अपणा मर्या दादा की लुगाई सँ ब्याह कर'र अपणा भाई काण सन्तान प'धा करे लें 25 अब, म्हाँक अठी सात भाई छ। पहला भाई न एक लुगाई क लारां ब्याह करल्यो अर जद उ मरग्यो तो उको एक छोरो-छोरी बी कोई न्ह होयो। अर छोरा-छोरी न्ह होबा क कारण अपणी लुगाई न अपणा भाई क गोड़यां छोड़ग्यो। 26 तो ई तरह सुँ दूस्रा भाई अर तीस्रा भाई न बी करदिया। अस्यां सातु भाईयां न व्हाँकी भोजाई क लारां ब्याव करल्यो। 27 फेर सारां क पाछ वह लुगाई बी मरगी। 28 जद परमेस्वर मरया मनख न जीन्दा करह छ तो व्हा लुगाई कुंकी लुगाई होवगी क कस्यां व्हा लुगाई सातु की लुगाई बणगी छी। 29 फेर ईसु न वासँ खी, काँई थां परमेस्वर क वचन अर परमेस्वर क सक्ती न कोई न्ह जाणया, ई सुँ थां भटक ग्या छा। 30 क कस्यां जद परमेस्वर ऊ मरया मनख न पाछा जिन्दा करेगा व्हाँई(सरग) ब्याह -शादी कोई न्ह करगा तो व सारां सरग मं परमेस्वर क स्वर्ग दूत क नाँई होवगा। 31 पण मरया मनख पाछा जिन्दा होबा क बारां मं काँई थां यह बचन कदी भी कोई न्ह बाची क? ज्ये परमेस्वर न था सुँ खी छी। 32 "क म्हाँ इबराहिम को परमेस्वर छूँ, इसाहाक को परमेस्वर छूँ अर याकूब को परमेस्वर छूँ " परमेस्वर मरया मनख का परमेस्वर कोई न्ह, पण ज्ये जीवता मनख छ व्हाँका परमेस्वर छ। थां तो कतई खराब समझग्या । 33 जद लोगां न यह सुण'र तो ऊकी उपदेश प व घणा सोच मं पड़ ग्या।

## सब सँ खास निम

34 जद फरीसियां न या सुणी क ईसु न अपणा उत्तर सुँ सदूकियां का मुण्डा चुप करा दिया छ तो व सारांई एकट्ठा होया। 35 अर वामं सुँ एक यहूदियां की निम सखाबाळा ईसु न परखबा काण, ऊसुँ बूझी, 36 ,हे गरूजी, परमेस्वर का निम मं सुँ कस्यो निम सब सँ खास छ?" 37 तो ईसु न व्हाँ सुँ खी , तु परमेस्वर अपणा परभु सँ अपणा सारा मन सँ अर अपणा सारा प्राण सँ अर अपणी सारी बुद्धी सँ प्रेम राखज्ये। 38 सब सुँ बड़ी अर मुख्या निम तो योई छ। 39 अर ऊंकी समान दूसरी भी या छ, जस्यां तु अपणा -आप सुँ प्रेम करह छ अस्यां तु थारां पड़ोसी सुँ प्रेम राखज्ये। 40 सारी सास्तरें अर परमेस्वर क आड़ी सुँ भविष्यबाणी बोलबाळा की पोथ्याँ ई दोनी निम प टक्या छ।

## मसीह किको बेटो छ

41 जद फरीसी एकट्ठा छा तब ईसु न वासुँ एक सवाल बूझयो। 42 मसी क बारां मं थाँ काँई सोचरिया छ क वह किका बेटा छ? वानेँ ऊ सुँ खी,ऊ राजा दाउद को।” 43 फेर ईसु न वा सुँ बूझी, तो दाऊद पवित्र आत्मा मं होर उनेँ परभु काँई काण ख छ? 44 परभु न म्हारा परभु सुँ खी। म्हारा जीवां हाथ क आड़ी बठ्या रिज्यो ज्यां अधिकार अर सक्ति होवें छ”जदताँई म्हूँ थारा बरोद्ध मं काम करबाळा मनख न थारा पाँवां क तण धूल न्ह कर द्युँ 45 “फेर जद दाऊद तो मसीह न परभू ख छ, अर मसीह ऊको बेटो कस्यां हो सकें छ?” 46 ऊको ज्वाब मं कोई भी ऊसुँ कोई न्ह ख सका;पण ऊ दन सुँ कोई को भी फेर ऊ सुँ काँई कोई बूझबा की हिम्मत न्ह होई।।

## 23

### यहुदियां की निम सखाबाळा अर फरीसियां की पाखण्ड

1 तब ईसु न भीड़ सुँ अर अपणा चेला सुँ खी 2 यहुदियां क नीम सखाबाळा अर फरीसि मुसा क विधान की गद्दी क अधिकारी छ। 3 ई लेख व थासुँ ज्ये काँई ख उनेँ करदिज्ये अर मानलिज्ये।पण ज्ये व करें छ उनेँ मत करो क कस्यां व ख’तो छ पण करें कोई न्ह। 4 व धर्म निमां क अस्यो भारी बोज बाँधर मनख्यां का खाँधा प लाद देव छ जिनें लेजाबो खड़ों छ पण खुद उनेँ आंगळी सुं भी सरकाबो कोई न्ह छावें 5 व आपणा सारा काम दुसरा मनख्यां न दिखाबा काण करें छ। व अपणा ताबीजाँ न चोड़ा करें छ अर अपणा लत्ता की झालरां लम्बी करें छ।ताकी मनख उनेँ धर्मात्मा जाणें। 6 व थुवारा मं सब सुँ महत्वपूर्ण ठाम पाबा छावें छ।यहुदियां की भेळा होबाळा सभा मं वाँकें ताई मुख्य मुख्य आसण छावें छ। 7 बजारां मं व आदर सुं नमस्कार कराबो छाव छ।अर लोगाँ वानें रब्बी खुँ’बो बढ़िया लागें छ। 8 पण थें मनख्यां सुँ अपणा आप न ‘रब्बी’ मत खुवादिज्ये क कस्यां थाँको साँची गरू एक ही छ।अर थें सारां भाई-बहन छ। 9 धरती प मनखा म सुं कोई न भी थारा पिता मत खबा द।क कस्यां थाको पिता तो एक ई छ, अर ऊ सरग मं छ। 10 अर न्ह मनख्यां न थें आपण मालिक भी मत खबा द।क कस्यां थाको मालक तो एक ई छ अर ऊ मसी छ। 11 थां मं ज्ये बड़ो छ,वह थाँकें सेवक होवगो। 12 पण ज्ये कोई अपणा-आप न बड़ो बणावगो,ऊ छोटो करयो जावगो,अर ज्ये कोई अपणा-आप न छोटो बणावगो,वह बड़ो(सम्मान) करयो जावगो। 13“ अरे कपटी यहुदियां क निम सखाबाळा! अर फरीसीयां!थां प ज्यादा दण्ड पावगा!।थें मनख्यां क लेखें सरग का राज्य को बाणीं बन्द करें देवें छो।अर थें खुद ई उ मं उळबो कोई न्ह छो अर दुसरा न ज्ये ऊ मं उळबा छावें छ,वानें भी उळबा कोई न्ह देवें छो।” 14 अरे कपटी यहुदियां क निम सखाबाळा! अर फरीसीयां!थां प हाय! थां बधवां का घरां न लुट’र खा जाव छ अर दिखाबा काण घणी-सारी देर ताँई पराथना करता रह छ, थां परमेस्वर सूँ जादा दण्ड पावगा।” 15 “अरे पाखंडी यहुदियां क निम सखाबाळा अर फरीसी वो! थाक उपर धिककार छ।थें कोई न थांका पंत मं ल्याबा काण धरती न अर समंदर न भी पार कर’र जाव छो।अर जद व थाका पंत मं आजाव छ तो थें उनेँ थाँ सु भी दो गुना नरक क भागी बणा देवें छो। 16 हे अंधा अगवो थं प हाय!ज्ये ख’व छ क अगर कोई मन्दर की सोगन खावें तो कोई न्ह,पण अगर कोई मन्दर की सुना की सोगन खावें

तो ऊँ सुँ बन्ध जावगो। 17 अरे मुख वो !अरे अंधा वो,बड़ो कुण छ? मन्दर को सुना या फेर वो मन्दर ज्याँन ऊँ सोना न पिवत्र बणायो छ। 18 थें या भी ख'व छो 'अगर कोई वेदी कि सोगन खावतो कोई बात कोई न्ह ,पण अगर कोई वेदी मं चढ़ाया चढ़ाबा कि सोगन खाव तो वो खुद कि सोगन सुँ बन्धयो छ। 19 अरे अंधा वो,बड़ो कुण छ? वेदी मं पड़या चढ़ाबा या फेर वा वेदी ज्याँ ऊँ चढ़ावा न पिवत्र बणावे छ? 20 ई लेखँ अगर कोई वेदी की सोगन खावँ छ तो वह वेदी क लारां ज्ये वेदि प धरया छ,ऊँ सारां क भी सोगन खावँ छ। 21 अर ज्ये मन्दर की सोगन खावँ छ,वह मन्दर क लारां ऊँ मं रहबाळा परमेस्वर की भी सोगन खावँ छ। 22 अर ज्ये सरग की सोगन खावँ छ,वह परमेस्वर की संहासन क लारां ज्ये ऊँ संहासन प विराजमान छ ऊँक भी सोगन खावँ छ। 23 हे पाखण्डी यहुदियां की निम सखाबाळा अर फरसियां!थापँ हाय;थां पोदिना,सुँप अर जीरा को दसवा भाग तो देवँ छो फण थां निम की खास बातां ये छ,न्याय,दया अर बसवास सुँ थें मुन्दो फेरो छो पण थां व बातां सुँ मुन्दो फेरया बना ईका पालन करणो छावँ छी 24 हो आन्धां गेला दखाबाळा थां माच्छर न तो छाणा लेवँ छो फण ऊँटडा न नंगळ जावँ छो। 25 हे पाखण्डी यहुदियां की निम सखाबाळा अर फरसियां!थापँ हाय! थां आपणी कटोरियां अर थाळियां न बारँ सुँ धोर साफ करँ छो पण वाका भीतर म छळ-पाखण्ड अर निचता सुँ भरी होई छ। 26 आन्धा परीसी वो!फैली भीतर सुँ कटोरा अर थाळीयां न मांज लें जिसुं वो बारँ सुँ भी साफ हे जावँ। 27 हे पाखण्डी यहुदियां की निम सखाबाळा अर फरसियां!थापँ हाय!थां चुना सुँ पोती होई कबरां क नाई छो ज्ये बारँ सुँ तो रूपाळो दिखावँ छ पण भीतर सुँ मुर्दा की हाडग्यां अर हर तरँ की गन्दगी(सुगला) सुँ भरी पड़ी छ। 28 अस्यां थें भी बारँ सुँ मनखयां काण धर्मी दिखाई देवँ छो पण भीतर छळ-पाखण्ड अर अधर्म का कामा सुँ भरयो होयो छो। 29 हे पाखण्डी यहुदियां की निम सखाबाळा अर फरसियां!थापँ हाय!थें परमेस्वर की आड़ी सुँ भविष्यबाणी खबाळा क लेखँ कबरां तो बणाता अर धर्मी का स्मार सजावँ छो। 30 अर या खवो छो ,“अगर महां आगला बड़ा का जुग म होता तो भविष्यबाणी करबाळा न मारबा मं वाकँ लारां कोई न्ह हाथ लागता ।” 31 थां अपना बरोध मं गुवाई देवँ छो क भविष्यबाणी खबाळा का हत्यारा की औलाद छो। 32 जा! थाकी आगला बड़ा का खोटा काम ज्ये वानँ सरु कर दिया,उनँ पुरो कर। 33 अरे जेरिला साँपां अर नागाँ क बच्चा,थां नरक का दण्ड सुँ कस्याँ बचगा? 34 ई लेख जाखो,महँ थाँकँ लेख भविष्यबाणी खबाळा अर बुद्धिमानां अर धर्म का निम सखाबाळा न खन्नारियो छुँ पण थां वामं सुँ कोई न मार गालगा,अर कोई न कुरुस प चढ़ाउंगा फेर कोई क अपना भेळी होबाळी सभा मं ताजणा मारेगा अर एक नगर सुँ दूसरा नगर मं सताता फरँगा। 35 जिसुं धरती प धर्मात्मा को जतरो खुन बुवायो गियो -धर्मी हाबील क खुन सुँ लेर बेरेकयाह का छोरा जकयार्ह का खुन ताँई,जिने थें मन्दर अर वेदी क बीचा मं मार गाल्या छा, वो सब थाका मांथा प पड़गा। 36 महँ थासुँ साँची साँची खरियो छुँ,ये सारी बातां ई जुगां क लोगां प आ पड़गी।

## यरुशलेम का लोगाँ क ताँई ईसु रोबो

37 हे यरुशलेम! हे यरुशलेम! तू अस्यो नगर छ ज्ये परमेस्वर की भविष्यबाणी खबाळा न मार गालँ छ, अर ज्ये परमेश्वर का संदेश सुणाबा काण थारँ गोड़यां खन्नायाग्या,थां वहां प पत्थरवाह करँ छ! जस्यां मुर्गी अपना बच्चा न अपना पाखड़ा का तणँ भेळा(सुरक्षित) करँ छ, कतनी ही

बार म्हनँ छाई क उस्यां थारा बाळका न म्हूँ भेळा करूं, पण थानँ अस्यां करबा न्ह दिया। 38 अर अबार देखो, थारँ घर थांक लेख उजाड़ छोड़ जाव छ। 39 क कस्यां म्हूँ थां सुँ खरियो छूँ, क थां म्हनँ तबताई देख कोई न्ह पावगा जद ताई थां यहा कोई न्ह ख'व,, 'भलो छ ,व्ह ज्ये परभु का नाऊँ सुँ आ रियो छ।

## 24

### मन्दर न ढसबा क बारा मं भविष्यबाणी

1 जद ईसु यहूदी मनख्यां का मन्दर सूँ खड़यो छो तो ऊंका चेला मन्दर क भवन न दिखाबा काण ऊँक गोड़याँ आया। 2 तब ईसु न उ सूँ खी,काँई थाँ देख रिया छो न? म्हूँ थाँ सुँ साचि खरियो छूँ,ई मन्दर न मनख ढसा देवगा फेर ई मन्दर मं एक भाटा क ऊपर दूस्रा भाटो कोई न्ह रहगो सारा भाटा गर जावगा।

### संकट अर कळेस

3 जद ईसु जैतून नाऊँ का एक डूंगर प बठया छा तो चेला न न्हाळा जा'र ईसु सूँ बुझी ,थां म्हांक ताँई बता द क,ये सारी बातां कदेक पूरी हो जाऊगी? अर कदेक थां पाछँ आवगा अर ई दुनिया का अन्त होबा की काँई निसाणी होवगी?" 4 वांकी बातां न सुण'र ईसु वांसूँ खबा लाग्या,थां समळर रिज्यो, क कोई मनख थां नँ झूठी बाता मं ठग न्ह ले। 5 क कस्यां घणा मनख म्हारो नाऊँ ले'र थांक गोड़यां आ'र ख'गा,"म्हूँ मसीह छूँ “,अस्यां बोल'र घणा मनख्यां न भंगरावगा। “ 6 अर जद थां लड़ाई की आवाज गोड़ सुणो अर दूर देस की लड़ायां की खबर्याँ सुणो तो मत डरपज्यो”,क कस्यां ये बातां को होबो जरूर छ पण उ घड़ी मं दुनिया नास कोई न्ह होवगी “ 7 क कस्यां अलग अलग जात्यां का मनख एक दूसरा क बरोध्द मं लड़गा अर घणा देसां का मनख ज्यांकी अलग अलग सरकार छ,व सारांई लड़ाई करगा।अर जगह जगह मं काळ पड़गा। अर भूकम्भ होवगा। 8 अर ये सारी बातां जस्यां लुगाई क बझो होबा क बगत मं दर्द होवँ छ अस्यांण को दर्द छ।व्ह सारां खाली पीड़ा का दन की सुरुवात छ। 9 ऊ बगत मं दण्ड देबा काण परमेस्वर क बरोध्द मं ज्ये ज्ये मनख काम करँ छ,व थान पकड़वावगा अर मार गालगा अर थां म्हारा चेला होबा क कारण सब ज्याती का लोग थासुँ बैर राखँगा। 10 उ बगत घणा मनखा को मोह टुट जावगा अर वाको बस्वास कम पड़ जावगा।व एक दूसरा न अधिकारयां का हाथा मं सुपेगा अर आमा सामा बेर रखाणँगा। 11 अर घणा झुठा भविष्यबाणी बोल बाळा ऊबा होवगा अर घणा मनख्यां न ठगेगा। 12 क कस्यां अधर्म क बड़बा सुँ घणा मनख्यां को प्रेम ठण्डा पड़ जाऊगो। 13 पण ज्ये मनख अपना जीवन होबा ताँई धीरप धरे रहगा,व्हानँ परमेस्वर बचाऊगा। 14 अर सरग का राज को यो छोखी खबर सारा संसार मं सब जात्यां न गुवाई का रूप मं सुणायो जावगा अर जदताँई अंत आवगा।

### महासंकट को सरू होबो

15 जिसुं थे लोग नास करबाळी भयानक चीज ,जिका बारा मं दानियेल परमेस्वर क आड़ी सुँ खबाळा न बतायो छ,जद ज्ये चीज परमेस्वर की नजर मं छोखी कोई न्ह,वहा खराब चिझ मन्दर



मं न्ह होणी छाव छ,पण उ चीझ न ऊंठी खड़ी थें देखगा जठी वा चिझ खड़ी न्ह हो सकूँक छ तो सारा मनख उ मन्दर न छोड़'र चल जावगा (हाँ,ई बात बाचबाळा छोखा समझो क ईको मल्लब कांई छ)। 16 फेर ज्ये मनख यहुदा देस मं रह'व छ व आबाळा नास सँ जान बचाबा काण दुंगरा मं भाग जाणी छाज्ये। 17 अर ज्ये मनख घर की छत प छ व अपणा घर मं कोई सामान ल्याबाकाण घर क छत सुं तर्ण उतर'र मैलाड़ी न्ह घुसे । 18 ज्ये कोई मनख माळ मं छ व अपणा लत्ता लेबाकाण अपणा घरां पाछो न्ह मुड़ें। 19 अरे भारें,!उ दन मं पेट हाळी लुगायां अर ज्ये लुगायां अपणा बच्चा काण दुध पुवावें छ ऊंक तांई घणी खर्डी होवेंगी क कस्यां व अपणा जीवन बच्चाबा काण न्ह भाग सकूँक छ। 20 पण थां परमेस्वर सँ पराथना करज्यो क व्हो दन स्याळा मं या आराम हाळो दन मं न्ह होए (क कस्यां श्याळा मं साराई भागबाकाण घणो खर्डो अर खतरनाक होवें छ )। 21 क कस्यां व्ह दना मं अस्यांको कळेस होवगा क जद परमेस्वर न या दुनिया बणाई जद सँ लेर तो हाल तांई अस्याण को कळेस कदी बी न्ह होयो अर अबानु तो अतनो कळेस न्ह होवगो। 22 अर अगर परभु व्ह दनां न कम न्ह करतो तो कोई बी कोई न्ह बचतो।पण परभु व्हांका चुन्या होया मनख्यां क ताँई व्ह दन कम करगा । 23 अगर वा दनां मं कोई मनख थांसँ ख'व छ क,झांको,"अंठी छ मसीह, या ऊंठी छ मसीह" तो थां उ बात मं बस्वास मत करज्यो। 24 क कस्यां उ दना मं कोई ठगिया मनख अपणा -आप सँ ख'व छ,क म्हां मसीह छां,अर म्हां परमेस्वर की भविष्यबाणी खबाळा छां अस्यां झूठ खबाळा दिखबा मं आऊगा।अर व निसाणी-चमतकार दिखा'र अगर हो सकें तो चुन्या होया मनख्यां न बी भंगरादेगा। 25 पण थां समळ'र रीज्यो,झांको,म्हनें थां सँ ये सारी बातां होबा सँ पहली ही ख दी छ। 26 ई लेखें अगर व थांसुं ख'गा क मसीह पाछो आग्या क,देखो,व्ह मरूथळ मं छ,तो ऊंठी मत जाजिये अर अगर व ख'गा,देखो,ऊ ऊंठी ज्याग क मेलाड़ी छ' तो वांके बस्वास मत कर 27 जस्यां बादळा मं बिजळी एक कुण्या सुं दूस्रा कुण्या तांई चमक छ अस्यांई मनख को पुत्र भी अपणा दन मं प्रगट होवगो। 28 जसी तरें सुं जठी लाश पड़ी होवगी उठी कावळा(गिध्द) भी भेळा होवगा!

## मनख को बेटो को आबो

29 पण वा दनां मं,जद दुःख उठाबा क बाद मं,परमेस्वर सूरज को उज्जयाळा देबा बन्ध करगा उन्धेरो होजावगो अर चन्द्रमा बी कोई न्ह चमकगो। अर आकाश सँ तारा बी तर्ण गरबा लाग जावगा अर परमेस्वर आकाश की सारी सकैतियां न हलाई जाऊगी जि सँ ज्ये आकाश मं छ व अपणी जगाह छोड़ देगा। 30 उं बगत मनख का बेटा का आबा की नसाणी बादळा मं दिखाई देगा।अर जद धरती प सारी जात्यां का मनख रोवगा अर व मनख का बेटा न शक्ती अर महमा क लारां सरग का बादळा म आतो देखगा।।पण लोग-दणी मनख को बेटो न महासकति अर महिमा क लारां बादळा प आतो देखगा। 31 उ बगत मं व्ह अपणा दूतां न खन्ना'र क व धरती का ई मुंडा सँ अर आकास का उ मुंडा तांई जा'र च्यारुमेर सँ ऊंका थरप्या होया मनख्यां न भेळा करगा।

## अंजीर का रुखड़ा सुं सिखबो

32 “अंजीर का रुखड़ा सँ थां एक बात सिखो;जद ऊंकी डाळयां नरम होजावें छ अर ऊंकी

कुपळा फुटबा लाग जाव छ तो उन्न देख'र थां जाण ले छ क उंदाळो आबाळो छ। 33 अस्यांई जद थां ई बातां न होता देख ले तो जाणलिज्यो क वा घड़ी गोड़यां ही छ अर बाणां प ही छ। 34 याद राखो,म्हूँ थां सँ साची खुँ छूँ ज्यां ताँई ये सारी बातां पूरी न्ह होजावँ व्हांताँई यो मनख जमारो रहगो। 35 आकास अर धरती टळ जावँगी पण म्हारी बातां कदी बी न्ह टळेगी।

## दन अर घड़ी कोई न्ह जाणें

36 अर ईसु न अपणा चेला सँ खी,कोई मनख ऊ दन अर ऊ घड़ी क बारा मं काँई बी न्ह जाणें छ क म्हूँ कदेक ई दुनिया मं पाछें आऊँ। न्ह कोई स्वर्ग क दूत, न्ह बेटो, ई घड़ी क बारा मं कोई न्ह जाण,पण खाली पिता परमेस्वर हि ऊ दन अर ऊ घड़ी क बारा मं जाणें छ। 37 जस्यां नूह क दनां मं होग्या, अस्यां ही मनख का पुत्र को आबा क दन मं भी होवगा। 38 पळो(जल-प्रलय) आबा सुं फेली अर नूह को जहाज म चढ बा का दन ताँई, लोग खाबो-पीबो अर शादी-ब्याव करता रिया। 39 अर वानें तब ताँई कोई पता न्ह चला जद ताँई पळो न्ह आ गया अर व सारा न बहा न्ह ले गया। “मनख का पुत्र को आबो भी अस्यां ही होवगा। 40 ऊं बगत दो मनख खेत मं होवगा अर एक न उठालिया जावगो अर दुसरा न छोड़ दियो जावगो। 41 अर दो लुगाईयां एक लारां घट्टी पीस्ती होवगी,व दोनियां मं सुं एक ले लि जाव गी अर दूसरी छोड़ दिया जाव गी। 42 थां ई बगत सँ जागता रीज्यो क कस्यां थां जाणें कोई न्ह छ क थारा परभु कदेक ई दुनिया मं पाछें आऊंगा। 43 पण या जरूर जाणल्यो क अगर घर का धणी न तोल होती क चोर कसी बगत की आवगो तो वो जागतो रेतो,अर खुद का घर म चोरी कोई न्ह होबा देतो। 44 ई तरें सुं थां भी तयार रहो,क कस्यां जि घड़ी क बारां मं थें बच्यार भी कोई न्ह कर छो,ऊ घड़ी मं मनख को बेटो आ जावगा।

## बस्वासहाळा सेवक

45 तो सोचो वह बस्वासहाळा अर बुध्दीमान भण्डारी कुण छ, जिकां धणी न अपणा सारां नौकर चाकरां प देखभाळ करबा अर उन्न समय प रोटी देबा काण जम्मेदारी सुपाया। 46 भलो छ क वह दास जिंका धणी न ऊँ अस्यां करतो पायें। 47 म्हूँ थासुं साच्ची खरियो छूँ,ऊ दास न अपणी सारी सम्पतीयां को आधिकारी बणावँ गो 48 पण अगर वह खराब दास अपणा मन मं यह सोची छ क ‘म्हारो धणी न आबा मं देर छ,’ 49 तो फेर दूसरा दासां न कुटबा लाग्यो छ, अर दारुड़ियां क लारां खाबा-पीबा अर मजा करबा लाग्या। 50 तो ऊ दास को धणी बना बतायां अर असी बगत प आवगो जद ऊँ ऊकी बाट-न्हाळतो कोई न्ह रह'वगो। 51 अर वह ऊँ दास न बरी तरें सुं फटकारगो अर उन्न वांसुं खाड़'र अवश्वासियां क गोड़यां ऊका ठाम निश्चित करगा ज्याँ रोबो अर दांत पीसबो होवगो।

## 25

### लाढा कि बाठ नाळबाळी दस छोरयां की बात

1 ऊ दन सरग को राज वा दस कुँवारी छोरियां क नाई होवगो ज्ये अपणा दीपक(दिया) लेर लाढा सुं मलबा खड़गी। 2 वा मं सुं पाँच आळसी छी अर पाँच चातरूक छी। 3 क कस्यां

पाँचु आळसी छोरियां खुद का दिपक तो लेली पण वाकें लारां तैल कोई न्ह ले ली। 4 पण चातरूक छोरियां खुद का दिपक क लारां तैल का भरया राछ (कुप्पियाँ) भी ले ली। 5 लाढो आबा मं मोडो हेग्यो जिसुं वा सारी न ऊंघ आबा लागगी अर व सो गी। 6 आधी रात को हुडदंग माची 'क देखो, लाढो आ रयो छ। ऊ सुं मलबा चालो।' 7 जद व सारी कुवारी छोरियां उठी अर अपणा-अपणा दिपक न तयार करबा लागी। 8 अर आळसी छोरियां न चातरूक छोरियां सुं खी, म्हानें भी थाँका तेल मं सुं थोड़ा स्योक तेल दे दें क कस्यां म्हाका दीपक बझबाळा छ।' 9 पण वह चातरूक छोरियां न उत्तर दिया, 'न्ह ! म्हाँ कोई न्ह दे सकाँ। क कस्यां या तो म्हाँक लेख काफी न्ह होवगो अर न्ह थाँकें लेख। तो थें जार तैल बेचबाळा सुं खुद काण मोल ल्यावो। 10 जद व तैल मोल लेबा जाईरी छी क लाढो आ पुग्यो। तो वह छोरियां ज्ये तयार छी, व ऊँक लारां ब्याऊ हाळा घर मं मेलाड़ी खड़ गी अर फेर कोई न कुवाण्ड जुड़ दियो। 11 फेर आखरी मं व बाकी क छोरियां भी आर खबा लागी, 'हे स्वामी, हे स्वामी म्हाँक काण भी कुवाण्ड खोल दें। 12 पण उनें ज्वाब दियो, 'म्हूँ थाँ सुं साँची खरयो छूँ, म्हूँ थाँनं कोई न जाणुँ।' 13 जिसुं जागता रहो। क कस्यां थां तो ऊ दन न कोई न्ह जाणौ अर न्ह ऊ बगत न जद मनख को बेटो पाछें ई दुनिया मं आवगो।

## तीन सेवकां को ढास्टान

14 सरग को राज ऊ मनख क नाई छ ज्यो जात्रा मं जाबा सुं फेली खुद का नोकरा न बलार अपणा सारी सम्पती वांकताई सुँप दि। 15 वो एक न चाँदी का रप्या सुं भरी पाँच खोतळयां दियो, दुसरा न दो अर तिसरा काण एक कोथळी दियो। व सारा काण वाँक काबलियत क अनुसार देदीया अर जात्र मं चल गयो। 16 ज्याँन चाँदी का रप्या सुं भरी पाँच कोथळयां मली छी वो वानें हाथ्योहात काम मं लगार पाँच कोथळयां ओर कमा लियो। 17 अस्याण की जिनें दो कोथळयां मली छी वो भी दो कोथळयां ओर कमा लियो। 18 पण जिनें एक चाँदी का रप्या सुं भरी एक कोथळी मली छी वो जार जमीन म एक खाढो खोदर अपण मालिक का धन न गाढ दियो। 19 घणा दन बित्या पाछे वा नोकरा को मालिक पाछो आयो अर सारा सुं इसाब लेबा लाग्या। 20 वो मनख जिनें चाँदी का रप्या की पाँच खोतळयां मली छी ऊ मालिक क गोड़याँ ग्या अर चाँदी का रप्या की पाँच ओर खोतळयां ले जार उसुं खी, हे मालिक, थारी दी हुई पाँच कोथळयां सुं म्हनें पाँच ओर कोथळयां कमाई छ। 21 उ मालिक न ऊ सुं खी, भला छ, उत्तम अर बस्वासहाळा सेवक, थनें छोखा करया छो। तु बस्वास लायक सेवक छ, क कस्यां म्हनें थारेंताई थोड़ो-सो दीयो छो उ मं तु बस्वास लायक रहयो, तो म्हूँ थानें घणी चिजां को आधिकारी बणाऊँ अपणा धणी का आनन्द मं भेळा हो जा। 22 फेर वो सेवक जिनें चाँदी का रप्या सुं भरया दो खोतळयां मली छी, ऊ सेवक न भी आ'र खी, हे मालिक, थाँ म्हारें काण दो खोतळयाँ सुपा दियो छो, देखो, म्हनें दो ओर कोथळयाँ कमाई छ। 23 उ मालिक न ऊ सुं खी, भला छ उत्तम अर बस्वासहाळा सेवक, थनें छोखा करया छो। तु बस्वास लायक सेवक छ क कस्यां म्हनें थारेंताई थोड़ो-सो दीयो छो उ मं तु बस्वास लायक रहयो, तो म्हूँ थानें घणी चिजां को आधिकारी बणाऊँ अपणा धणी का आनन्द मं भेळा हो जा। 24 फेर वो जिनें चाँदी का रप्या की एक कोथळी मली छी, उनें भी आर खुद का मालिक सुं खी, 'हे मालिक, म्हूँ जाणु छूँ, क तू एक घणो खरडो मनख छ। अर ज्याँ कोई न्ह बायो छ, वां थें काँटें छ। अर ज्याँ कोई बीज न्ह बखेर वां सुं तु बीणें

छ। 25 सो म्हुँ डरप ग्यो छो अर जार चाँदी का रप्या कि कोथळी न जमीन मं गाढ दियो, देखो, ज्यो थारो छ, वह यहाँ छ। 26 'ऊँको मालिक न उ सुँ खी, हे खराब अर आळसी सेवक, तु तो म्हनं जाणं छो, क ज्यां कोई न्ह बायो छ, वां म्हुँ काँटं छुँ। अर ज्यां कोई बीज न्ह बखेर वां सुँ तो बीणं छुँ। 27 तो थनं म्हारा रप्या कोड़ी ब्याज सुँ खामी न्ह दे दिया, ताकि म्हुँ पाछा आतो तो ज्ये म्हारो छ ब्याज समेत ले लेतो। 28 ई लेखं, उ मालिक न वांसुँ खी, या चाँदी का रप्या कि कोथळी उ सुँ लि ल्यो अर जिंकं गोड़यां चाँदी का रप्या कि दस कोथळयां छ ये उकं काण दे दें। 29 तो मालीक न खी, म्हुँ थासुँ खरियो छुँ, क ज्यांकं ताँई ज्ये दियो ग्यो छ, अगर उनं ऊका उपयोग ज्ये छोखी ढंग सुँ करं छ, वहाँकं ताँई और ज्यादा दियो जावगो, अर जतनी ऊकं जुरत छ, वह ऊ सुँ ज्यादा पावगा पण ज्ये अस्यां कोई न्ह करं छ, तो अगर वहाँक गोड़यां थोड़ी भी छ तो ऊ बी वांसुं ले लियो जावगो। 30 अर ई बनाकाम का नोकर न बारे उन्धेरा मं पटक दियो ज्यां रोबो अर दांत पीसबो हेवगो।

## न्याई को दन

31 मनख को बेटो जद अपणी महमा मं आवगा, अर सारा सरग दुत ऊकं लारां आवगा तो वह अपणी महमा क सहासन पर विराजमान होवगा। 32 तो सबी जात्यां उके सामे भैळी हो जावगी अर जस्यां गुवाळियां गाड़रा न छेळीयां सुँ न्हाळा करं छ, उस्यां ही ऊ वानं एक दुस्रा सुँ न्हाळो करगा। 33 अर वह गाड़रा न अपणी जीवां क आड़ी अर छेळियां न कण्डीया क आड़ी ऊबो करगो। 34 तब राजो अपणा जीवां हाथहाळा सुँ ख'गो, हे म्हारा पिता का भला लोगांओ, आओ, ऊ राज का अधिकारी बणो ज्ये जगत की उत्पत्ती सुँ थाँकं काण त्यार छ। 35 यो राज थाको छ क कस्यां म्हुँ भूखो छो अर थानं म्हारं काण कोई खाबा काण दियो, म्हुँ तसायो छो अर थानं म्हारं काण पाणी पुवायो। म्हुँ अणजाण छो अर थानं म्हारं काण अपणो घर मं ठहरबा दियो। 36 म्हुँ नातकणो छो, अर थानं म्हारं काण लत्ता परायो। म्हुँ बिमार छो, अर थनं म्हारी सेवा करयो। म्हुँ बंदी छो अर तु म्हनं मलबा काण आयो। 37 फेर जुवाब मं धर्म मनख न ऊ सुँ बुजया, 'क हे परभु, म्हां थानं कदेक भूखो देखया अर खुवाया अर म्हां थानं कदेक तसायो देखया अर पाणी पुवाया? 38 थानं म्हां कदेक गोड़ सुं जातो होयो अणजाण देखर अपणा घर मं ठहराया छा अर नातकणो देखर थाकाण कदेक लत्ता पराया छा? 39 अर म्हां कदेक थें बिमार अर बन्दी देखया अर था सुँ मल्बा आया। 40 " फेर राजो न वाकं काण जुवाब दियो, 'म्हुँ था सुँ साँची खरयो छुँ, क ज्ये काँई थें म्हारा भौळा-ढाळा भाया मं सुँ एक कि लारां भी थें कोई-काँई करया छा तो थें वो म्हारं काण ई करया छा। 41 फेर वो राजो कण्डिया क आड़ी हाळा सुँ ख'गो, 'हे सापित(शाप) लोगों! म्हारं सामें सुं चल जावो, अर उं कदी भी कोई न्ह बझबाळी आग मं जा पडो ज्यो आग शैतान अर उका दुतां काण त्यार करी गी छ। 42 क कस्यां म्हुँ भूखो छो अर थानं म्हारं काण कोई खाबा काण न्ह दियो, म्हुँ तसायो छो अर थानं म्हारं काण पाणी कोई न्ह पुवायो। 43 म्हुँ अणजाण छो अर थानं म्हारं काण अपणो घर मं कोई न्ह ठहरबा दियो। म्हुँ नातकणो छो, अर थानं म्हारं काण लत्ता कोई न्ह परायो। म्हुँ बिमार अर बंदी मं छो अर तु म्हनं समाल लेबा कोई न्ह आया। 44 फेर व भी जुवाब मं ऊ सुँ बुझगा, क हे परभु, म्हां थानं कदेक भूखा या तसायो या अणजाण या नाताकणा या बेमार या बन्दि मं देखया अर थारी सेवा कोई न्ह करया। 45 फेर ऊ जुवाब मं वा सुँ खवगो, 'म्हुँ था सुँ साँची खरयो छुँ, क ज्ये काँई थें म्हारा भौळा-ढाळा भाया मं

सुँ एक कि लारां भी थें कोई-काई न्ह करया छा तो थें वो म्हारें काण भी कोई न्ह करया ।अर यो खराब लोग अमर दण्ड पावगा पण धर्मी अमर जीवन मं प्रवेश पावगा।

## 26

### ईसु न मारबा काण जाळ-साजी

1 अस्यां होई क जद ईसु ये सारी बातां खबा क बाद मं अपणा चेला सुँ खबा लाग्या। 2 थें लोग जाणें छो क दो दन क पाछें यहूदी मनख्यां को फसह नाऊं को एक त्वार होबाळो छो। ऊ बगत मं मनख को पुत्र कुरुस प चढ़ाबा काण पकड़वायो जावगो। 3 जद प्रधान याजकां अर बढा-बुढा यहूदी नेता कैफा नाऊ का प्रधान याजक का आगणा म भेळा होया। 4 अर व आम-सामें बच्चार करबा लाग्या क ईसु न छान सेक पकड़ मारबा गालां। 5 पण व खुद आम-सामें खबा लाग्या, ”क आपण उनें फसह क त्वार क दन कोई न्ह पकड़ौं। अगर आपण त्वार क दन ईसु न पकड़ौं तो ऊंठी त्वार मं आबाळा मनख्यां क बीचा मं हंगामो होजाऊगो।

### बेतानिय्याह गाँव मं ईसु

6 तो बैतनिय्याह गाँव मं जद ईसु सिमोन जीक पहली कोढ़ की बीमारी छी, ऊं क घर मं रोटी खाबा काण बठ्यो। 7 उ बगत मं एक बायर संगमरमर नाऊं का धोळा भाटा सुँ बनाया बोतल मं घणो म्हांगो अन्तर ले’र आई; अर जद ईसु रोटी खाबा काण बेट्यो तो ऊ बायर न वह सारो अन्तर ईसु का माथा प उण्डेल द्यो। 8 पण या देखर चेला रोस मं होर खबा लाग्या, ई बायर न यो अन्तर काई काण उण्डेल’र खराब कर्यो छ? 9 ई अन्तर न ऊंचा दाम मं बेचर ऊ रप्या न गरीब मनख्यां काण बाँट्यो जा सकें छा। 10 ईसु वहाँकी ई बात न सुण’र वा सुँ ई बोल्यो, थाँ ई बायर न काई काण आखती कर्या छ? उनें म्हारा लारां भलाई करी छ। 11 क कस्यां गरीब तो थाँक लारां हठफहर रह छ अर थां जद छावें तब वहाँकी भलाई कर सकें छ, पण म्हाँ थाँक लारां सदा कोई न्ह रहऊं। 12 उ म्हनें गाड़या जाबा की तयारी मं पहलीयाँ सुँ ही म्हार डील प अन्तर उण्डेल द्यो छ। 13 म्हाँ थांसूँ साची खुऊं छूँ, क सारा संसार मं जठी बी परमेस्वर की छोखी खबर को परचार कर्यो जावगो, वहाँ ई बायर की याद मं ज्ये काई ईनें कर्या छ, उंकी बतळावन होऊगी।

### यहूदा को बस्वास घात

14 तो यहूदा इसकारियोती बाराह चेला मं सुँ एक चेला छो, उ प्रधान याजकां क गोड़यां ग्यो अर खी। 15 अगर म्हाँ ईसु न थाँक हाथ मं पकड़वा दूँ, तो म्हारें काण काई देवगा? व यहूदा काण चाँदी का तिस सिक्का गणर दे दिया। 16 अर ऊ बगत सुँ यहूदा ईसु न वहाँका हाथ मं पकड़वाबाकाण मोको हेरबा लाग्यो।

### चेला क लारां आखरी बगत मं रोटी खाबो

17 बना खमीर की रोटीहाळो त्वार क फॅलो दन, चेला न ईसु सुँ बूझी, ”तु कठी छावें छ क म्हाँ थाकँताई फसह खाबा की तयारी करां?” 18 उन्ह खी, नगर मं फलाणा (असुक) मनख क

गोड़याँ जार उसुं खो, गरुजी खरिया छ, म्हारें समय गोड़ें आग्यो छ, म्हाँ म्हारें चेला क लारां थारें याँ फ़सह पर्व मनाबाळा छुँ। 19 फेर चेला न जस्यां ईसु खी वस्यां ही करदिया, अर फ़सह पर्व की तयारी करया। 20 जद दन बुड़ग्यो तो ईसु अपणा बाराह चेला क लारां आर ऊ घर क मलाड़ी जार रोटी खाबा काण बठग्या। 21 अर जद वह चेला क लारां बठार रोटी खार्यो छो तो ईसु न अपणा चेला सूँ खी, सुणो! म्हाँ थासूँ साची खुँ छुँ, थां मं सूँ एक मनख म्हनं पकड़वावागो। 22 व ईसु की ई बात न सुणार घणा दुखी होया अर व एक-एक करार ईसु सूँ बूझबा लाग्या, हे परभु, काँई ऊ म्हाँ छुँ क? 23 ईसु न ज्वाब दिया, क थां बारह मं सूँ एक छ ज्ये महार लारां एक कटोरा मं डबोव छ, ऊ म्हनं धोखा सुँ पकड़वावगो। 24 तो, म्हाँ, मनख का बेटो न तो मरणो ई छ जस्यां ऊं क बारा मं पबित्र सास्त्र मं मण्डी छ, ऊस्यां हो जाव छ। पण ज्ये आदमी, मनख को बेटो न पकड़वावगा, ऊंकी कत्री बरी दसा होवगी, अगर ऊंको जनम न्ह होतो तो ऊकाण छोखो ही छो। 25 जद बस्वास घात करबाळो यहुदा न खी, “गरु जी, काँई ऊ म्हाँ छुँ क? ईसु न उ सुँ खी, “हाँ, अस्यां ही छ जस्यां थनं खी छ,”

## प्रभु-भोज

26 जद व जीम रिया छा क ईसु हाथ मं रोटी लेर उ रोटी काण परमेस्वर को धन्यावाद देर वह रोटी तोड़ी अर व्हांक काण दी अर ईसु न अपणा चेला सूँ खी, “ल्यो, ईनं खावो, यो म्हारो डील छ”। 27 ईक पाछें ईसु न कटोरो उठार जी मं अंगुर को रस छो, उ कटोरो काण परमेस्वर को धन्यावाद करार चेला काण देर खी, थें साराई ई मं सुँ पिओ। 28 अर ईसु न वासूँ खी, यो अंगुर को रस, म्हारो खून एक नया करार(वाचा) क सरुवात करे छ ज्यो घणा का पाप न माफ करबा काण बुवाया जावें छ। 29 म्हाँ थासूँ साची खर्यो छुँ, क अंगुर को ई रस न ऊ दनां ताई कदी भी न्ह पीऊँ, ज्याँ ताँई थाँक लारां अपणा पिता का राज्य मं नया अंगुर का रस कोई न्ह पीऊँ। 30 फेर व भजन गार जैतुन नाऊँ का डुंगर प चलग्या।

## पतरस का नटबा की भविष्यवाणी

31 अर ईसु न अपणा चेला सूँ खी, क थां साराई आज ही रात मं म्हारें बारां मं ठोकर खावगा जस्यां परमेस्वर न नरां दन पहली या खी छी, वह परमेस्वर का सास्त्र मं माण्डया छ, “म्हाँ गाड़रा चराहबाळा गुवाळयाँ न मारूँऊँ अर गाड़रा अलक-तलक होजावगी।” 32 पण जद म्हाँ मर जाऊँ अर फेर परमेस्वर का हाथा सूँ जी उठुँ, तो थां सूँ पहली गलील ईलाका मं जाऊँ। 33 उ बगत पतरस न परभु ईसु सूँ खी, अगर साराई थानें छोड़देगा पण म्हाँ कदी भी थानाँ न्ह छोड़ऊँ”। 34 तो ईसु न पतरस सूँ खी, म्हाँ थ सुँ साची खर्यो छुँ क आज की रात मं मूर्गा क बोलबा क पहली तु तीन बार म्हनं पछाणबा मं नटंगो।” 35 फेर पतरस न ईसु की या बात सुणार बोल्यो, “अगर म्हनं थारा लारां मरणो बी पड़े तो बी म्हाँ थानें पछाणबा मं नटूँ कोई न्ह।” अर याई बात सारा चेला न बी खी।

## ईसु की पराथना

36 फेर ईसु अर ऊंका चेला गतसमनी नाऊँ का एक बगीचा मं आया। अर ईसु न अपणा चेला सूँ खी, “थां अंठी बठया रियो जद ताँई ऊँठी जार म्हाँ पराथना करूँ तब ताँई बठया रीज्यो। 37

अर ईसु अपणा लारां पतरस अर जबदी का दोनी बेटा याकूब अर यूहन्ना न लेर गया। अर घणो दुखी अर ब्याकुल होबा लाग्यो। 38 ईसु वासूँ बोल्यो, म्हारो मन गजब कळेस मं छ यहाँताई क म्हाँ मरबाळो सो होर्यो छूँ। थां अंठी ही बठ ज्यावो अर म्हारें लारां जागता रियो।” 39 फेर ईसु ऊंठी सँ चिणी सीक दूर जा’र धरती प आडो पडर पराथना करबा लाग्यो अर बोल्यो, क हे म्हारें पिता, अगर हो सकें तो या कटोरा म्ह प सँ टळ जावें पण जस्यां म्हाँ छावूँ अस्यां न्ह हो पण जस्यां तु छाव अस्यांई होवें।” 40 ईसु पराथना कर’र अपणा चेला क गोड़यां ग्यो अर वानें सुता देख’र पतरस सँ स्त्री, कांई थें लोग एक घंटा भर बी कोई न्ह जाग सकेंयो? 41 थां जागता रियो अर पराथना करता रियो जिसँ थां परिकसा मं न्ह पड़ सकें छ। थारी आत्मा तो छोखा काम करबा छावें छ पण थारो डील तो यो काम करबा काण कमजोर छ”। 42 फेर उन्ह दूसरी बार जार या पराथना करी, हे म्हारा पिता, अगर दुखा को यो कटोरो म्हारा पिया बना कोई न्ह टळ सकें तो थारी इच्छा पुरी होवें। 43 फेर ईसु अपण चेला क गोड़यां आया तो व पाछा ही सुता पाया क कस्यां वांकी आख्यां नींद सँ भरी छी । 44 ईसु वानें छोड़र फेर पाछो ग्यो अर ऊई बाता न बोलर तिसरी बार पराथना करयो। 45 अर ईसु पराथना कर’र बाद मं अपणा चेला क गोड़यां आ’र वासूँ स्त्री, कांई थां अबानु ताँई सोर्या अर आराम करया छ क? देखो, व्हा घड़ी आगी जद मनख को बेटो पाप्यां क हाथ मं पकड़वायो जावें छ। 46 थां उठो, चालां! झांको, म्हनें पकड़ावाबाळो गोड़यां आ पुग्या छ।

## ईसु पकड़ायो

47 एकदम जद ईसु अस्यां खर्यो छो क यहूदा ज्ये वह बाराह चेला मं सँ एक छो ऊ अपण लारां यहूदीयां क प्रधान याजकां अर यहूदियां का निम सखाबाळा अर यहूदीयां क पुरानयो मनख्यां का हुकम सँ ऊँ घणी सारी भीड़ ऊंठी आयो। व्हांक लारां तलवारां अर लाठीयां बी लेर आया छाँ। 48 यहूदा न पकड़बाळा सँ पहली बता दी छी क म्हाँ जा’र जिनें म्हाँ चुमुं ऊ ई छ थां उनें पकड़ लिज्ये। 49 जद व बगीचा मं पुगया, तब यहूदा न ईसु क गोड़यां आ’र स्त्री, “है गरूजी” नमस्कार; अर उनें ईसु का गाल प घणा चुमा ल्या । 50 ईसू न ऊँ सँ स्त्री, हे भाईला जि काम क लेखें तु आयो छ उन्ह कर लें। तो वह भीड़ क मनख ईसु क गोड़यां आया उन्ह पकड़’र अपणा कब्जा मं ले ल्यो। 51 अर देखो, ईसु क साथिड़ा मं सँ एक न अपणी तलवार काढ़ी अर महा याजक का एक दास प चला दी जि सुं ऊको कान कट ग्यो। 52 तो ईसु न उ सँ स्त्री, “अपणी तलवार न मियान मं धर लें। ज्ये तलवार चलाबाळा छ व तलवार सुं ई मारया जावगा। 53 काँई तु जाणु कोई न्ह क, म्हाँ अपणा पिता सँ अरज कर सकें छूँ, अर वह सरगदुता की बाराह सेना सुं भी ज्यादा म्हारें काण अबानु खन्ना देगा? 54 पण अगर म्हाँ अस्यां करे तो पवित्र सास्त्र मं माण्डयो या बात कस्यां पुरी होवगी क सब अस्यां ई होणी छ? 55 तो ईसु न भीड़ सँ बुँझी,” म्हाँ कोई डाकू छूँ क, थां म्हनें पकड़बा काण काई काण तलवारां अर लाठ्यां लेर आया छ? म्हाँ तो नथकई मन्दर क आँगणा मं बठ’र उपदेस देवें करे छो अर उ बगत मं थां म्हनें कोई बी न्ह पकड़या। 56 पण म्हारा बारा मं ज्ये कोई पवित्र सास्त्र मं परमेस्वर क आड़ी सुं बोलबाळा न माण्डयो छो वह सारी पुरी होवें छ। फेर ईसु का सारा चेला उनें एकलो छोड़’र भाग्या।

## महा सभा मं ईसु



57 अर ज्यान ईसु पकडिया छा व उन्हे काइफा नाऊँ क यहूदीयां का महा याजक क गोड़यां लेग्या, अर ऊंठी यहूदियां का निम सखाबाळा मनख अर बुजुर्ग यहूदी नेता भेळा होग्या। 58 अर पतरस ईसु क पाछे दूर सँ जातो रियो अर ऊँक पाछे -पाछे महा याजक क आंगणा क मँलाड़ी ताँई आ'र अन्त देखबा काण ऊंठी चोकिदारां क लारां बठ ग्यो। 59 प्रधान याजकां अर सारा महा सभा का लोग हेरबा लग्या ज्ये ईसु क बरोध्द मं ग्वाई दे सकें। क कस्यां व ईसु न मार गालबा क ताँई कोई कारण मलें। 60 पण घणा सारा लोग ईसु क खिलाफ झुठी ग्वाई बतायां छा पण व कोई न्ह पा सक्या आखरी मं दो जना न आर खी 61, "म्हानें इका मुंडा सँ या बात सुणी छ क म्हूँ ई परमेस्वर क मन्दर न ढसा दियुँ अर फेर तीन दन क भीतर दूसरो बणा सकु छूँ"। 62 व्हांकी बातां न सुण'र महायाजक उबो हो'र ईसु सँ बुझबा लाग्यो, तु व्हांकी बातां को काँई बी ज्वाब कस्यां न्ह देयो ये सारा मनख थारा बरोध्द मं काँई काँई ग्वाई देया छ ? 63 पण ईसु छानमुन रियो अर व्हांक काण काँई बी ज्वाब न्ह द्यो। महायाजक न फेर ईसु सँ बुझयो, "म्हूँ थनँ जीवता परमेस्वर को सोगन गालरियो छूँ, म्हांक ताँई बता, काँई "तु मसीह छ क?", ज्ये परमेस्वर को बेटो छ। 64 तो ईसु न उ सँ खी, हां म्हूँ छूँ जस्यां थें खुद खयां छो पण म्हूँ थासुँ या भी खुँ छूँ, क थां अबानु सँ मनख को बेटो न सर्वसक्तीमान परमेस्वर क जीवां हाथ क आड़ी बठयो देखेंगा अर सरग का बादळा प आतो देखेंगा।" 65 तो महायाजक न अपना लत्ता फाड़'र खी, व्हांनँ परमेस्वर की निन्दा करी छ, अबानु, आपण काण कोई गुवाई की काँई जरूरत कोई न्ह। थानें खुद ही इका मुण्डा सँ परमेस्वर की बराई सुण लीया छो, 66 अबार थांको काँई बच्यार छ?" अर व साराई खबा लाग्या, ईनँ मार देणो छावें छ।"

## पतरस को ईसु न न्ह पछाणबो

67 अर कोई लोग ईसु क मुण्डा प थूंक्या अर कोई ऊँकी मुक्का मारा अर कोई न ऊँकें थप्पड़ दी अर खी। 68 हे मसीह, भबीस्यबाणी कर!, अर बता थारें कीनें दी" ? 69 जद पतरस तणें आंगणा मं बठयो छो तो व्हां महायाजक की दास्यां मं सँ एक दासी आई अर उ सँ खी, "तु बी तो ऊ गलीली का ईसु क लारां छो।" 70 पण साराँई क सामें पतरस नटग्यो अर खी, म्हूँ कोई न्ह जाणुँ अर तू ज्ये म्ह सँ बोलरी छ। 71 "अर ऊ अस्यां बोलतो होयो आंगणा क बाहर ढोळी प आग्यो फेर दूसरी दासी न पतरस देख'र उ सँ व्हांई उबा मनख्यां सँ खबा लागी, यो बी " तो ऊ ईसु नासरी क लारां छो।" 72 पण पतरस सोगन खा'र फेर नटग्यो क म्हूँ उ मनख न कोन्ह जाणुँ। 73 फेर चिणी सीक दे'र पाछे ज्ये व्हांई उबा छा वां मं सँ एक मनख पतरस गोड़यां आर खबा लाग्यो, तू सही मं वां मं सँ एक छ, क कस्यां थारी बोली सँ तोल पड़रियो छ। गलील इलाका को छ।" 74 जद पतरस व्हांकी बात सुण'र धिक्कार देबो अर सोगन खा'र खबा लाग्यो, जिकी बारां मं थां बातां कर्या छ म्हूँ उ मनख न कतेई न्ह जाणुँ उ बगत हाथ्योहात मुर्गो बोल्यो। 75 पण उ बगत मं पतरस न ईसु की व्हा बात याद आई, "क मुर्गो क बोलबा क पहली तू तीन बगत म्हनँ पछाणबा मं ख'गो, क म्हूँ ई नँ कोई न्ह जाणुँ", अर ऊ ई बात न सोच'र बाहर जार डकरार -डकरार रोबा लाग्यो

1 जद दन उग्यो,तो प्रधान याजकां, बुजुर्ग यहूदी नेतां न एकटा हो'र ईसु न मार गालबा काण योजना बणाई। 2 वानें ईसु बान्ध्यो अर पीलातुस क गोड़यां ले जार ऊका हाथ मं सुप दिया ज्ये यहूदी देस का रोमी राजपाल छ।

## यहूदा की आत्महत्या

3 जद यहूदा न जिन्ह ऊ पकड़वायो छो,व्ह देख्यो क ईसु न अपराधी बणाया गया छ, तो वह घणो पस्तायो अर प्रधान याजकां अर बुजुर्ग यहूदी नेता क गोड़यां चाँदी का ऊ तीस सिक्का पाछा लाया। 4 अर उनें स्त्री, “क म्हाँ एक नरपराध मनख न मारबा काण पकड़वार पाप करयो छूँ।”पण वानें स्त्री, “म्हानें ई सुँ काई लेण देणो छ! तु जाणे।” 5 जद यहूदो वा चाँदी का सिक्का न मन्दर क मेलाड़ी फकार चल ग्यो अर बाहर जार खुद क फांसी लगा लियो। 6 प्रधानयाजकां वा रपया न उठार स्त्री,“आपणा निम मं ई धन न मन्दर का गल्ला मं मेलबो छोखो कोई न्ह, क कस्यां यो खुन का दाम छ।” 7 अर वानें आमैं-सामैं मं सलाह करी अर ऊ सिक्का सुँ परदेसीयां न गाढ़बा काण कुम्हार को खेत मोल लेल्या। 8 जिसुं वो खेत आज दन ताई भी ‘लोई को खेत’ का नाऊ सुं जाण्यो जावें छ। 9 अस्यां परमेस्वर की भविष्यबाणी खबाळा यिर्मयाह को वाळ खियो ऊ बचन पुरो होयो: “वानें चाँदी का तिस सिक्का मोल लिया, इस्रायल का मनख ई रकम न उकें काण देबा की थपाई करया छ। 10 अर जस्यां प्रभु न म्हारें काण आज्ञा दि वस्यां ही वानें कुम्हार को खेत मोल लिया।”

## ईसु काण मौत की सजा

11 तब ईसु राज्यपाल क सामें खडो होयो,तो राज्यपाल न ईसु सुँ बूझी,काई तू यहूदीयां को राजो छ क?” ईसु न व्हांकाण ज्वाब दिया,अस्यां ही छ ,तु अपणा-आप खयां छ। 12 फेर प्रधान याजकां अर बुजुर्ग यहूदी नेता न ईसु प घणी बातां का दोस लगार्या छ,तो उन्ह काई भी ज्वाब न्ह दियो। 13 पीलातुस न ईसु सुँ फेर बुझी,काई तु न्ह सुणया, ये मनख थ पें कत्नी बातां को दोस लगाबा लागर्या छ। 14 पण ईसु न ऊकें काण काई बी बातां क ज्वाब न्ह दीयो, ईसु न छानमुन होयां देख'र पीलातुस घणो सोच मं पड़ग्यो। 15 पण हर साल जद वह फसह नाऊ को त्वार आवें छ तब पीलातुस कस्यां बी एक कैदी न जिनें लोग-दणी छावें छ उनें वांक ताँई छोड़ देवें छो। 16 ऊ बगत बरअब्बा नाऊ को एक खतरनाक केदी ऊँठी बन्दी छो। 17 जद व एकट्ठा होया,तो पीलातुस न वासुँ स्त्री,थाँ काँई छावें छो,क म्हाँ थाँकें लेखें छोड़ दियुँ? बरअब्बा न या फेर ईसु ज्ये मसीह खुवावें छ। 18 क कस्यां पीलातुस न य ई लेख स्त्री क ऊ जाणें छो क प्रधान याजकां न जळता-बळता सुँ याँनें पकड़वायो छो। 19 पिलातुस जद न्याय का आसन प बठयो तो उंकी घराळी न उकें गोड़यां एक संदेशो खंदायो, क“ऊ धर्मी मनख का मामला मं हाथ मत लगाज्यो,क कस्यां उक बजे सुं म्हाँ आज रात सपना मं घणा दुख उठायो छ। 20 ”पण प्रधान याजकां अर बुजुर्ग यहूदी नेतां न भीड़ उकसाई क बरअब्बा न छोड़बा की अर ईसु न मार गालबा की मांग करो। 21 तब राज्यपाल न ज्वाब दिया ये दोनी मं सुँ किन्ह छोड़ दियुँ? वानें स्त्री,बरअब्बा न छोड़ दियो। 22 या सुणताँई पीलातुस न भीड़ सुँ बुझी,फेर म्हाँ ईसु न ज्ये मसीह कुवावें छ,उनें काँई करूँ? साराई न ऊ सुँ स्त्री,उनें कुरुस प चढ़ा द्यो!”। 23 पीलातुस न भीड़ सुँ स्त्री,काँई काण,उन काँई बराई करी छ।?”पण वह मनख जादा बसावडा करबा

लाग्या,उनें कुरुस प चढ़ा द्यो।” 24 पिपलातुस न देखयो क अब काई फायदो कोई न्ह। पण लड़ाई होबाळी छ।तो वो पाणी मंगार ऊ भीड़ क सामे खुद का हाथ धोर खी,“ई धर्मी का खुन सुं म्हारो कोई सरोकार कोई न्ह।थें लोग ई जाणें।” 25 जुवाब मं साराई न खी,“ईका लहू की जुवाबदारी म्हाँ अर म्हाँका छोरा-छोरीयां माना छां।” 26 तब पीलातुस न वांक लेखें बरअब्बा छोड़ द्यो अर ईसु न पट्टा सूँ मरवार जिक बाद मं कुरुस प कीलां ठोंक'र मारगालबा काण हुकम दे'र सपाईयां क हाथ मं सुपा दिया।

## सपाईयां न ईसु की मजाक उड़ाई

27 फेर राज्यपाल का सपाईयां ईसु न राज्यपाल क राजम्हल का मेलाड़ी लेग्या।अर ऊँठी ऊँकें च्यारुमेर सपाईयां की पूरी पलटन एकटा होगी। 28 वानें उका लत्ता उतार'र उकें ताँई रातो रंग को लत्ता फरायो। 29 अर ऊँक सीर प कांटा को मुकट गूँथ'र धर दियो ,अर उका जिवां हाथ मं सोटो थमा दियो अर ऊँकें आगें गोढ़ा टेकर व ऊँकी हाँसी मजाक करबा लाग्या ,क हे यहूदीयां का राजा थारी जय हो।” 30 फेर वानें ऊँक मुण्डा प थुँक्यो अर ऊ सोटो लेर ईसु क माथा प मारबा लाग्या। 31 जद व ईसु को मजाक उड़ा चुक्यो,तो व ऊँका लत्ता न खाढ़'र पाछें ऊँका खुद का लत्ता फरा दिया फेर उनें कुरुस प चढ़ाबा क ताँई बाहरें लेग्या।

## ईसु न कुरुस प चढ़ाबो

32 जद व बाहर जाई रया छा तो वान्ह समोन नाऊँ का कुरेनी देस को रहबाळोएक मनख मल्यो छो अर सपाईयां न ऊ बनापाल्तु मं पकड़लियो अर ऊँसूँ जबरदस्ती सूँ खी,क ईसु का कुरुस न उठा'र ले चाल। 33 फेर जद व गुलगुता नाऊँ की जगह पें पुग्या( जींको अर्थ छ कोफड़ी की जगह )। 34 तो व ऊँक काण मुर् मल्यो होयो अंगूर को रस पीबा काण दियो,पण ईसु न उ अंगूर को रस न चाखर पीबा काण नटग्या । 35 ईक पाछ ईसु कुरुस प चढ़ा'र लटका द्यो,ईसु का लत्ता न बाटबा काण आमैं-सामैं गोळ्यां गुडार क किनें काँई मल्यो,वानें लत्ता बाँट लिया। 36 अर ऊँठी बेठर ऊकी रुखाळी करबा लाग्या। 37 अर ऊँठी ऊँक माथा क ऊपर एक दोस पत्र माण्डर ठाँक दी। ऊ मं या मण्डी छी ‘यो यहूदीयां को राजो ईसु छ।” 38 वानें उँक लारां दो डाकू बी कुरुस प चढ़ाया ग्या।अर एक ऊँका जीवां हाथ क आडी अर दुसरो उँका कण्डया हाथ क आडी लटकादियो। 39 अर गेला मं खड़बाळा अपणा माथा न हला-हला'र ईसु की बेजती कर रिया छा। 40 व ईसु सूँ खर्या छा ,अरे!वाह!तू ऊई छ न!ज्ये मन्दर न ढसाबाळो अर तीन दन मं पाछें बणाबाळो। ! अपण-आप नें बचा ल, अगर तू परमेस्वर को बेटो छ । तो कुरुस प सुँ तणें उतर्या आ। 41 अर अस्यां ही प्रधान याजकां, यहूदीयां का निम सखाबाळा अर बुजुर्ग यहूदी नेतां बी ईसु की मजाक उडार्या छा। 42 अर व आमैं-सामैं बतळाबा लाग्या,ओ इनें औरां को तो बचाया पण खुद न कोन्ह बचा सक्यो।” यो इस्राइल को राजो छ,अब कुरुस प सूँ तणें तो उतर आ,तो म्हाँ ऊ प बस्वास करां। 43 यो परमेसर मं बस्वास करें छ।तो परमेसर छावें तो अबार इनें बचा ले।क कस्यां यो ख'व छो ,“ म्हाँ परमेसर को बेटो छूँ।” 44 ई तरें सुँ डाकु भी ज्ये ऊँक लारां कुरुस प लटकाया ग्या छा वा बी ईसु को मजाक उडार्या अर ऊँकी बेजती कर्या छा।

## ईसु को प्राण छोड़बो

45 फेर दफेरी सुँ लेर करीब तीन बज्यां ताँई सारा देस मं उंधेरो छायो रियो। 46 करीब तीन बज्यां की आस-पास ईसु न जोर सुँ अपनी भासा मं हेलो पाड़र खी, “इलोई, इलोई, लमा सबत्कनी।” जिको मल्लुब छ, “ओ म्हारा परमेस्वर, ओ म्हारा परमेस्वर थानै! म्हुँ काँई काण छोड़ द्यो?” 47 ज्ये ऊँठी ऊँक गोड़यां उबा छा, वां मं सुँ कोई मनख ईसु न अस्यां बोलता सुणर खी, “यो एलीयाह काण हेलो पाड़यो छ। 48 तो ऊँमं सुँ एक मनख न भागर पूम्बा न खाट्टा अंगूर क रस मं डुबाए एक लाठी का मुण्डा प टाँकर ल्याया। अर ऊ खाट्टा अंगूर क रस ईसु न चुखबा काण दियो। 49 औरां न खी, “ठहर जा”! आपण या देखंगा क इनेँ बचाबा काण एलिया आवगो क न्ह आवगो। 50 फेर ईसु न घणी जोर सुँ बळाए पराण छोड़ दिया। 51 उ बगत यरूसलेम मं मन्दर को परदा ऊपर सुँ लेर तणें ताँई पाटए दो टुकड़ा होग्या, अर धरती हाल गी अर डुंगर फाट पड़ीं। 52 तथां कबरां खुल गी अर परमेसर का मनखा का घणा डीलडा जीवता हेग्या। 53 व कबरां मं सुं खड़र ईसु क जीवतो हेबा क पाछें पवित्र नगर मं जार घणा न दिखाई दिया। 54 सेना को एक अधीकारी ज्ये सौ सपाईयां क ऊपर जम्मादार छो, अर ईसु की रूखाळी करबाळा मनख धरती का हालबा न अर अस्याण की दुसरी घटना न देखर डरप ग्या। तो ऊ सुबेदार न खी, क यो मनख साच्याँई मं परमेस्वर को बेटो छो। 55 अर ऊँठी घणी लुगायां बी छी व ईसु न दूर सुँ उबी उबी देख री छी। जद ईसु गलील का इलाका मं छो तब वह लुगायां ईसु क पाछें चालबाळी छी अर व ईसु की सेवा-चाकरी करे छी। 56 वा लुगायां मं सुँ मगदला नाऊँ का सहर मं रहबाळी मरियम, छोटक्यो याकूब अर योसेस की माँई मरियम अर जबदी का बेटा की माँई छी।

## ईसु को गाड़यो जाबो

57 वह दन मं जद स्याम पड़गी छी ऊ बगत मं यूसूफ नाऊँ को एक धणी मनख छो, उ अरिमतिया देस को रहबाळो छो, ऊ आयो। अर ऊ खुद बी ईसु को चेलो छो 58 ऊ पीलातुस क गोड़यां ग्यो अर उसुँ ईसु की लास मांगी। तो पीलातुस न ईसु की लास ले जाबा काण हुकम दे दी। 59 फेर युसफ न लास ले लि अर मकमल का चादरा मं उनें लपेटर। 60 अपनी खुद कि नई कबर मं धरदयो जिनेँ वो डुंगर कटवार बणवायो छो। अर कबर को बाणो बड़ो भारी भाटा सुँ जूड़ द्यो। 61 मगदला नाऊँ का सहर मं रहबाळी मरियम अर योसेस की माँई मरियम ऊँठी कबर क सामें बैठी छी।

## कबर कि रूखाळी

62 दूसरे दन मल्लुब ज्ये तयारी का दन क बाद प्रधान याजकां अर फरीसीयां पिलातुस क गोड़यां एकट्टा होर खी। 63 हे “महाराज, म्हाँनेँ याद छ, क ऊ छळी जद ऊ जीवतो छो, उ बगत मं उनें खी छी, क तीन दन क बाद मं म्हुँ मरया होया मं सुँ पाछो जीवतो होजाऊँ। 64 तो आज्ञा दे दीज्ये क तीन दन ताई कबर की रूखाळी करी जावें। जिसुँ अस्यां कोई न्ह हो जावें क उका चेला आर ऊँकी लास न चोरर लेजावें अर मनखां मं खव क वो मरया होया मं सुं जीवतो हेग्यो छ। यो दुसरो छळ फेली का छळ सुं भी ज्यादा बरो होवगो।” 65 पिलातुस न वाँ सुँ खी, “थें रूखाळी करबा काण सपाई ले जा सकें छ। जावो, थाँकें समझ क अनुसार जस्यां रूखाळी कर

सकें छ,अस्यां करो।” 66 फेर व चल गया अर ऊ भाटा प मोर लगार रुखाळा न ऊँठी बठाणर कबर की रुखाळी करवाई।

## 28

### ईसु को पाछो जिन्दा होबो

1 आराम हाळो दन क पाछे सप्ताह को पहलो दन दीतवार को दन बड़े तड़कावें में मगदला नाऊँ का सहर में रहबाळी मरियम अर दूसरी मरियम कबर न देखबा काण आई। 2 अर झाँको,एकधम घणाजोर को भुकम्प आयो अर प्रभू को एक दुत सरग सुं उतरयो। ऊ कबर क गोड़यां आयो अर भाटा न हटार उकेँ उपर बठ गयो। 3 उको रूप आकास कि बिजली क नाई चमक रयो छो अर उंका लत्ता बर्फ क नाई धोळाफट छ। 4 व सपाईयां ज्ये कबर क रुखाळी कर रया छ। डर क मारे धुजबा लागग्या अर मृत क नाई हो गया। 5 पण सरग दूत न वह लुगायां सुँ स्त्री, थां डरपो मत” म्हूँ जाणु छूँ क थैं ईसु न हेर री छ,ज्ये कुरुस प लटका’र मारगालयो छो। 6 ऊ यहाँ कोई न्ह छ! क कस्यां ऊ अपणा ख’बा क अनुसार ऊ जिन्दो होग्यो छ। आवो, ऊं ठाम न देखो,ज्यां वो पड़या छो। 7 अबानु थैं अठी सुँ बेगसीक जाओ अर ईसु का चेला काण यो समचार सुणावो क ऊ मर्या होया में सुँ पाछे जीवतो होग्यो छ अर ऊ था सुँ पहली गलील में जाऊगो जस्यां उनें थाकाण पहली बताई छी।थें उनें ऊँठी देखेंगा। 8 “ तो वह लुगाया हाथ्योहाती कबर न छोड़र चलगी। व डर अर राजी सुं भरगी छी।फेर ईसु का चेला क ताई या बताबा काण व भागि गी। 9 ईसु एकदम वा लुगायां न गेला में मल्या अर स्त्री, क “सुखी रहवो! ” व ईसु क गोड़यां आई अर उंका पगा न पकड़र ऊक ढोक दी। 10 तब ईसु न वासुँ स्त्री डरपो मत, जाओ अर म्हारा भाईयां सुँ खो,क व गलील प्रदेश में चल जावें।उठी व म्हनें देखगा। 11 हालताई वा लुगायां गेला में ई छी क झाँको,कोई सपाई ज्ये रुखाळी में छ, व नगर में आर ज्ये भी घटना ऊठी होई छी,वो सारी बातां न प्रधान याजकां काण सुणाया। 12 तब वानें बुजुर्ग यहूदी नेतां क लारां एकट्ठा होर एक योजना बणाई।अर वानें सपाईयां क ताई घणा सारां धन देर स्त्री 13 क लोग-दणीयां सुं या बोलो,क जद म्हां सुत्या छ, तो ईसु का चेला रात में आर ऊँकी लास न चोर’र लेग्या। 14 अगर थाकी या बात राजपाल ताई पुग क छ तो म्हां ऊकाण समझा देंगें। अर थाकेँ उपर काई भी संकट कोई न्ह आबा देंगा। 15 रुखाळा न धन लेर जस्यां वानें बतायो ग्यो छो अस्यांई करया छ।अर या बात यहुदि मनख्यां आज ताँई भी अस्याण क अस्यां फेलरी छ।

### महान आदेश

16 फेर ग्यारा चेला गलील में सुँ उ डुंगर प गया ज्यां जाबा काण ईसु न वा सुँ स्त्रीयो छो। 17 जद वानें ईसु देखया तो ईसु क ढोक दी। हालताँई कोई का मन में सक छ। 18 फेर ईसु न वाकेँ गोड़यां जार स्त्री, “ सरग अर धरती को सारो अधिकार म्हारें काण सुपायो ग्यो छ। 19 जिसुं,थें जार सारा जात्यां का मनख्यां न म्हारा चेला बणावो। अर वाक काण पिता,पुत्र अर पबित्र आतमा का नाऊँ सुं बत्तिस्मा दे द। 20 अर ज्ये आदेश म्हनें थां काण दीयो छ वानें मानबो सखावो अर याद रखो, ई जगत का आखरी ताई म्हूँ सदा थाँका लारां छूँ ”